

Zân

Zisasiyet yaŋaŋ Zânaŋ meluwaŋ mge.

Zânaŋ Kawawaŋgalen Zet Zapat Dolakŋaŋ Penaŋ kapi kuye. Zân kapi Zisasiyet nembraŋaŋneyet tunguwinangatnaŋaŋ Kawawaŋgalen Zet Zapat Dolakŋaŋ Penaŋ kapi kuye. Zemsiyet meniŋaŋ ma biwidangat kwitnaŋ Zebedi (Matiyu 10:1-4; Mak 3:13-19 ma Luk 6:12-16). Zânaŋ Kawawaŋgalen Zet Zapat Dolakŋaŋ kuyeen iŋŋangat kwitnaŋ esemteŋ kumti, “Neŋ Zânaŋ kuyap,” kegok ku zeye. “Egaŋ nembraŋaŋ nâmtikŋaŋ mamin,” kegok kuye. Zet keboŋ ke omba kukuŋaŋ makuwek. Egaŋ buŋam zapat kapi etaŋ ku kuye. Zapat meluwaŋ tuk ŋen kuyeyaŋ bamgat eknup.

Matiyumak Mak ma Luk ekŋenaŋ am maŋgeen kwep kwepgat kumindawien. Zânaŋ buŋam zapat kapi apalak papia kuye. Am sambe msat kataŋ ekŋengat zapat kuye. Zet Zapat Dolakŋaŋ kapi Matiyumak Mak ma Luk ekŋenaŋ kuwien keyet kateŋ yek. Egaŋ Zisasiyet yaŋaŋ penaŋ deyetnaŋ kokotnaŋ ma egaŋ kuleki penaŋ mimiyet koge keyet yaŋaŋ weyaŋ kuye. Zet ŋotekŋaŋ Zânaŋ kuyeen ŋen kapigok, Zisas ek Kawawaŋaŋ an peme koti am mama miminjin bekananengatnaŋ gilik zemindatimti mama teŋ am indandayet zenzeŋaŋ wan ilak koti kegok mmâge.

Zet ŋotekŋaŋ temaŋ Zângalen buŋam zapat keŋan kapigogaŋ talip:

1:1-18. Zisas eweŋan an kwi penaŋ maŋge

1:19-51. Zân an tu zulutindende egaŋ mulupmaŋ ewe tapme Zisasiyaŋ yaŋbemti nembraŋanen indage

2-6 Zisasiyaŋ am tunguwinanŋ mulup yaŋbemti mge

7-11 Zisasiyaŋ menok notnaŋ mti an ŋeŋaŋ bembe ekŋenmak zet mdândâ notnaŋ mge

12-19 Zisasiyaŋ gakikiyelen set im mege

20 Zisasiyaŋ gakikiyengatnaŋ wage

21 Nembraŋaneyet zemgwatnaŋ notnaŋ mimindamti kululuŋen mowege

Zet mamaŋaŋmak keyaŋ naman am sokbeye

1 ¹Eweŋan baen Zet egaŋ yaŋbemti Kawawaŋmak ilisakwep mamkwabunaŋ Zet ke Kawawaŋegak. ²Ke tipman baen Kawawaŋmak ilisakwep mamti ³Kawawaŋaŋ zempeme kwitnaŋ kwitnaŋ sambe bepi mme sokbemâge. Ek piŋan kwitnaŋ kwitnaŋ igak ŋen ku sokbemâge yek. ⁴Zet ek mama keyet toŋaŋ egalen busatnaŋaŋ am mbusatnaŋ bemindeye.

⁵Âpme busatnaŋaŋ tambu sosok keŋan mepme tambu sosogaŋ kunzuŋti mege.

⁶⁻⁷Âpme an ŋen kwitnaŋ Zân. Ek msalen kapi am busatnaŋgat zapatnaŋ diindome am ilindiŋ busatnaŋ toŋaŋ Zisas egat zapatnaŋ nâmti nâmkîŋpepeyet nâmti Kawawaŋaŋ ikaŋaŋ zempeme koge. ⁸Wa Zân ikaŋaŋ am mbusatnaŋ bemindendeyet ku koge. Egaŋ belak an busatnaŋ toŋaŋ tobe keyet buŋam zapatnaŋ etaŋ manzemtan. ⁹An busatnaŋ toŋaŋ keyaŋ msalen kapi sokbemkawaŋ bemti am msalen mammbusatnaŋ bemindein.

¹⁰Ek ke eweŋan Bipmaŋmak mambunen msat kapi mme sokbeye. Ya egaŋ naman mamkwati msalen kapi amnaŋ masokbenupnok sepem sokbemengut am msalengatnaŋ ekŋenaŋ naman egat yaŋaŋ penaŋ ku weyaŋ eknâmâtâbien. ¹¹Egaŋ Zuda msalen ke mame Zuda am ma ikaŋaŋgat donnotnane ma eiŋbipmane mee penaŋ piyaŋ ek mtopemti wisat mpewien. ¹²Âpme am ek notn mpemti nâmkîŋpewien ekŋen Kawawaŋgat nemunambaŋane bemti mamayet indapmukulem mimindeye. ¹³Wa animbi Kawawaŋgat nemunambaŋane penaŋ bemti mamaip ke animbiyaŋ mame nemba masokbeip sepem keboŋ yek. Ma angalen segat tikŋaŋaŋ ndabeme mamaip keyet penaŋaŋ yek. Kawawaŋaŋ ekŋenaŋ ikaŋaŋgat nemunambaŋane bembeyet nâmindeme kogok ekŋenmagen sokbeye.

¹⁴Âpme Zet egaŋ amnaŋ masokbenup keyet kataŋ sokbemti am ningat tungupmnan kapi mamtan. Mamti keŋ taoletmak ma zetnaŋ penaŋ penaŋak zem mamti menok sepem igak igak mme amnaŋ Kawawaŋgat Nemunaŋ kwep etaŋ keyet mama mimiŋaŋ dolakŋaŋ ke ma windenaŋ temaŋ ke Bipmaŋaŋ miak peme koge ke ekbenn.

¹⁵Zânaŋ egat zetnaŋ pigok zemkawaŋ beye, “Neŋ an ikaŋaŋ keyet buŋam zapatnaŋ diindowan, ‘An bamnan takozin egaŋ neŋ seabemnemti Amobotnaŋ penaŋ bein. Msat kululuŋ ma neŋ mee pi sokbembepiŋ tapma egaŋ tipman penaŋ baen mamkwage.’”

¹⁶Egaŋ ningat tikŋaŋ manâmndein keyepmti keŋ taoletnaŋgat penaŋaŋ ikaŋaŋgalen mama mimi dolak dolakŋaŋ sambe piyaŋ elimiak ndeye. ¹⁷Moses egaŋ Kawawaŋgalen zii zet ke aikndaye. Âpme Zisas Kilaisiyaŋgut keŋ taoletmak Zet Zapat Dolakŋaŋ penaŋ timtot ndaye.

¹⁸An ŋenaŋ Kawawaŋ sepemaŋ bugan ku ege. Nemunaŋ neŋ Bipmmak

mamayap neŋ egalen zet zapatnaŋ ke mkoti zemkawaŋ bemindama nâmbien.

Zân an tu zulutindende anaŋ ikŋaŋgat yaŋaŋ zeye
(*Matiyu 3:1-12; Mak 1:1-8; Luk 2:1-18*)

¹⁹Zuda amobotnaŋ ekŋenaŋ Zelusalem mkaen tati sâpe sâpe bumbu an ekŋengat kandaŋinaŋ mulup an mamaip ekŋen zemindeme Zânmagen meti pigok yaŋkwesiwien, “Geŋ pe Kilais ma an kwi? Ze zemane nâne.”

²⁰Zeme egaŋ keyegak ikŋaŋgat yaŋaŋaŋ pigok penaŋ zemkawaŋ bemti diindoye, “Neŋ wa Kilais yek.”

²¹Zeme ekŋenaŋ naman ewe pigok yaŋkwesiwien, “Âpme geŋ an kwi? Geŋ Ilaiza?”

Zeme egaŋ pigok zeye, “Neŋ ek yek.”

Zeme ekŋenaŋ zewien, “Âpme geŋ nin golaŋ zenze an temaŋ ŋen ninmagen kokogat damuŋ matatnuwen geŋ kapi?”

Zeme egaŋ pigok zeye, “Neŋ golaŋ zenze an ke yek.”

²²Zeme ekŋenaŋ pigok zewien, “Geŋ kwi penaŋ? Ze weyaŋ yaŋaŋdi zemane nâne. Am zemndeme kotn am ekŋen keyet pe zigok met zeman nâseip? Geŋ gitaŋgat penaŋ yaŋdi zigok penaŋ manzenik?”

²³Zeme Zânaŋ pigok diindoye, “Neŋ golaŋ zenze an Aizaya egaŋ zet pigok zeye keyet penaŋaŋ,

‘An ŋenaŋ msat tungupman mamti animbiyet pigok takuin,

‘Pi mamti amnaŋ yomin zeme delaŋ zeme keŋin weyaŋti

Amobotnaŋgat damuŋ talit,” mandiindoin!” (Aizaya 40:3)

²⁴Âpme an ekŋen Palisi ekŋenaŋ zemindeme kobienan ²⁵naman pigok yaŋkwesiwien, “Nin tatnâmann geŋ, ‘Neŋ Kilais yek ma Ilaiza yek ma golaŋ zenze an ŋen yek,’ zenik. Kegok beme geŋ kwilekiyet am tu manzulutindenik?”

²⁶Zeme Zânaŋ kapigok diindoye, “Neŋ am tu etaŋ manzulutindeyap. Âpme an ingat tunguwinan sokbeyeyaŋ mamain ek ke in ku maekmâtâlîp. ²⁷An keyaŋ bamnan gwaen takozin. An bekeboŋ beke neŋ bukaboŋ kapiyaŋ elewat temaŋ timpema ŋep ku bewe.”

²⁸Ekŋenaŋ meyaŋkwesiwien ke Betani mka Zodan tu nembet daeset tazinen ke mebien. Zânaŋ mka ke mamti am Zodan tuyen tu manzulutindemtan.

Zânaŋ Zisasiyet yaŋaŋ zemkawaŋ beye

²⁹Msat msame Zânaŋ am tu zulutindemambe tati ekme Zisasiyaŋ ninmagen takopme ekti ningat pigok dindoye, “An inde takozingat egit. An kainde Kawawaŋgalen Sipsip Nembraŋaŋ. Zuda am ekŋenaŋ yomin delaŋ zenzeyet nâmti Sipsip Kawawaŋgat sâpe sâpe mambuip. Sepem kegogak Kawawaŋaŋ ikŋaŋgat Nemuŋaŋ takozin ke amgat belen beme msat sambe

am ningat yom delan zenzeyet kume gakiwe. ³⁰Nen an keyet ilak ewejan pigok diindowan, ‘An bamnan takozin ke Amobotnanj temanj nen ewe sokbembepinj tapma eganj ewejan tipman penanj baen mamkwage.’ ³¹Ek ewejan Kawawanj an yomengatnanj gilik zemndadagat ombempeye ke nen ku ekmâtâban yangut Kawawanj zet zapatnanj etanj zemkawanj bemname nen Isael am in ondekindemti egat zapatnanj diindoma nâmti in eganj kokogat weyeyanj mulup mti mamayet nâmti inmagen tu zululut mulup kapi mimiyet zemneme inmagen yangbewan.”

³²Kogogapm Kawawanj pigok dinonje, “Nen Emetak Tejanj kululunjengatnan age sasakandenombe nembonj bemti ekmagen totapme ekbanik beme an ilak ke. ³³Nen an ke ewejan ku nâmâtâtpewan yangut Kawawanj nen am tu zulutindendeyet mulup zet kapi nanjeyanj pigok dinoye, ‘Nâlen Emetak Tejanj toti dukjanen tapme ekbanik beme an keyanj am nâlen Emetak Tejanj ke indamâbe.’ ³⁴Nen yanj kekok zemâtâtname ekbangapmti muluwanj kekok sokbeme ekti ek ilak Kawawangat Nemujanj penanj elak nâmâtâtpewan.”

Zisasiyanj yangbemti nembanjane zulak zulak ilak indatiye

³⁵Msat msame Zânanj nembanjane zut nit ndatimti msat keyegak koti tapmambenn. ³⁶Tatnepemann Zisasiyanj keyegak kwawepme ekti Zânanj nigat pigok dinitdoye, “An zut, an da egit. Ek Kawawangalen Sipsip Nembanj.”

³⁷Zeme namba zut piwan nânânjak keyegak Zân pemti met Zisasiyet baman mâti mebun. ³⁸Mepmalu Zisasiyanj gilik zem idikti pigok idayanjkwesiye, “An zut, it kwilekiyet napmâti takolup?”

Ndayanjkwesime nit pigok zewelin, “Labai, (E Ibulu zet âpme ningalen zeleset ‘an zikat indanda,’ kok zewanek.) geŋ mka pe deset mawenik.”

³⁹Yanjkwesimalu pigok dinitdoye, “It kopmalu nen met mkan zikat idama egit.” Zemti idati tapmetnepeme msat gasim beme ekmak ke tapmetneti tambu sutnan gilik zemti naman mkanjidanen kobun.

⁴⁰An zut Zânanj Zisasiyet yanj zeme nâmti ekmagen mebun nitmagengatnanj namba nen kwitnanj Endulu ek Saimon Pitayet datnanj.

⁴¹Enduluanj metneti meniŋ Saimon aikti pigok dunduye, “Nen Mesaya, kwitnanj nen Kilais” manzeip ek ilak aiga.”

⁴²Kegok zemti meniŋ Zisasmagen wati mepmalu Zisasiyanj ekti zeye, “Geŋ Saimon Zângat nemujanj muŋ. Gâgât kwidi alakŋanjen nen Sipas gayap.” (Sipas kwit keyet yanj “nanzan”).

⁴³Msat msame Zisasiyanj Galili msalen mesât tati Pilip selen aikti pigok dunduye, “Geŋ kopmane nenmak medi.” Zemti wati mebun. ⁴⁴Âpme Pilipmak Endulu muŋanet ekjen mkanjin kwep Besaidayetnanj.

^a **1:41** Kwit zut keyet yangit kapigok Kawawanj am yomengatnan gilik zemndatitijet ombempeye.

⁴⁵Metneti Piliwan Nataniel meaikti pigok dunduye, “Mosesimak golan zenze an notnanan itnanan baenen an kapi Kawawanan nin yomengatanan gilik zem ndadagat ombempeye keyet zetnan meluwan mbien ewan penanan alak aikti ekmak tapmanup. An ke Zisas Zosepgat nemunan Nasalet mkaengatanan.”

⁴⁶Zeme Natanielian zet dopman kapigok gilik zemti saye, “Gen nâmane Nasalet mkaen bukanda kwileki dolaknan nen sokbewe bein?”

Zeme Piliwan zeye, “Kok zenikgat kopmane met zikat gama ekbak.”

⁴⁷Zemti Nataniel wati Zisasmagen mepme Zisasiyan Nataniel ekti zeye, “An kapi Israel an penan. Ek zet dâsuki nen ku manzein.”

⁴⁸Zeme Natanielan zeye, “Zisas, nen pe de mama yanj nikbanangapmti kegok zenik?”

Zeme Zisasiyan zeye, “Piliwan gen ewe met gaiikpin tapme gen tep kwitnan pik kandan ke tapmane giga.”

⁴⁹Zeme nâmti egan Zisas pigok dunduye, “An zikat indanda, gen penan sukwap Kawawangat Nemunan penan Israel am ningalen Amobotnan Teman.”

⁵⁰Zeme Zisasiyan pigok zeye, “Nen gen tep pik kandan tapmane giga zeya keyepmti nâgât nâmkinpemnenik? Nânik, pi ewe belak yanbemti butnan isiknan bugan ekdik. Âpme penan penan ewe bam sokbeme mamti ekmebanik!”

⁵¹Kegok dundumti naman nembanane ilinsakwap pigok diindoye, “Nen zet penan nen pigok diindoma nâit, bamgat in taekme kululun gwaenen nandem tapme Kawawangalen ensel ekpenan Angat Nemunan nenmagen motopme ekkep.”

Zisasiyan zeme tu penanan naman wain beme nimbien

2 ¹⁻²Ke mti manepeme kasup zut bemelak Galili msalen mka nen kwitnan Kana manzeip ke animbi zut nen awembin bemidesâgâti tu meu mee akume kopme bumti Zisas mama ma Zisas iknan ma nembanane nin nsakwap ndamandame tu meu nsâgât meti ³meu tatnepemann meuyan ewe tapme wain tu ilak delan zeme Zisas mamaan ekti pigok zeye, “Wae, eknen pi ilak wain tu delan zeme belak talipgat nâmbega.”

⁴Zeme Zisasiyan mamaangat pigok zeye, “Mange, wa mulup kapi nin tapminup yek. Nâlen mulup miminn kann ewe bam sokbemnawe.”

⁵Zeme mamaan mulup namba eknenmagen meti pigok zeye, “In tatnepeme Zisasiyan kwileki nen mimiyet diindome zetnan gawepumti mseip.”

⁶Âpme mka keyet ganzenan menzim tosi teman teman ⁷bekapi onzemindeme matatemien. Menzim tosi teman kwep bekeyet tu 100 lita mee kegok makasimpemtemien. Kasimpeme tapme sesewat mkayelen

amobotnanaŋ set bemindaye keyet kataŋ mâti kasup kataŋ selin belin manzulutemien. Menzim tosiŋ bekeboŋ sambe mka kataŋ mawemetan.

⁷Kegogapm Zisasiyaŋ mulup an ekŋen pigok diindoye, “In tu omti menzim tosiŋ temaŋ taliwen kapi kasime towepmâlak.” Zeme mulup an ekŋenaŋ menzim tosiŋ temaŋ 7 pi tu omti kasime gak zemâge.

⁸Omkasime delaŋ zeme pigok diindoye, “In tu butnaŋ menzim isikŋaŋ kasimtimi met an meu damuŋ ke sait.” ⁹⁻¹⁰Zeme omti mmepme tuyan wain beme an meu damuŋ keyaŋ wain tu ke nim ekti kapi pe desetgatnaŋ mkolip ke ku weyaŋ nâmâtâti mulup nempa ekŋenaŋ Zisasiyaŋ zeme tu penaŋ omti mebien. Kegogapm ekŋenaŋ wain tu zigaset sokbep eyet yaŋaŋ ɲep nâmâtâbien.

Kegok mme an meu damuŋ keyaŋ animbiŋaŋmak bet butewun ke zeme kopme pigok dunduye, “Ningalen set temaŋ kapigok tazin, wain tu dolakŋaŋ penaŋ ke am ɲeŋaŋ indame nimti tapmenɟut naman bam bekaŋaŋnik ke maindame nip. Yaŋgut geŋ kileŋ mnak wain pembeŋaŋ pi belak pemane tapme bekaŋaŋnik ɲeŋaŋ indamane niyo. Geŋ set dâsuki mti wain tikŋaŋ kapi aŋgalaŋ pemane tapmawaŋ bam mti kolip.”

¹¹Zisasiyaŋ mka keyet yaŋbemti menok ke mti Amobotnaŋ main keyet yaŋaŋ am ekŋenmagen mkawaŋ beme nempaŋane nin windeŋaŋgat yaŋaŋ ekti nâmkɲepewenn.

¹²Keyetnan Zisasmak mamnotnane ma nempaŋane nin nsakwep Kapaneam mkaen ke tambu msasa isikŋaŋ bugan topmambenn.

**Zisasiyaŋ sesewat mka temanen amnaŋ omkwiti kwiti tapmme
indikti indapmâge**

(*Matiyu 21:12-13; Mak 11:15-17; Luk 19:45-46*)

¹³Topmanepemann Zuda ningalen Aŋgalalaŋ Kendo elak bududuk beye keyepmti Zisasiyaŋ Zelusalem mka teman Kendo ke eksâgât mowebenn.

¹⁴Moti ekme sesewat mka temaŋgat tambaŋgumen amnaŋ kwaweti Kawawaŋgat sâpe sâpe bumbuyet makau ma sipsip ma sasakandanombe mee pi time kwawepme omkwiti kwiti mti mânep sisak dukŋan bemti omaiŋ maiŋ tapmmambien. ¹⁵Tapmme Zisasiyaŋ indikti ɲeŋaŋ penaŋ zime egaŋ tek timti mendeŋme katikŋaŋ beme mtati makau ma sipsip mee pi wuwap indawitikti indamâpme kuŋkunzuŋ kwawepmâpme mânewin timtati time mekopme sisakŋin mtati gilik zempeme wenɟe. ¹⁶Âpme am sasakandenombe mtabien ekŋen indikti memendep mimindamti pigok diindoye, “In sasakandenombeŋin timti toti melit. In Biengalen mka kapi mme ingalen bemkwiti kwiti mkanok ku bek.” ¹⁷Zisasiyaŋ moti kekok mme nempaŋane nin Kawawaŋgalen zet zapat itnaŋanen meluwaŋ pigok mimiŋaŋ tazin keyet otnâmbenn,

“Gâlen sesewat mkayepm ɲeŋɲ penaŋ zimetip.” (*Sam 69:9*)

¹⁸Âpme Zuda amobotnaŋ ekŋenaŋ Zisasmagen koti pigok yaŋkwesiwien, “Geŋ kapigok penaŋ tapminikgat pe Kawawaŋaŋ winde

game egalen windeen maminik beme geŋ menok ŋen mmane nin ekti yaŋaŋdi ekmâtâsenup?”

¹⁹Yaŋkwesime egaŋ keyegak pigok zeye, “In sesewat mka teman kapi asekyaloŋme neŋ naman kasup tuk keyet keŋan etaŋ timtusu tusu mti walapma delaŋ zemâbe.”

²⁰Zeme ekŋenaŋ Zisasiyet pigok zewien, “Yeŋsokŋne ekŋenaŋ nup kan 46 bepi sesewat mka teman kapi tawalatne walatne peme delaŋ zeye. Âpme geŋ bukapiyaŋ kasup tugat keŋan etaŋ walasât zenik?”

²¹Yaŋgut Zisasiyaŋ zet ke wa sesewat mka teman keyet penaŋ nâmti ku zeye egaŋ ikŋaŋgat sekŋaŋgat nâmti zeye. ²²Yaŋ maneti Zisasiyaŋ gakiyeyaŋ gilik zem wapme kan keyet nembraŋane nin sesewat mka teman asekti walalagat zeye keyet ma Kawawaŋgalen zet zapat itnaŋanen muluwaŋ mimiŋaŋ keyet penaŋaŋ ekmagen sokbeme ekti nâmkinpewenn.

²³Zisasiyaŋ Zelusalem mka teman Aŋgalalaŋ Kendoen mamti menok teman sepemaŋ igak igak mme am sambe ekŋenaŋ ke ekti Zisasiyet nâmkinpewien. ²⁴Yaŋgut Zisasiyaŋ am sambe ekŋen bekapi notnaŋaŋ keŋinan ŋenzinziŋaŋ tage e indik mâtâti ekŋen sambe keyet nâme notnaŋne etaŋ ku beye. ²⁵Egaŋ am ŋeniyet yaŋaŋ nâsâti am ŋen yaŋkwesime ku dundume nâŋge. Egaŋ ikŋaŋ am keŋin baen ekti yaŋaŋin eknâmâtâge.

Zisasiyaŋ Nikodimasmak zapat mbun

3 ¹Palisi an ekŋenmagangatnaŋ an ŋen kwitnaŋ Nikodimas. An beke Zuda am ekŋengalen sesewat mka temaŋgalen an damuŋ teman ŋen ek ke. ²An keyaŋ buzak tambuyet Zisasmagen moti pigok dunduye, “An zikat indanda, nin gâgât yaŋaŋdi nânup. Geŋ an zikat indanda penaŋ Kawawaŋmagangatnaŋ kwatobanan. Âpme geŋ menok sepem igak igak maminik keboŋ kapi an ŋen Kawawaŋpiŋ mamti mulup keboŋ keboŋ ke ŋep ku mnak.”

³Âpme Zisasiyaŋ zeye, “Neŋ penaŋ sukwep pigok zema nâmbak: An ŋenaŋ nembra okak masokbeip keyet kataŋ okak ku sokbewe beme an keyaŋ Kawawaŋmak tusumti egalen zemâtâtâtgat katnaŋen mama keŋan ke ku mebe.”

⁴Zeme Nikodimasiyaŋ pigok zeye, “Weneŋe, an teman penaŋ bekeyaŋ naman zigaset mamaŋgat keŋan toweti naman nembra okak sokbewe?”

⁵Zeme Zisasiyaŋ naman pigok dunduye, “Neŋ zet penaŋ sukwep pigok zema nâmbak: An ŋenaŋ tuyaŋ ma Emetak Teŋmagangatnaŋ mama alakŋaŋ ke ku tiwe beme an keyaŋ Kawawaŋgalen zemâtâtât katnanen mama keŋan ŋep ku mebe. ⁶Amgalen mamaen masokbep ekŋen amgat sepem. Âpme Emetak Teŋaŋ ammagen mulup mme mama teŋ matip ekŋen Kawawaŋgat zapat mambeip. Ekŋen ke Emetak Teŋgalen am

penaŋ. ⁷‘Geŋ neŋ sokbembe alakŋaŋ sokbembe,’ keyet zema geŋ nâmane nukŋaŋ penaŋ kumbek. ⁸Tâgâ ek belak kileŋ ke kumbume kwisakŋaŋ etaŋ kume manânuŋ. Âpme geŋ pe deset yaŋbemti met deeset mamezin e ku manânik. Âpme Emetak Teŋaŋ am ŋenmagen mulup mme mama teŋ matin ekmagen Emetak Teŋaŋ tâgâyaŋ mulup maminok mamin.”

⁹Zeme Nikodimasiyaŋ nâmti zet dopmaŋ kapigok gilik zem saye, “Pe zigok penaŋ mti alakŋaŋ sokbembeyelen nâmti zet kapi tazenik?”

¹⁰Zeme Zisasiyaŋ Nikodimas pigok dunduye, “Geŋ Israel am ekŋengalen an zikat indanda temaŋaŋ zet kapi zema geŋ kwilekiyet nâmane nukŋaŋ taben? ¹¹Neŋ penaŋ pigok diŋgoma nâmbak: Neŋ kwitnaŋ kwitnaŋ sambe Kawawaŋaŋ zemâtâtname nâmban keyet zapatnaŋ ma Kawawaŋaŋ ammagen mulupmaŋ kawaŋan sosok mamme egap keyet zapatnaŋ diindoma in sambeyaŋ ningalen zet ke nâme ewe pepesut beme ku manâmkĩŋpeip. ¹²Neŋ kwitnaŋ kwitnaŋ msalen sosok masokbemâpme egip kapiyet palen bemzema in ku manâmkĩŋpeip. Âpme neŋ kwitnaŋ kwitnaŋ kululuŋen gwaen masokbemezin keyet palen bemzema in zigok ŋep nâwiek? ¹³An ŋenaŋ kululuŋen gwaen moti kwitnaŋ kwitnaŋ tazin ke ku ege. Angat Nemuaŋaŋ neŋ kululuŋengatnan toban keyepmti kululuŋen gwaen kwitnaŋ kwitnaŋ wein e nâmtâpma delaŋ zemâzin.

¹⁴Itaŋaŋ Moses egaŋ msat tuŋgupman nombe weŋaŋ aenaŋ weyaŋti tep palen kwasim pemti mwaŋ onzempeme tapme ekbien. Sepem kegogak Angat Nemuaŋaŋ neŋ ke tep palen palak palak masasok neme wema nomti mwaŋ onzemneme tapma ekbep. ¹⁵Amnaŋ neŋ nikti nâmkĩŋnemti mama kanzizit aiikgat kegok mbep. ¹⁶Kawawaŋ egaŋ msalen am sambe ingat gogot penaŋ mamimindein keyepmti egaŋ ikŋangat Nemuaŋaŋ kwep penaŋ ke ketalasimti msalen peme toge. Keyepmti am neŋ nâmkĩŋnewep ekŋenaŋ walelepiŋ; mama kanzizit tiwep. ¹⁷Kawawaŋaŋ Nemuaŋaŋ neŋ msalen neme toban ke wa am yominaŋgat dopmaŋ indandayet nâmti ku neme toban. Neŋ am yomengatnan gilik zemti indatitiyet Bipmnaŋ zemneme toban.

¹⁸An ŋenaŋ Kawawaŋgat Nemuaŋaŋ neŋ manâmkĩŋnein beme yomaŋgat dopmaŋ ku tiwe. Âpme an ŋenaŋ Kawawaŋgat Nemuaŋaŋ neŋ ku manâmkĩŋnein ek yomaŋgat dopmaŋ ilak titiyet damuŋ matazin. Elak egaŋ Kawawaŋgat Nemuaŋaŋ neŋ nâmkĩŋnenepiŋ mamm keyepmti sepem kegok sokbemsawe. ¹⁹E yaŋaŋ kapigogapmti tosa mgasik kapi tiwe. An ekŋenaŋ busatnaŋ msalen kapi sokbeme buŋam zapatnaŋ ekŋenmagen mepme nâmtiŋgut ekŋenaŋ bamkumpemti ekŋenaŋ mama mimi bekaŋaŋ mti tambusosogat zapat mambeip. ²⁰An ŋenaŋ yom mamin beme egaŋ busatnanen mopma yomm sosok sokbesem zemti busatnaŋgat maŋgazin. ²¹An ŋenaŋ Kawawaŋgalen zet nâmti maŋgawepumti main egaŋ busatnaŋgat ku maŋgazin. Âpme egaŋ busatnanen mopme busatnaŋaŋ mama mimiŋaŋ dolakŋaŋ ke sosok mamkawaŋbein.”

Zânaŋ Zisasiyet yaŋaŋ zemkawaŋ beye

²² Ke maneti Zisasiyaŋ nembraŋane nin ndatime Zelusalem mka pemti Zudia msat butnaset ŋen meti mambenn. Ke met ekŋenmak mamti animbi tu mazulutindemtemenn. ²³ Âpme Zân egaŋ kegogak mka ŋen kwitnaŋ Enon zeme ke Selim msaleset tu sambe penaŋ matatan ke mamti am tu manzulutindemtan. ²⁴ [Kan keyet Zân ewe mka katikŋan pepepiŋ tapme egaŋ belak mamti mulup ke mamtan.]

²⁵ Zângalen nembraŋane Zudayetnaŋmak Zuda an ŋenmak tu zululugat ²⁶ mdândâmti Zângat nembraŋane ekŋenaŋ Zânmagen meti pigok dunduwien, “An zikat indanda, geŋ an ŋen Zodan tu nembet daeset tapme zikat ndamane ekbenn an keyaŋ alak am tu tazulutindeme am sambe pi ekmagen etaŋ ondek mepmâpme delaŋ zein.”

²⁷ Zeme Zânaŋ nâmti pigok diindoye, “An ŋen Kawawaŋaŋ mulup ŋen zemdelaŋ zem sasapiŋ mme egaŋ mulup belak keŋan galak ku mamin. ²⁸ ‘Neŋ Kilais yek, neŋ belak Kawawaŋaŋ an keyet zapaŋnaŋ zenzeyet ŋeŋaŋ zemneme koti zema nâmbien. Âpme in zet ke eneyet sakwep penaŋ kandabien.’ ²⁹ An ŋeniyet imbi zapaŋ zempepeŋaŋ an keyaŋ imbi keyet apmaŋ penaŋ. Yaŋ egaŋ imbiŋaŋ kemak bet butemti keŋ oloŋen mme notnane ekŋenaŋ zapaŋnaŋ nâmti ekmak tusumti ilinsakwep oloŋen mamip. Keŋ oloŋen temaŋ penaŋ keboŋ ke sokbemnanayelen kan elak alak penaŋ kapi sokbemnain. ³⁰ Zisasiyet kwizet buŋamaŋaŋ palakŋaŋ beme kopme nâlenaŋ naman uluk zemti towebe.

³¹ An ŋen msalen kapiyetnaŋ sokbembenaŋ egaŋ kwitnaŋ kwitnaŋ msalen kapiyetnaŋ etaŋ ekti manzein. Âpme an kululuŋen gwaengatan tototnaŋ ek kwitnaŋ kwitnaŋ sambe kapiyet Amobotnaŋaŋ tazin. ³² Egaŋ kululuŋen kwitnaŋ kwitnaŋ sambe tazin keyet zapaŋnaŋ zemengut am ekŋenaŋ nâme dâsuki beme ku nâmkinpewien. ³³ Âpme an ŋenaŋ zetnaŋ ke nâmti mamkitik pein beme egaŋ Kawawaŋgat yaŋaŋ an zet penaŋ penaŋaŋ zemti main, e nâmâtâpewep. ³⁴ Kawawaŋaŋ an zempeme toge an keyaŋ koti Kawawaŋgat yaŋaŋ manzemkawaŋbein. Keyepmti Kawawaŋgalen Emetak Teŋaŋ winde omba penaŋ same egalen windeen mulup mamin. ³⁵ Bipmaŋaŋ Nemuaŋ egomti kwitnaŋ kwitnaŋ sambe bepi egaŋ damuŋ mimiyet betnanen bemâge. ³⁶ Âpme an ŋenaŋ Kawawaŋgat Nemuaŋ ke manâmkînpein beme mama kanzizit eweŋan msalen kapiyegak yaŋbemti masokbemsain yaŋgut am ŋenaŋ Kawawaŋgat Nemuaŋ egalen zet ke ku gawepuwe beme mama kanzizit ke ku tiwe. Am keboŋ ekŋenmagen Kawawaŋgalen welili eweŋanak msalen kapiyegak masokbemindain.”

Zisasiyaŋ Samalia imbi ŋenmak zapaŋ mbun

4 ¹ Zisasiyet zapaŋnaŋ Palisi ekŋengat pigok kot zeme nâmbien:
Zisasiyaŋ am tu tazulutindein eyaŋ Zânaŋ am tu zulutindeye ekŋen

indasebemindeye. ² (Zisasiyan iknan am tu ku zulutindeye nembanane nin etan am tu zulutindewenn.) ³⁻⁵ Amnan Zudia msat pemti Galili msalen mesât Samalia msat tungupmaset beke tapmetne metne Galili msalen mapatan zemtemien.

Âpme Zisasiyet zet sambe kekok tazeme nâmti egan nin nembanane ndatime Zudia msat pemann tapme Galili msalen gilik zemti mesât Samalia msaleset beke tapmetne metne mka nande nen kwitnan Saika zeme ke patan zewenn. Mka ke Zekowan nemunan Zosep msat saye keyet ganzenan matatan. ⁶ Msat keyegak Zekowan tu pusak timpeyeyan maomnimtemien. Âpme Zisasiyan set teepman kotne kotne tinsutnan penan beme sebetnan suknan beme tu pusak solonan ke moti totapmanje.

⁷⁻⁸ Ke tot tagom tati nembanane nin zemndeme mkaen tu meu kwitim tisât mepmann Zisasiyan igak tu pusagen ke totati ekme Samalia imbi nenan tu osâgât menziman kwindinti kot tuyen osât tapmme Zisasiyan ekti pigok yankwesiye, “Gej tu bugan bemti namane nimbi.”

⁹ Kegok yankwesime imbi keyan pigok dunduye, “Israel ammak Samalia am nin zapat zenâ zenâ kwep ku mamnup. Yan gej eneyet koti tuyet nâgât tatnayankwesinik?”

¹⁰ Zeme Zisasiyan pigok dunduye, “Kawawananj gej kwileki nen taolet gasât tapm ma nen an tuyet tadingoyap nâgât yanj nânâpij keyepmti tapminik âk nâmti ze nayankwesimane nen tu zikatnan kwapej matazin keyetnan gama nimbek.”

¹¹ Zeme Samalia imbi keyan pigok zeye, “Amobotnan tu kapi pusak bejan penan baen mambemtimkwatnup. Âpme gej tu oo menzimdi nen ku tagain ke gej tu zikatnanmak e deset tazinan omti nasenik? ¹² Ningat sokj Zekop egan tu pusak teman kapi timpeye. Mti iknan ma nemunan ma sipsip ma makaunane eknenan tu kwep kapi manimzulutemien. Âpme gej Zekop ek sebempemti naman tu dolaknan penan nen zikatnanmak makozin ke desetgatnan aikndasâgât tazenik?”

¹³ Samalia imbi keyan kekok zeme Zisasiyan kapigok dunduye, “In tu kapi ometnimti ewe tuyet mti mene mene mamekotomnip. ¹⁴ Âpme nâlen tu tazeyap ke am nen sama nimbe beme egan tuyet nen ewe ku atotoyelen. Nen tu sawap ke kenanen baen tu yeejan dolaknan zikatnanmak penan kwati telepgat tati mama aiksama mambe.”

¹⁵ Zeme Samalia imbi keyan pigok dunduye, “Amobotnan, gej tu tazenik ke namane nimti tuyet nen ewe atotopi nan mamambap. Mti tuyen pien mene mene mamekolap e alaknan nen ewe ku mekobap.”

¹⁶ Kegok zeme Zisasiyan pigok dunduye, “Gej meti apdimak wati kolit.”

¹⁷ Zeme imbi keyan zeye, “Nen apmpin; belak mamayap.”

Zeme Zisasiyan pigok zeye, “Gej, ‘Nen apmpin,’ e penan zenik.

¹⁸ Yangut gej an 5 eknenmak mamkwati asekindemkwabanan. Ya alak pi

ŋen wapmanik ke gitangāt apdi penāŋ yek keyepmti geŋ, ‘Apm yek,’ zet e penāŋ zenik.”

¹⁹Zeme imbi keyaŋ pigok dunduye, “Amobotnaŋŋ alagati neŋ gâgât yaŋaŋdi nâŋap. Geŋ Kawawaŋmagen golaŋ zenze an ŋen penāŋ. ²⁰Âpme geŋ nânik, ekŋen yeŋsokŋne ekŋenaŋ kalaŋ kapiyet dukŋan motati Kawawaŋgat mandundum samtemien. Âpme Zuda am ingulak Zelusalem mka teman ke tati Kawawaŋgat mandundum saip.”

²¹Zeme Zisasiyaŋ pigok zeye, “Imbi, neŋ pigok zema nâmbak, in kan ke penāŋ sokbeme kalaŋ kapiyet ma Zelusalem mkaen met ondekti Bien ku dundum sawep. ²²In keyet yaŋaŋ nânâpiŋ; belak ek masesewatsaip. Âpme Israel am ningut egat yaŋaŋ nâmâtâti maminup. Kawawaŋaŋ Zuda am ningat tuŋgupmnangātnaŋ an ŋen am yomengātnaŋ gilik ze ndatitiyet peme kokogat zenzeŋaŋ ²³kan kelak alak kapi sokbem tazin. Âpme egalen am manŋe penāŋ ekŋenaŋ keŋinaŋ penāŋ Emetagalen set esemteŋ penāŋ tazin keyet kataŋ mamti Bien dundum sawep. Bienaŋ am ekŋen kebongāt nâme dolakŋaŋ mambein. ²⁴Kawawaŋ ek an enzililiŋaŋ mamain keyepmti amnaŋ ek sesewatsasâgât mbep beme ekŋengalen sesewawalin ke keŋinan baenengātnaŋ kwapme mama mimiŋin esemteŋ penāŋ kemak tati sesewatsawep.”

²⁵Zeme imbiyaŋ pigok dunduye, “Mesaya ma kwitnaŋ ŋen Gilik zeleset Kilais makuip egaŋ sokbemti kwitnaŋ kwitnaŋ sambe keyet yaŋaŋ zemkawaŋ bemndandayet zenzeŋaŋ e neŋ nâŋap.”

²⁶Âpme Zisasiyaŋ pigok dunduye, “An e sokbembeyet zenzeŋaŋ elak neŋ kapi tati zet tadingoyapmak.”

²⁷Kegok tazeme zemelak nin nembaŋane ilak meu kwitim timti koti ekmann Zisasiyaŋ Samalia imbi kemak zapat tapmme ekti nâmtemtem mbien. Mti imbiyet, “Geŋ pi kwileki tapmnik?” ma Zisasiyet Samalia imbiyet, “Zet kwileki tadundumann?” mee ke idayaŋkwesisâgât mbennaŋgut nâmann ŋep ku beme belak pemann tage.

²⁸Âpme imbi piwan tu menzimaŋ mee piwan peme weme belak windembemti mkaen meti am pigok diindoye, ²⁹“In kopme neŋ Zuda an ŋen kotazingat met zikat indama egit. An keyaŋ nâlen yomm sambe bepi sosok zemkawaŋ bem namâlep. An ke Kilais sokbembeyet zenzeŋaŋ wa ke mene?”

³⁰⁻³¹Zeme nâmti am bee ilinsakwep Zisasmagen kosât ewe selen takopme kan keyet nembaŋane nin pigok zewenn, “An zikat indanda tu meu bugan niya!”

³²Âpme egaŋ ningat zeye, “Neŋ tu meu sepemaŋ ŋen tatnain e in kunâip.”

³³Kegok zeme nâmti nemba nin nnak pigok zenâmbenn, “Am pe kwiyaŋ meu mkot same niwaŋ?”

³⁴Tazemann ndikti pigok dinndoye, “Neŋ Bienaŋ mulupmaŋ mimiyeŋ zemneme toban keyepmti egalen mulupmaŋ mdelaŋ zesap keyaŋ tu

meunok penañ bein. ³⁵In pigok manzeip, ‘Meu muluwen ondemann kwati eyonga zulak zulak beme meu penañ masokbein.’ Yanggut neñ pigok diindoma nâit, in teñ zemwati mulup egit muluwen meu penañ sokbembe temañ ilak alak kapi sokbein. ³⁶Âpme an ñenañ mulup mti keñanen mapein kemak am nusi mti penañañ maakumtin. Egelan ilisakwep muluwit keyet tosañañ timti oloñen temañ mbalup. Sepem kegogak an nâmkijpepemak ñenañ an ñen Kawawangalen Zet Zapat Dolakñañ dunduye. Âpme naman ñenañ mukulem mme yomengatnan keñan gilik zemti kululuñen mobotgat zapat bemti main keyepmti an zut keyañ muluwidangat tosañañ ilizuzut timti oloñen ilisakwep mbalup. ³⁷Âpme nin set kapigok maminup: An ñenañ mulupmañ mti maondein. Âpme an ñenañ mukulem mti nusi kayak mti penañañ timti time manje kwep mamozin. ³⁸Âpme neñ in nâlen muluwen meti mulup nembanne indamukulem mti ekñenmak ilinsakwep meu penañ akum time temakwep mobogat nâmti zemindeyapgat melit.”

³⁹Tazeme Samalia imbi piwan meti animbi sambe ekñen pigok diindoye, “Neñ yom kwitnañ kwitnañ mkwaban piwan egañ zemkawañ bemti namâpme delañ zep.” Zet kegok zeme nâmti am sambeyañ ek nâmkijpewien. ⁴⁰Keyepmti Samalia am ekñenañ Zisasmagen koti ekñenmak mamayet yañkwesime Zisasiyañ nâme ñep beme nin meti ekñengalen mkaen kasup zuletañ nsakwep mambenn.

⁴¹Ke met mamti zet zapatnañ diindome am sambe penañañ ewe tusumti Zisasiyet nâmkijpewien. ⁴²Mti imbi Zisas ñeñañ met aige ek ke pigok dunduwien, “Nin ñeñañ geñ zet zeman nânnañ pi ilak nin penañ dembusekñanen zetnañ penañ nâmti nâmkijpenup. An kapi penañ Kilais msat sambe am nin pi yomengatnan gilik zemti ndatiwe.”

Zisasiyañ gapmangalen amobotnañ ñengat nembañañ ñen zawalen tapme mme alik beye

⁴³Âpme Zisas nembañane nin kasup zut pi Samalia am ekñenmak ke maneti naman gilik zemti Galili msalen mebenn. ⁴⁴Mesât mepmambe Zisasiyañ ikñañ pigok zeye, “Golañ zenze an ñen ikñangalen mkañañ ñotakñanen ke tapme ikñangalen manje ñeneyañ zetnañ gawepumti egat nâme mobotnañ ku mambein.” ⁴⁵Âpme Zisasmak nembañane nin meti Galili msalen patañ zemann Galili msalen animbi ekñenañ oloñen mti ndazemtetime mkaen mobenn. Nin Anggalalañ Kendoyet Zelusalem mka teman baen met mamti ekmann Zisasiyañ menok notnañ mme ekbenn keyepmti Zisas ekti ndazemtetime mobenn.

⁴⁶Ke nin moti keyetnan mane mane naman Kana mka msalen tu zeme wain beye mka keyegak met patañ zewenn. Âpme Kapaneam mka keyet gapmangalen amobotnañ ñen manje egat nemuñañ zawat nukñañ penañ mti mawemtan. ⁴⁷Âpme Zisasmak nin Zudia msalengatnan ewe Galili

msalen kopmann zeme nâmti amobotnaŋ piwan Kana mka msalen meti nembraŋ gakisât penaŋ tapmme koge keyepmti Zisasi wati mebegat yaŋkwesim nânge. ⁴⁸Âpme Zisasiyaŋ pigok dunduye, “In kapi neŋ menok ma kwitnaŋ kwitnaŋ zikalinan mamananaj sokbeme ekti zetn nâmkîŋpesât maâip.”

⁴⁹Zeme amobotnaŋ keyaŋ pigok zeye, “Amobotnaŋ Zisasi, nemban gakisemmagat kopmane sakwep medi.”

⁵⁰Zeme Zisasiyaŋ pigok zeye, “Nemundi ilak alik beingat ŋepgat gitak met!” Zeme amobotnaŋ keyaŋ Zisasiyet zetnaŋ nâmkîŋpemti mege.

⁵¹Selen tapmepme sisiliŋ nembraŋane ekŋenaŋ ek aiksâgât selen metaikti pigok dunduwien, “Nemundi alik bep.”

⁵²Zeme egaŋ indayaŋkwesiye, “Kan zuknaŋ penaŋ alik bep?”

Zeme ekŋenaŋ zewien, “Saŋenen kasup sutnaŋ teman penaŋ tapme kan keyet zawatnaŋ yek bep.” ⁵³Kegok zeme amobotnaŋ keyaŋ yaŋaŋ pigok nâmâtâge. Kan keyet penaŋ Amobotnaŋ Zisasiyaŋ zemnemti pigok zep, “Nemundi ilak alik bep.” Ke nâmti mam ip don notnane zemâtâtindame nâmti ilinsakwep Zisasiyet nâmkîŋpewien.

⁵⁴Zisasiyaŋ Zudia msalengatnan Galili msalen sek zut meti menok ke mme sek zulak beye.

Zisasiyaŋ an ŋen Betesda tu lemunan weyaŋpeye

5 ¹Ke manepeme Zuda am ekŋengalen kendo temaŋ ŋen beme Zisasiyaŋ Zelusalem mka teman mege. ²Âpme Zelusalem mka temaŋ keyet keŋan tu lemunan temanik ŋen sipsip set tokwakwat manzemtemien keyet solonan matatan. Âpme tu lemunan keyet nembet nembet mka mzalaŋ 5 walapeme matatan. Ma Zuda ekŋengalen zelinaset tu keyet kwitnaŋ Betesda makumtemien. ³Âpme mzalaŋ keyet keŋanen am zawatmak ma am zikalin beŋaŋ ma am setnaŋ wesîŋ ma selin belin wesîŋ bembraŋ sambeyaŋ ke wemti tu titok mme ekti towewegat damuŋ matatemien. ⁴Ke tatnepeme kan notnaŋgat tu lemunan keyet palen Kawawaŋgalen enselaŋ kululuŋengatnaŋ ŋenaŋ tot titok mme ekti an kwiyaŋ ŋeŋaŋ penaŋ mapalamti totan egaŋ sakwep seknaŋ dolaknaŋ mambemtan. ⁵Âpme an ŋen setnaŋ betnaŋ wesîŋ yaŋ kan teepmaŋ nup kan 38 pi notnaŋ ekŋenaŋ windeŋaŋ bemti towepme egaŋ olapme beme belak ke kwesiŋ matatan. ⁶Âpme Zisasiyaŋ an ke kan teepmaŋ penaŋ matatan ke ekti kemberŋ penaŋ mti yaŋkwesiye, “Geŋ dolaknaŋ bembeyet nânîk ma yek?”

⁷Zeme an wesîŋ keyaŋ zeye, “Amobotnaŋ, an notn dolaknaŋ penaŋ kwiyaŋ tu titok mme sakwep nambepeme tu keŋan towebak? Nen towesât ewe wati tiktik takuma an ŋenalak sakwep palam tu lemunan toti ilak alik mambein.”

⁸Zeme Zisasiyaŋ pigok dunduye, “Geŋ sindi ambepolet timti met.”

⁹Zeme keyegak an keyaŋ wawadak Zisasiyet nânâpiŋ belak sinaŋ

ambepeleti mkanan mesât mege kasup keyegak Sabat tagonjo kan tapmambien. ¹⁰Keyepmti Zuda amobotnaŋ notnaŋ ekŋenaŋ an dolaknaŋ beye ke selen aikti egat pigok dunduwien, “Alak Sabat tagonjo kan sutnan milawadi ambepeleti wati kodik ke set dolaknaŋ penaŋ yek.”

¹¹Zeme egaŋ pigok diindoye, “An weyaŋnep egaŋ pigok dinop, ‘Geŋ wati sindi ambepelet timti met.’ ”

¹²Zeme nâmti an keyet pigok yaŋkwesiwien, “An wati sindi ambepelet met diŋgop an ke geŋ kwitnaŋ nâmtadik?”

¹³Yaŋkwesime an sekŋaŋ weyayaŋaŋ keyaŋ Zisas daŋan ku nâmâtâge. E eneyet am sambe penaŋ tabien keyepmti Zisasiyaŋ sakwep am tungupmaset enzilimege.

¹⁴Yaŋ ke maneti Zisasiyaŋ an ke sesewat mka temanen tapme aikti aŋkeŋoo zet pigok dunduye, “Geŋ sekdi ilak dolaknaŋ bep. Keyet geŋ bekaŋaŋ ŋen mbanikmagat eksemti mamambanik. Mineti nan nukŋaŋ temaŋ penaŋ ŋen dukdan mobeyet.”

¹⁵Zeme an piwan Zisas weyaŋ ekmâtâti met Zuda amobotnaŋ pigok diindoye, “An weyaŋnewan kwitnaŋ Zisas.” ¹⁶Zisasiyaŋ Sabat tagonjo kan sutnan penaŋ an ke weyaŋpeye keyepmti Zuda amobotnaŋ ekŋenaŋ Zisasiyet nâme ŋep ku beme kan keyet yaŋbemti Zisas kume gakikiyet zetnaŋ mbien. ¹⁷Ŋenzinziŋ mme Zisasiyaŋ pigok diindoye, “Bienaŋ am tagonjoŋepiŋ indamukulem mammin âpme neŋ sepem kegogak mamiyaŋ.”

¹⁸Âpme Zuda an ŋenaŋ ekŋenaŋ Zisasiyaŋ an ŋen Sabat tagonjo kan sutnan weyaŋpeye keyet ma Kawawaŋgat nâgât Bipm penaŋ nit mulup tagonjoŋepiŋ mamilup zeye keyepmti ŋeŋin penaŋ zime kume gakikiyet zewien.

Kawawaŋaŋ Zisas mulup sambe mimiyelen winde betnan beye

¹⁹Âpme Zisasiyaŋ zet pigok diindoye, “Neŋ penaŋ sukwep pigok zema nâit: Neŋ Kawawaŋgat Nemunaŋ neŋ keŋnangalak mulup ku mamiap. Neŋ Bienaŋ mulup mme ekti keyegak mamiap. ²⁰Âpme Bienaŋ Nemunaŋ neŋ ke manigoin keyet mti mulup mamiap katan egaŋ weyaŋ zikat name mamiap. Yaŋ mulup mma maegip ke etaŋ yek. Temaŋ penaŋ ewe zikat name mma in ekti nâmtemtem penaŋ mbep. ²¹Bienaŋ am gakikiengatnan mme mawalip. Keyepmti Nemunaŋ neŋ kegogak an ŋen gakikiengatnan mma wasât mbawen ŋep mma wabep. ²²Âpme Bienaŋ ikaŋaŋ am mama titiyet ma walelet keyet zelin ku zemdeleŋ zewe. Mulup ke Bienaŋ nâgât betnnan etaŋ beme deleŋ zeye. ²³Keyepmti amnaŋ Bipmnaŋgat kwizet buŋamaŋ mamwalip sepem kegogak Nemunaŋ nâgât kwizet buŋamm mwabep. An ŋenaŋ nâgât kwizet buŋamm ku mwabe beme egaŋ Bipm zemneme koban an keyet kwizet buŋamaŋ kegogak ku mwabe.

²⁴Neŋ penaŋ zema nâit: An ŋenaŋ nâlen zet kapi nâmti An zemneme toban ek nâmkipewe beme an keyaŋ walelet ku aikbe. Egaŋ msalen

kapiyegak gakiki ma yom dopman titi set e pemti mama kanzizit elak tiyeyan mamain. ²⁵Nej zet penaŋ pigok diindoma nâit: Kan alak tatnuwen kapiyet keyepmti am mama mimi bekanangalen seleset mâti mamaip ekŋenaŋ nej Kawawaŋgat Nemunaŋ nâlen zet nâmti nâmkîŋpewep beme naman mama kanzizit aikbep. ²⁶Bien ek mama keyet ŋotekŋaŋ âpme Nemunaŋ nej kegogak mamayet ŋotekŋaŋ bembeyet Bienaŋ nâmnenge. ²⁷Nej Angat Nemunaŋ keyepmti Kawawaŋ Bipmnaŋ amgat zet zemdelan zenze mulup ke mimiyet zemdelan zemnenge. ²⁸In nej zet zeyap keyet nâme setnaŋ ku mimiyelenok ku besem. Kan ŋen besâpmnen am zaimen am tawep ekŋenaŋ kwizetn nâmti wapmâpme delaŋ zewe. ²⁹Âpme am mama mimiŋin dolakŋaŋ mti mambien ekŋenaŋ mama kanzizit titiyet oloŋen palen wapmâbep. Âpme am mama mimiŋin bekanan ekŋenaŋ yominangat dopman timti teziŋ ŋandaŋ towesât bembesipeŋ wapmâbep.

Kawawaŋgat Nemunaŋgat yaŋaŋ mamsokbein

³⁰Nej nanangat keŋŋnangalak mulup ke ku mamiyap. Bipmnaŋgalen zet keyet katnaŋ am mama mimiŋinangat kataŋ zet muluwen indemti dopman esemtaŋak mutumindawap. Ke wa nenangalen zet yek An zemneme koban egalen zet gawepumti mbap.

³¹Nej nanangat yaŋŋ nenak zema in nâme penaŋ ku mambein. ³²Nâgât yaŋŋ Bipm Kawawaŋgat manzemkawaŋ bemnein keyaŋ penaŋ bein. ³³In Zân an tu zululut an ekmagen yaŋkwesime egaŋ zet penaŋ ŋotekŋaŋ ilak ke zemkawaŋ bemindame nâmbien kemak. ³⁴Wa Zânaŋ nâgât yaŋŋ zemkawaŋ bemindaye ke nâgât kwizet buŋamm temaŋ bembeyet nâmti yek. In nâgât yaŋŋ nâmtâtâti neŋmagen keŋ gilik zenze aikti mama kanzizitgalen set ke mâti mebegat diindoye. ³⁵Zân an tu zulutindende egaŋ lam temaŋnok bemti in mbusatnaŋ bemindeme sokŋan in kan isikŋaŋ bugan ke ekti belak etaŋ egowien. ³⁶Âpme nâgât yaŋŋ bee Bienaŋ ikŋaŋ manzemkawaŋbein. Ek ke wan Zân keboŋ yek. Ek windeŋaŋ sepemaŋ igak penaŋ. Egaŋ nej mulupm ke mimiyet zemneme koban. Mulup ke mima mulup keyaŋ nej Kawawaŋ ikŋaŋgat Nemunaŋ e sosok mamimsokbemnein. ³⁷⁻³⁸Bienaŋ nâgât yaŋŋ in ilak zemkawaŋ bemindame nâmnembien. In ekmak dopman ek dopman ek ku mamip ma egaŋ indik tati zet ikŋaŋ esemteŋ penaŋ diindome ku manâip. Âpme in naman nej egaŋ zemneme koti egalen zet manzemkawaŋ beyap mee pi ku manâmkîŋpemneip. ³⁹In Kawawaŋgalen Zet Itnaŋaŋen zet kapigok tazin ke maiŋti yaŋaŋ maomkakalimti nâip. Zet keyet keŋan mama kanzizit aiksenuŋ zematimaliwaŋ zet keyaŋ nâgât yaŋŋ manzemâtâtindainen mama kanzizit neŋmagen titiyelen. ⁴⁰Âpme in neŋmak tusum mamti mama kanzizit titiyelen e ewe wisalagak mamip. ⁴¹Âpme wa nej amnaŋ sekŋ mmobotgat am tuŋgupman belak motati ku manzeyap. ⁴²Nengut ingat yaŋaŋin elak nâma delaŋ zein. In

kenjinan Kawawaŋ gogot penaŋ ku mampeip. ⁴³Neŋ Bienaŋ iŋŋaŋgat munduman zemneme toban keyaŋgut in neŋ ku nâmkîŋpemneip. Âpme an ŋenaŋ igak nânâŋjak koti neŋ an keboŋ keboŋ zemengut in an ke sakwep manâmkîŋpeip. ⁴⁴Mti ilinak notnaŋaŋ notnaŋgat kwizet buŋamaŋ mwat notnaŋaŋ notnaŋgat kwizet buŋamaŋ mwat mmamti keyet nâme dolakŋaŋ mambein. Keboŋ ke ingat kwizet buŋamin zigok mwabe? Naman in zigoset nâgât nâmkîŋpemnewep? ⁴⁵In nâgât pigok ku nâseip egaŋ Bipmaŋmagen meti nin zemndowe neŋ egok ŋep ku mbap. In Mosesimagen mawetekummaip keyepmti Mosesiyaŋ Bipmagen zemindowe. ⁴⁶Egaŋ zet kuye ke nâgât kuye. Yaŋ in Mosesiyelen zet penaŋ nâmkîŋpewiek ze elak nâgât nâmkîŋpenewiek. ⁴⁷In Mosesiyaŋ zet kuye ke ku nâmkîŋpewien keyepmti naman neŋ zet manzeyap, kapi zigoset nâmkîŋpewiek?”

Zisasiyaŋ an 5000 bepi tu meu indame nimbien

(Matiyu 14:13-21; Mak 6:30-44; Luk 9:10-17)

6 ¹Zisasiyaŋ zet kekok zeme delaŋ zeme Galili tundua kwitnaŋ ŋen Taibilias manzemtemien tundua ke somti nembet daeset mebenn. ²Mepmann animbi sambe ekŋenaŋ Zisasiyaŋ animbi zawatmak ma wesin mee pi taweyaŋindeme ekmambiengapmti keyegak ndamâti mebien. ³Âpme Zisasmak nin nembet moti ndatimti kalaŋ dukŋan gwaenen moti totapmambenn. ⁴Kan keyet Zuda am ekŋengalen Aŋgalaŋ Kendo sokŋan beye.

⁵Âpme Zisasiyaŋ am manŋe temaŋ penaŋ kwaweti weme indikti egaŋ Pilip pigok yaŋkwesiye, “Pilip, am manŋe temaŋ penaŋ kapi nupmamaŋ desetgat penaŋ kwitimti am sambe kapi indamann nseip?” ⁶(Zisasiyaŋ, “Kwitnaŋ kwitnaŋ zigok msap e nâmtati,” Pilipgat belak tetipem ege.)

⁷Âpme Piliwaŋ wa penaŋ penaŋ zep mene zemti pigok zeye, “Nin mânep 200 Kina bukapiyaŋ meu kwitimti am manŋe temaŋ bekapi indamann isiksik bugan munzuti nseip mene.”

⁸Zeme Zisasiyet nembraŋaŋ ŋen Endulu Saimon Pitayet datnaŋ egaŋ Zisasiyet pigok dunduye, ⁹“Zisas, anemba ŋenaŋ nupmamaŋaŋ 5 ma aŋgalaŋaŋ zut etaŋ eleŋan weti tapme ekti aikolap. Âpme am sambe kamendepmaŋ bekaboŋ bekapi bukapi zigok munzutindamann ŋep benak?”

¹⁰Zeme nâmti Zisasiyaŋ ningat pigok dinndoye, “In am ekŋen zemindeme sutnakwep totalit.” Zeme nin am zemindemann kwaŋ sinaŋ yati gwilelaŋ totabien an 5000. Âpme imbimak nembamak ekŋen ku indamakukuŋaŋ. ¹¹Zisasiyaŋ nupmamaŋ ke mti Kawawaŋgat wisikŋ zemti mutumti am tapmebienen indaye. Mti aŋgala sepem kegogak meselemti am kalaŋti indamepme nimâbien. ¹²Meu nimkiŋgapme temepme Zisasiyaŋ ningat pigok dinndoye, “Nime meu butnaŋ

totemelep e belak wemti walesemmagengat akume manje kwep molak.”

¹³Âpme nin nupmamanj 5 etanj bukapiwan Zisasiyanj mme sambe beme nimwianjme butnanj temege. Pi timti tise 12 kapi wepme gak zeye.

¹⁴Âpme am ekjenanj Zisasiyanj menok ke mme ekti pigok zewien, “Kawawanjagen golanj zenze an temanj msalen pi sokbembeyet zenzenanj kelak an iknanj kapimak!” ¹⁵Zemti Zisas atamti amobotnanjin onzempesâgât tazenâme eganj wak kambu nâmti nâme njep kumbeme igak buzak kalanan mowege.

Zisasiyanj tundua paleset mege
(*Matiyu 14:22-33; Mak 6:45-52*)

¹⁶⁻¹⁷Msat ilak gasi penanj beme nembanjane nin nnak tundua ganzenan toti wanja njen mti Kapaneam mka msalen daen mesât nâmti towebenn. Towepmann msat tambuyeyepmtilak Zisas ke tapme nnak wanja njen mti mebenn. ¹⁸Tapmepmann tâgâ omba penanj kumbume tundua mamanj omba penanj takume ekmambe tapmepmambenn. ¹⁹Nin wangaen moti ilak berjan daen tu sutnan^b kekok tapmepmann Zisasiyanj kalanangatnan toti nembu paleset ninmagen sokjanik tapmepme nin ekti, “Wa! we eknup,” zemti kingabenn.

²⁰Kegok mmann ndikti kwizet kumti zeye, “Nen takolapgat in ku kingalit.” ²¹Zemti met patanj zeme nin betnamann wangaen molak zem tapminepeme wangayanj ilak msat mesât nâmti mebiennen ke met sakwep metage.

Am ekjenanj Zisasiyet timabien

²²Animbi sambe ekjenanj tundua nembet daen tatnepeme msat msame zewien, “Sajen tambuyet wanja kwewetanj tapme ekmenn elak Zisaspij nembanjanejanj etanj moti mepme indikmen.” ²³Kegok zemti tatnepeme wanja notnanj Taibilias mkaesetgatnan Amobotnanj Zisasiyanj Bipmangat wisikij zeme tu meu sambe sokbeme amnanj nimwianjbien keeset kot patanj zemâbien. ²⁴Âpme am ekjenanj Zisas ma nin ndatimati naman wanja keyet moti Kapaneam mka msalen meti tokwat ndatimabien.

²⁵Timat meti met ndaaikti Zisasiyet zewien, “An zikat indanda, genj zuknan tu nembet daengatan kopmanan?”

²⁶Yanjkwesime zet kapigok diindoye, “Nen zet penanj sukwep zema nâit: Nen menok winderanjbenj inmagen mamiyap keyet nâmkijpennemti ku kolo yek. In meu sambe penanj aikindama nimti ekmien keyepmti nâgât tatokwatnatimalip. ²⁷In kwitnanj kwitnanj walebe keyet mulupmanj ku mbep. Mama katiknanj keyelen meu keyet mulupmanj weyanj mbep. Mama katiknanjgalen meu ke Angat Nemujanjanj nenj indandayet Kawawanjanj iknanj nâmneme njep beme zemdelanj zemnenje.”

^b 6:19 mael tuk ma zulak zulak

²⁸ Zeme zet dopmaŋ pigok gilik zemti sawien, “Nin mulup pe zibonj ke mmann Kawawaŋaŋ ningat nâme dolakŋaŋ bewe.”

²⁹ Yaŋkwesime pigok diindoye, “An Kawawaŋaŋ zempeme koge ke nâmkijpewep keyaŋ muluwin ɲotekŋaŋ penaŋ bein.”

³⁰ Zeme ekjenaŋ zet pigok dunduwien, “Geŋ pe menok zibonj penaŋ mmane ekti nâmkijpewegewanup? Ma geŋ pe mulup zibonj penaŋ mbanigat tazenik? ³¹ Nin yeŋsokŋne ekjenaŋ msat tunggupman meu piŋan mamti meuŋin kululuŋengatnaŋ topme nimti mambien. Keyet Kawawaŋgalen Zet Itnaŋanen pigok meluwaŋ mamaiŋ nânup, ‘Kawawaŋaŋ meu kululuŋengatnaŋ aikindame manimtemien.’ ”

³² Âpme Zisasiyaŋ pigok diindoye, “Neŋ zet penaŋ diindoma nâit: Moses egaŋ meu kululuŋengatnaŋ penaŋ ke ku indaye. Mosesiyaŋ Bien Kawawaŋgat dundume Bienaŋ kululuŋengatnaŋ meu ke belak sekŋin etaŋ bandim mimiyet maindamkwatan. Âpme alak meu penaŋ ke Kawawaŋaŋ iŋkaŋ am indapmukulem penaŋ mimiyet nâmti kululuŋengatnaŋ peme toti alak ingat tunguwinan kapi tazin. ³³ Meu kululuŋengatnaŋaŋ toti am mama maaikindain ke Kawawaŋmagen meu penaŋ elak kapi tazin.”

³⁴ Zeme ekjenaŋ zewien, “Amobotnaŋ, geŋ meu zenik ke nin manndamambanik.”

³⁵ Zeme dopmaŋ pigok diindoye, “Mamayelen meu elak neŋ kapimak. Am ɲenaŋ neŋmagen wetekumti mambe beme egaŋ meuyet ku mbe. Ma am ɲenaŋ neŋ nâmkijpemnewe beme egaŋ kegogak tuyet ku atowe. ³⁶ Neŋ pigok diindoma nâit: in neŋ zikalinaŋ ke niktingut ewe ku manâmkijpemneip. ³⁷ Bienaŋ am nâmindeme neŋmagen makolip ekjen ke neŋ ɲep ku zemindema mebep. ³⁸ Neŋ kululuŋen gwaengatnaŋ toban e wa msalen kapi nanaŋgat nânânnaŋgat etaŋ mamayet ku toban. An zemneme toban egalen zet gawepumti keyet kataŋ mamayet toban. ³⁹ Bienaŋ am nâmdelaŋ zemti nâlen belen bemindeye. Ekjen ke maneti walelet aikbiekmagengapm neŋ indikdamuŋ dolakŋaŋ mti maneti bam kobawen ekjen ke ilindiŋ gakikiengatnaŋ mamaen mkwatindewap. An zemneme toban egalen nânâ ilak zeya kegok. ⁴⁰ Am neŋ nikmâtâti manâmkijpemneip ekjen bam gakikiengatnaŋ mwat indema mama kanzizit keyet toŋaŋ bewep. Biengalen nânâŋaŋ kegok penaŋ tazin.”

⁴¹ Zisasiyaŋ “Neŋ meu kululuŋengatnaŋ” zeye keyepmti Zuda am ekjenaŋ nâme bekaŋaŋ beme zet mmot mtot sambe penaŋ mbien.

⁴² Mti pigok zewien, “Zisas pi mamaŋ bipmaŋ Zosep ma Malia e nâmidenup. Âpme naman egaŋ zigoset neŋ kululuŋengatnaŋ kwatoban pi tazein?”

⁴³ Zemti ilinak zet ɲunuŋ ɲunuŋ tapmmepme Zisasiyaŋ indikti pigok diindoye, “In zet ɲunuŋ ɲunuŋ peme talak. ⁴⁴ Nâip, an ɲenaŋ iŋkaŋgat keŋaŋgalak neŋmagen kokot ke ɲep ku tazin. Bienaŋ an ke nâmpemeŋgut ɲep neŋmagen kokogalen. Âpme neŋ an neŋmagen kobe ke maneti bam

kokot kanaanen koti gakikiengatnan mwat pewap. ⁴⁵Golan zenze an egan Kawawaŋgalen Zet Itnananen pigok meluwaŋ mbien,

‘Kawawaŋan iŋaŋ am sambe iŋaŋgat yaŋaŋ zemkawaŋ bemindawe.’ (Aizaya 54:13)

Keyepmti an ŋenaŋ Biengalen zet ke nâmti keyet kataŋ mambe egan neŋmagen kobe. ⁴⁶An ŋenaŋ Bien sepemaŋ bugan ku ege yek penaŋ. Neŋ Kawawaŋmagengatnan toban neŋ etaŋ gulak nâmpayap. ⁴⁷Neŋ zet penaŋ pigok diindoma nâit: An ŋenaŋ neŋ nâmkipemnewe beme egan mama kanzizit tiwe. ⁴⁸Mamayelen meu e neŋ. ⁴⁹Yeŋsokŋine ekŋenaŋ msat tungupman mamti meunjin meu kululuŋengatnaŋ manimtemien yaŋgut gakimâpme delaŋ zeye. ⁵⁰Âpme meu kululuŋengatnan kwatoge ke an ŋenaŋ nimbe beme egan ŋep ku kakiwe. ⁵¹Mama keyelen meu kululuŋengatnan toge elak nen kapi. Keyepmti an ŋenaŋ meu kululuŋengatnan tototnaŋ ke nimbe beme ek mama kanzizit mameti mambe. Sesumban keyaŋ meunok bein ke msat sambe am indama nime keyaŋ mama kanzizit aikindaweyet indawap.”

⁵²Âpme Zuda am ekŋenaŋ ke nâmti ilinak ŋenzinziŋ mti zewien, “An kapiyaŋ zigoset iŋaŋgat sesumbanaŋ munzut ndame nin niniyet tazein?”

⁵³Tazenâme Zisasiyaŋ indikti pigok diindoye, “Neŋ penaŋ sukwep penaŋ pigok zema nâit: In nâgât sesumbann ma sipm ke ku nimbep beme in mama kanzizit ku tiwep. ⁵⁴An ŋenaŋ nâlen sip sesumbann nimbe beme egan mama kanzizitgat zapat bemti mame neŋ kobawen ek gakikiengatnan mima wabe. ⁵⁵Nâlen sip sesumbann ke tu meu nemboŋ penaŋ ⁵⁶keyepmti an ŋenaŋ nâgât sipm sesumbann ke nimbe beme egan neŋmak tusuwe. Âpme neŋ ekmak tususu dolakŋaŋ mti mambalup. ⁵⁷Bien Kawawaŋ ek mama toŋaŋ egan iŋaŋ zemneme toban. Neŋ ekmak mamayap keyepmti neŋ mama kanzizit timtalap. Kegogapm an ŋenaŋ neŋ natnimbe beme egan nâgât pembedaŋnnaŋgat mti mama kanzizit timti mamambe. ⁵⁸Meu kululuŋengatnan toge wa e yeŋsokŋineyaŋ msat tungupman mamti meu manimtemien sepem keboŋ yek. Ekŋenaŋ meu ke timti manimkwatemienangut gakim mâbien. Âpme an ŋenaŋ nâlen meu zeyap kapi nimbe beme egan gakikipiŋ kwesiŋ kwesiŋ mameti mambe.”

⁵⁹Zisasiyaŋ Kapaneam sesewat mkaen am Zet Zapat Dolakŋaŋ tazemzikat indametneti iŋaŋgat zet zapatnaŋ kapi zeye.

Am notnaŋaŋ Zisasiyet nâme wisat beme bamkumpemti mebien

⁶⁰Am notnaŋ ek mâti mamtemien ekŋenaŋ zetnaŋ ke nâmti pigok zewien, “Zet kapi pe zeme nâmann keŋŋ penaŋ ku bein. Zet keboŋ ke an kwiyaŋ ŋep apumti zenak?”

⁶¹Zemti wisat zet mme Zisasiyaŋ keŋinan baen indikmâtâti pigok diindoye, “In zet zeya keyet nâme keŋin penaŋ ku beme wisat mnemti mesât tatnâip! ⁶²Âpme in tati ekme Angat Nemuaŋ neŋ gilik zemti

naman mundumnan maneti tobanen keyegak mowepma in ke ekti pe zigok nâmbep? ⁶³Nin mambipmmagen masokbenup ke ekñenaj mama msat palen kapi mamayelen mme masokbenup keyanggulak Kawawangalen Emetak Teñaj mama alakñaj titiyelen keñnan mam mme sokbein. Keyepmti neñ zet zeya ke Kawawangalen zet in mama indandayelen ke diindoya. Âpme an ñenaj zet ke nâmkñipewe beme egañ Emetak Teñaj mama kanzizit ke same mamambe. ⁶⁴Âpme inmagen am notnañaj zet keyet nâme penañepiñ beme ku nâmkñipeyo.” (Zisasiyaj am zet zapatnañ dolakñaj kapi bamkumpewep ma maneti bam an zemkuwe e mee eweñanak indikmâtâpme mamamtemien keyepmti egañ zet kekok diindoye.) ⁶⁵Mti zet butnañ ñen pigok tusum zeye, “Neñ kegogapmti eweñaj pigok diindoya an ñen Bienaj keñaj mim elen beleñ bembepiñ mme egañ igak nânâñak nâlen ñep ku kobe.”

⁶⁶Zeme kan keyet am notnañ ekñen Zisas mâti mamamtemien ekñenaj ewe mâti mamayet wisat mti bamkumpemti mepmâbien.

⁶⁷Âpme Zisasiyaj nembrañane 12 nin pigok ndayanñkweziye, “In am notnañaj tapmelip kegogak nemti mesât tatnâip?”

⁶⁸Zeme Saimon Pitayan pigok zeye, “Amobotnañ, nin geñ gemti naman kwimagen mebanup? Mama katikñaj titiyelen zetnañ geñ etaj manzemâtâtndamane nânup. ⁶⁹Nin geñmak mamti pigok manânup geñ Kawawangat Nemunañ teñ penaj e nâmgemti manâmkñipemgenup.”

⁷⁰Zeme Zisasiyaj nin pigok dinndoye, “Neñ nempa in 12 kapi indatimamayap yangut ingat tunguwinangatnañ ñen Sadanmak mamain.” ⁷¹Egañ Zudas Saimongat nemunañ Iskaliot mkaengatan keyet nâmti zeye. Zudas ke nempa 12 ninmagangatnañ an ñen ilak ke. Yañ maneti an keyaj Zisas zemkuwe.

Zisasiyet meniñane ekñenaj ku nâmkñipewien

7 ¹Zelusalem mka teman Zuda amobotnañ mambien ekñenaj Zisas kume gakikiyet zeme nâme Zisasiyaj ilinangalen msalen Zudia ke mebepiñ Galili msalen mka isisikñaj sambe tokwati mulup mamtan. ²Âpme Zuda am ekñengalen mka mzalañ isikñaj walati Mzalañ Kendo keyet weweyelen ilak sokñan beye. ³Âpme Zisas ikñanggat meniñane ekñenaj koti pigok dunduwen, “Geñ Galili msalen pien mamti menok sepem igak igak maminik kegogak Zudia msadan gwaen meti mmane amdine ekñenaj gikbep. ⁴An ñenaj kwizet buñamañ temañ tisât nâmti mulup enzilimti ku mamin. Geñ mulup kekok msât yañbewanangat sosok sokbemti mulup mmane am msat sambe ekñenaj gikmâtâbep.” ⁵Meniñane ekñenaj Zisas nâmkñipepiñ mtopemti zet kekok zewien.

⁶Zeme Zisasiyaj pigok diindoye, “In Zelusalem mka teman moti mulup e ma e msâti kileñ belak mamolip. Âpme nengulak ke mobotgalen kan ewe ku beingapmti talap. ⁷Am ekñenaj in belak ekñengat kandañinan

zet nânân mame zigogat ekñenañ kasa mimindawep? Nenggulak ekñengat myungungunjin zemkawañ bemindama keyepmti neñ kasa kasa mamimnaip. ⁸In Kendoyet ñepgat ilinak Zelusalem mka teman mowelit. Âpme neñ ke mobogalen kan ewe ku beingapmti sakwep ku mosap.”
⁹Kegok zemti Galili mkaenak tage.

Zisasiyañ Mzalañ Kendoyet Zelusalem mkaen mege

¹⁰Tapme ekñenañ pemti mepme egañ igak bam meti am keñan buzak buzak tatokwapmañge. ¹¹Âpme Kendo beme Zuda amobotnañ ekñenañ am indayañkwesimti zewien, “Zisas ek de tazin zenâit?”

¹²Indayañkwesime am sambe ekñenañ egat zapatnañ omba mezem kozem mme palakñañ beye. Mme am notnañ zewien, “An ke an dolakñañ.”

Âpme notnañ naman pigok zewien, “Yek, an ke am keñin mme mayungumtemezin.” ¹³Amnañ Zuda amobotnañ ekñengat kiñgati zet sosok sosok ku zewien.

¹⁴Âpme Kendo tapmetnepeme sutnateman bemeñgut Zisasiyañ sesewat mka temanen moti am Kawawañgalen Zet Itnañan zemzikat indame ¹⁵Zuda amobotnañ ekñenañ nâmtemtem temañ mti zewien, “An kapi ningalen zii zet zikat indanda anne ekñengat kandañinan ku mañgeyañ egañ zigok mti Kawawañgalen Zet Itnañanğalen yañañ kapi dolakñañ penañ tazemâtâzin?”

¹⁶Zeme Zisasiyañ pigok diindoye, “Neñ Kawawañgalen Zet Itnañan diindoyap kapi wan nanañgat keñnanağalak yek. An zemneme koban ekmagengatnañ timti tazeyap. ¹⁷Âpme an ñenañ zet kapi Kawawañmagengatnañ ma nenmagengatnañ nâsât mbem beme egañ elen beleñ bemti Kawawañgalen zet ke gawepumti neñmagengatnañ ke ñep nâmtâbe. ¹⁸An ñenañ ikañgat etañ nâmti mulup mbe beme egañ belak ikañgat kwizet buñamañ etañ mwabe. Mme neñ An zemneme toban egat kwizet buñamañ mwasât toban wa neñ zet ke dâsuki ku manzeyap. Zet penañ penañak zemti kwizet buñamañ mamwapeyap. ¹⁹Mosesiyañ zii zet mtotindaye ke inmagengatnañ an ñenañ ke ñeselak penañ gawepume delañ penañ ku manzein. Âpme in naman neñ zii zet ku mañgawepuyap zemnome gakikiyet pi manzeip?”

²⁰Zeme am sambeyañ pigok zewien, “Geñ kwiyañ gosât manzein? Geñ penañ keñdanen we bekanañañ totapme zet kileñ kileñ tazenik.”

²¹Zeme Zisasiyañ pigok diindoye, “Neñ Sabat tagoñgo kanen menok temañ kwep mma ekbien keyepmti in nikti nâmtemtem omba penañ mamimneip. ²²Neñ pigok diindoma nâit, Mosesiyañ in nemuñine seknin butnañ antim indendeyet zemindeme mamip yañgut ke Mosesiyañ ikañ set ke ku yañbeye; ingat yeñsokñine ekñenañ yañbewien. Yañ mulup ke mamkwatne kwatnelak alak pilak nempa sokbembenjin mâti Sabat

tagonŋo kanen eyo mamip. ²³In Mosesiyelen zii zet ke gawepumti Sabat tagonŋo kanen eyo nemuŋine sekŋin butnaŋ maantip. Âpme neŋ an wesin ŋen Sabat tagonŋo kanen sekŋaŋ mma dolakŋaŋ penanŋ beye keyet naman kwilekiyet nâgât ŋenzinziŋ mbien? ²⁴In zet nâmâtâtâpiŋ belak kileŋ ku manzemambep. In weyaŋ nâgât yaŋŋ nâmâtâtalit. Neŋ Kawawaŋgalen nânân dolakŋaset kwitnaŋ kwitnaŋ penanŋak manzemti mamiap.”

Zisas ek penanŋ Kilais Kawawaŋmagengatnaŋ toge zemti zem usulabien

²⁵Âpme Zelusalem mka mtoŋ notnaŋ ekŋenaŋ pigok zewien, “An damuŋ ekŋenaŋ an kusât manzeiwan an ikŋaŋ kapi manze egit. ²⁶Egaŋ zet sosok penanŋ am sutnan penanŋ kapi tazeme amobotnaŋne ekŋenaŋ ekti eneyet ku zemkulumpeip? Ekŋenaŋ ek ilak Kilais e sosok ekti keyepmti belak nâmpeme tati tazein mene? ²⁷Nin an kapiyelen mkaŋaŋ ŋotekŋaŋ ŋep nânup. Âpme Kilais kobe ek nin yaŋaŋaŋ ma mkaŋaŋ mee ŋep ku nâmpewanup.”

²⁸Zisasiyaŋ Zelusalem sesewat mka teman ke tati am ikŋaŋgat yaŋaŋ diindomambe nâme kegok zeme nâmti bim ŋandeŋaŋ mwati pigok diindoye, “In nâgât yaŋŋ penanŋ zigaset koban ke ku nâmâtâtaliŋ. Neŋ nenak keŋŋ naŋgalak ku toban. An zet penanŋ penanŋak manzein An keyaŋ zemneme toban nâip. Âpme in An ek ku nâmâtâpeip. ²⁹Neŋ ikŋaŋmak manepema zemneme toban keyepmti neŋ egat nâmâtâpeyaŋ.”

³⁰Kegok zeme ŋeŋin zime wati mka katiŋan met pesât nâmbien yaŋgut Kawawaŋaŋ egat kanaŋ beye e ewe ku koge keyepmti atatayet belin nukŋaŋ beme peme tage. ³¹Âpme am notnaŋ sambe tabien ekŋenaŋ Zisas nâmkinpemti pigok zewien, “Kilais egaŋ koti menok sepem igak penanŋ mbe zenzenaŋ elak an kapiyaŋ set kwitnaŋ kwitnaŋ sambe bee mme delaŋ tazein.”

Zisasiyaŋ Bipmaŋgalen gilik zemti mosât zeme ekŋenaŋ kadatbien

³²Am ekŋenaŋ zet kusuŋ kasak tapmme Palisi ekŋenaŋ nâmti met sâpe sâpe bumbu an ŋeŋaŋ ekŋenmak zenâmti sesewat mka temaŋgalen antipdakutun zemindeme Zisas wati met mka katikŋan pesât mebien.

³³Âpme Zisasiyaŋ pigok diindoye, “Neŋ kan isikŋaŋ bugan kapi inmak maneti bam gilik zemti naman An zemneme koban ekmagen mowebap.

³⁴Âpme in neŋ natimabep yaŋgut ŋep ku naikbep. Neŋ met mambawen ke in ku kobep.”

³⁵Kegok zeme Zuda amobotnaŋ ekŋenaŋ pigok zemti ilinak zenâ zenâ mbien, “An kapi pe deset buzak penanŋ mepme nin timabanupgat tazein? Ma ek pe Glik msalen Zuda am notnane ekŋenmagen met enzilim mamti ikŋaŋgat yaŋaŋ dâsuki ke Glik am diindosâgât mene nâmti pigok tazein? ³⁶‘In natimati ŋep ku naikbep ma mebaŋ ke in ku kobep,’ zet keboŋ ke yaŋaŋ penanŋ zigogat nâmti tazein?”

Zisasiyaŋ Emetak Teŋgat yaŋaŋ zeye

³⁷Zuda am ekŋenaŋ Mzalaŋ Kendo ilak tat delaŋ zesât mme sâpe sâpe bumbu an ekŋenaŋ mawaŋ kokogat dundusât towepme Zisasiyaŋ tunguwinan watati zet memendepmaŋmak pigok zeye, “Am ŋen tuyet maatoin beme egaŋ nenmagen koti tu nimbe. ³⁸Kawawaŋgalen Zet Itnaŋanen tu ke Emetak Teŋgat nâmti zet zemak zemak mimiŋaŋ keyet yaŋaŋ kapigok, ‘An ŋenaŋ neŋ nâmkîŋpemnewe beme egat keŋanen tu am mama maaikindain keyaŋ an keyet keŋanen zikatnaŋmaknok kwati kwesiŋ matapmambe.’ ” ³⁹Zet kegok tazin keyepmti am Zisas nâmkîŋpewien ekŋengat Zisasiyaŋ pigok zetik mimindaye, “In kapi tapme neŋ kululuŋen mundum elimiakŋaŋmak keyet keŋan gilik zem moti Emetak Teŋ zempema inmak totmambe.”

⁴⁰Am ekŋenaŋ zet ke nâmti ilinak Zisasiyet pigok zembien, “An kapi penaŋ golaŋ zenze an nin egat kokogat damuŋ matatnuwen ilak kapi.”

⁴¹Âpme am notnaŋaŋ pigok zewien, “An kapi penaŋ Kilais Kawawaŋaŋ ikaŋaŋ ombempeme kokogat zeye.”

Zeme am notnaŋaŋ zewien, “Kilais ek Galili msalen kapi ku sokbembeyet zenzeŋaŋ? ⁴²Kawawaŋgalen Zet Itnaŋanen zet pigok zenzeŋaŋ,

‘Kilais ek amobotnaŋ Dewitgat sokŋaŋ keyepmti egaŋ Dewitgalen mka ŋotakŋan Beteleem sokbembeyet zenzeŋaŋ.’ ” (Maika 5:2)

⁴³Am ekŋenaŋ Zisasiyet zet kegok zemti ilinak kalaŋbien. ⁴⁴Mti am notnaŋ ekŋenaŋ Zisas atamti met mka katikŋan pesât mbienangut belak peme tage.

Zuda an ŋeŋaŋ ekŋenaŋ Zisas ku nâmkîŋpewien

⁴⁵Âpme sesewat mka temangalen antipdakutum zemindeme mebien ekŋenaŋ naman belak etaŋ gilik zemti Palisi ma sâpe sâpe bumbu ekŋengalen an ŋeŋaŋ ekŋenmagen mepme indikti ekŋenaŋ pigok indayaŋkwesiwien, “In zigogat Zisas wawaŋiŋ belak pi kolip?”

⁴⁶Indayaŋkwesime ekŋenaŋ zewien, “Egaŋ zet manzein kegok ke an ŋenaŋ zet keboŋ penaŋ ŋen ŋep ku zenzeyelen keyepmti nâmtemtem mti ku atan kotnup.”

⁴⁷Zeme Palisi ekŋenaŋ pigok diindowien, “In egaŋ keŋin kegogak myuŋgup mene wa kapi? ⁴⁸In ekme sâpe sâpe bumbu ekŋengalen an ŋeŋaŋ ma Palisi an ninmagatnaŋ notnaŋ ekŋenaŋ egat zetnaŋ ŋen nâmkîŋpeme ekbien? ⁴⁹Am ek mâti tapmaip ekŋen ke Mosesiyelen zii zet kapi ku weyaŋ manâmâtâlîp keyepmti am ekŋen ke maneti bamgat Kawawaŋaŋ indawalebe.”

⁵⁰⁻⁵¹Âpme Palisi an ekŋengat tungupwinangatnaŋ an ŋen kwitnaŋ Nikodimas. An keyaŋ itnaŋaŋ tambuyet moti Zisasmak zapat mbun. Ek

keyañ notnane ekñengat pigok zeye, “In nin an ñen yomañmak ma yek keyet yañañañ nânâpiñ belak etañ gakikiyet zetnañ zemdelañ zenzeyet zetnañ ñen zii zelen meluwañ mimiñañ ñen ku tazin.”

⁵² Zeme notnane sambe ekñenañ pigok dunduwien, “Geñmak ek msalit Galili kwepgapmti m aṅgalañ pemti tazenik? Geñ Kawawaṅgalen zet meluwañ itnañañ mimiñañ ke weyañ maiñti keyet nânâ mulup omba mbegen An Kawawañañ ombempeye ke sokbembeyet zenzeñañ ke Galili msalen kapi ku sokbembeyet zenzeñañ ekbek.” ⁵³ [Mti ondedagen zet mmot mtot mti belak kalañti ekñenañ mkañinan mekopme Zisasiyañ Olip Kalarañ mowege.

Imbi set kileñ mamañañ ñen wati Zisasmagen mebien

8 ¹⁻² Zisasiyañ Olip Kalarañ ke mopmanepeme msame toti sesewat mka temanen mowepme am sambe penañañ ek ekti ekmagen met pende pende tapmme egañ ke totati Kawawaṅgalen zet zapat dolakñañ tadiindome ³ kan keyet Palisi ma an zii zet zikat indanda an ekñenañ imbi ñen set kileñ mame ekti wati met am tuṅguwinan onzempemti Zisasiyet zewien, ⁴ “An zikat indanda, imbi kapi apmañ pemti met set kileñ manepeme ekti wati gâlen kotnup. ⁵⁻⁶ Imbi ekñen kabon kapi nin nanzañ timti indomann gakikiyet Mosesiyañ zii zelen zemâtâtndaye.” Ekñenañ, “Nin yañkwesimann Zisasiyañ zet zigok ñen zeme ekti wati zelen met pesenup,” zemti pigok yañkwesiwiñ, “Amobotnañ imbi kapi zigok msasenup ze zemane nâne?”

Zeme Zisasiyañ kusum tati betnañ yuyañ msalen baen meluwañ takumañge. ⁷ Âpme ekñenañ yañkwesim giñgiñ penañ mme egañ nâmtage tageyañ yek bemengut teñ zem wat indikti pigok diindoye, “Inmagangatnañ an ñen yomepiñ kwetetepmañ penañ main egañ yañbemti imbi kapi nanzañ kukṅangat kumengut in sambeyañ kummeti kume gakisem.” ⁸ Zemindamti egañ ewe kusum toti msalen baen betnañ yuyañ meluwañ takumañge.

⁹ Âpme ekñenañ ilinak pe an kwiyañ yañbem kume ekti kusenup zemti meek koek mbienañ yek beme an penañ penañ ñeñañ yañbemti pakpak kwep kwep toti kwawet mme eyetnan am notnañ ekñenañ tapmetne metne peme delañ zemâge. Âpme imbi kemak Zisasmak ilidak etañ tabun. ¹⁰ Âpme Zisasiyañ teñ zem wati ekme imbi piwan igak tapme ekti zeye, “Am gosâgât kot tapmmo ekñen pi wan de melo? An ñenañ tati geñ ku gonak?”

¹¹ Zeme imbiyañ pigok zeye, “Amobotnañ, am pi kunzuñ mepme delañ zep.”

Âpme Zisasiyañ zeye, “Neñ kegoak yomdaṅgat dopmañ ñen ku zemgoṅgoyelen. Geñ mepmamti set kileñ mama manik ke pemane tabe.”]

Zisasiyañ ikṅangat yañañ zemkawañ bemindaye

¹² Âpme kan ṅengat Zisasiyañ sesewat mka temañ keñan tati am zet ñen pigok diindoye, “Neñ msat sambe bekapiyelen tañam keyepmti am ñenañ

neŋ napmâti mamambe beme egaŋ tambusosok keŋan ku mambe. Ek nâlen busatnaŋaŋ mbusatnaŋ bempeme egaŋ ekmâtâti mama dolakŋaŋ mambe.”

¹³ Kegok zeme Palisi ekŋenaŋ pigok dunduwien, “Pi gitiyegak yaŋaŋdi dinndonik kapi nâmann penaŋ ku bein.”

¹⁴ Zeme Zisasiyaŋ pigok diindoye, “Neŋ nanangat yaŋŋ zeyap kapi penaŋepiŋ ku bein. Neŋ deyetnaŋ koban ma maneti naman deeset mebap e nâmâtâtati tazeyap. Âpme in ke ku nâmti belak kileŋ tazeip.

¹⁵ In neŋ zet zeya keyepmti ilinaŋgalen nânâŋinaŋ ma mama mimiŋin mamimkwalip ke nâmti keyet kataŋ zet muluwen neip. Âpme neŋ am zet muluwen nenak ku pepeyelen. ¹⁶ Neŋ kwileki ŋeniyet am ŋangat zetnaŋ zemdelan zesâti esemteŋ penaŋ zemdelan zempewak. Neŋ am zet muluwen indendeyet mulup e nenak etaŋ ku mamiyap. Bien zemneme koban egaŋ napmukulem mnemeŋgut nilisakwep ŋep mimiyeleŋ.

¹⁷ Ilinanŋgalen zii zelinan zetgat yaŋaŋ kapiŋok tazin,

‘An zulaŋ an ŋeniyet yaŋaŋ kok kok main zemalu amnaŋ nâme penaŋ mambein.’

(Zii Zet 17:6; 19:15)

¹⁸ Âpme neŋmak Bipm zemneme toban nit nilisakwep nâgât yaŋŋ bandim mti manzemkawaŋbein keyepmti neŋ nanangat zema zetn penaŋ mambein.”

¹⁹ Zet keŋok diindome ekŋenaŋ pigok yaŋkwesiwien, “Bipdi pe deset tapme tazenik?”

Zeme pigok diindoye, “In nâgât yaŋŋ ku maekmâtâlîp keyepmti Bipm keŋogak ku manâmâtâpeip. In nâgât nâmâtâbiek ze Bipm keŋogak nâmâtâpewiek.”

²⁰ Zisasiyaŋ Kawawaŋgat tewalaŋ mânep bembe boŋgis matatan mka keŋaŋ keyet keŋan tati am zet zapat dolakŋaŋ tadiindometneti zet kapi zeye. Keyepmti am ekŋenaŋ ek wati mka katikŋan met pesât nâmbienanŋgut Kawawaŋaŋ egat kanaŋ beye e ewe ku beye keyepmti atatayet belin nukŋaŋ beye.

In neŋ Bienmagangatnaŋ koban ke in ku nâip

²¹ Mti Zisasiyaŋ ewe pigok tusumti diindoye, “Neŋ indemti mepma in natimapme yek beme bekananŋin msekeŋ gakiwembep. Neŋ meti mambap ke in ŋep ku kobep.”

²² Kegok zeme Zuda am ekŋenaŋ zewien, “‘Neŋ mebap ke in ku kobep,’ keŋok ke yaŋaŋ kwilekiyet nâmti tazein? Ikŋaŋ sekŋaŋ waleti gakisâgât mene nâmtazein?”

²³ Âpme Zisasiyaŋ pigok diindoye, “In msat kapiyeleŋ am. Âpme neŋ kululuŋen gwaengatanŋ wan neŋ msat kapiyetnaŋ yek. ²⁴ Keyepmti neŋ eweŋanak pigok diindoya in yomin melesiŋ maneti gakiwep. In neŋ Kilais mayap ke ku nâmkîŋpemnewep beme in maneti yomin sekpeŋ gakiwembep.”

²⁵ Zeme nâmti pigok yaŋkwesiwien, “Âpme geŋ kwi? Ze zemane nâne.”

Zisasiyaŋ pigok diindoye, “Neŋ ilak yaŋŋ zemkawaŋ bemindama nâmâlo kemak. ²⁶ Neŋ ingalen nukŋaŋ sambe weme ekti ŋep zemindondoyelen yaŋgut belak ekpemti mamayap. An zemneme toban egaŋ keyet zet esemteŋ zemti dopmaŋ mutumindawe. Âpme neŋ belak zetnaŋ zeme eknâm mban ke etaŋ msalen kapi mamti am sambe kapiyet sosok manzemkawaŋ bemindayap.”

²⁷ Zisasiyaŋ Bipmaŋgat zapatnaŋ kegok diindome amobotnaŋ ekŋenaŋ ku weyaŋ nâmâtâbien. ²⁸ Keyepmti Zisasiyaŋ tusumti ewe pigok diindoye, “In Angat Nemuŋaŋ neŋ tewen nâmti mwat onzemnemtingut neŋ Kilais keyet yaŋaŋ weyaŋ ekmâtâbep. Neŋ wa mulup mamiyap kapi nanaŋgat windeyet mamiyap yek. Bienaŋ zet zemâtâtneŋge keyet kataŋ zet am manzemâtâtindayap. ²⁹ An zemneme toban ek neŋmak mamain. Âpme neŋ mulup sambe zemti mma egaŋ manigoin keyepmti egaŋ ku manemezin.”

³⁰ Zet kegok zeme am sambeyaŋ zetnaŋ ke nâme penajaŋ beme nâmkiŋpewien.

An ŋenaŋ bekaŋaŋ mbe beme keyet kandaŋan meti mambe

³¹ Âpme Zuda am Zisas nâmkiŋpewien ekŋen keyet pigok diindoye, “In neŋ zet diindoyap keyet katnanen mamti nemunambanne penajaŋ bewep. ³² In nâlen zet ke mâti keyet kataŋ mame keyaŋ bekaŋaŋgalen kikitek ke elangemindeme neŋmak tusumti belak lala mambep.”

³³ Âpme am notnaŋ Zisasiyet ku nâmkiŋpewien ekŋenaŋ zet ke nâmti zet dopmaŋ pigok dunduwien, “Nin Abalaamgat nemunambaŋane nin an kwiyaŋ ndaŋgalaŋti kandaŋan ndeme matatnupgapmti geŋ ningat, ‘In kikitekŋin e kwalet indema belak lala mambep.’ Pi zenik?”

³⁴ Zeme Zisasiyaŋ pigok diindoye, “Neŋ penajaŋ sukwep pigok diindoma nâit. An ŋen yom mamimambe beme an ke yomgat kandaŋan meti egat sisiliŋ muluwetaŋ mamimambe. ³⁵ Sisiliŋ an egaŋ amobotnaŋ egalen mkaen kwesiŋ matazin keyaŋgut nemuŋaŋ yek. An keyet nemuŋaŋ penajaŋ kelak ikaŋaŋgat nemuŋaŋ. ³⁶ Keyepmti Kawawaŋgat Nemuŋaŋ neŋ yomgalen kikitek keŋan mamti sisiliŋ mulup mamip ke kalutindewap beme in belak lala penajaŋ mambep. ³⁷ In Abalaamgat iŋsokŋane e neŋ nâmindeyap. Keyepmti neŋ zet diindoma zetnaŋ belak ingat sekŋinan mot kumti gwalalaŋ kumti matozin keyepmti in neŋ nosât manzeip. ³⁸ Neŋ Bienaŋ kwitnaŋ kwitnaŋ zikat name ekban keyet zapatnaŋ mandiindoyap. Âpme in biwineyaŋ kwitnaŋ kwitnaŋ zikat indawien ke mamip.”

³⁹ Zeme pigok dunduwien, “Ningat bipm Abalaam.”

Zeme Zisasiyaŋ pigok diindoye, “In Abalaamgat nemunambaŋane penajaŋ mambiek ze Abalaamaŋ Kawawaŋgat zetnaŋ kandaŋan mamamtan keyet

sepem mamambiek. ⁴⁰Nej Kawawangalen zet penañaj kapi mandiindoma in naman nâme dâsuki beme nosât mamip. Abalaamañ muluwañ bekanaj keboñ ke ñen ku mge. ⁴¹In biwinañgalen set mâti mamip.”

Âpme ekñenañ pigok zewien, “Nin an ñenmagengatnañ ku sokbewenn; Kawawañ ek ningat Bipm penañ.”

⁴²Zeme Zisasiyañ pigok zeye, “In Biwin Kawawañ ze in Egañ nej zemneme toban keyepmti in nej ñep notn mnewiek wa nej nanangat keñnañ galak etañ ku toban Kawawañaj ikañ zemneme toban. ⁴³In zigogat penangapm keñ katik mmame nej zetn zema keñinan ku matowezin? Ma zigogat nej zet zema wakñin ku mambeip? ⁴⁴In biwin Sadañ keyepmti egañ zemâtâtindame egalen nânâen mulup mamip. An ke eweñan am indawalelet mulup mgeyañ ewe mamimkwazin. Egañ Kawawangalen zet bamkumpeye keyepmti egat keñanen zet penañ zenze ke ñen ku matazin. Ek zet dâsuki zenze keyañ mama mimiñañ beyeyepm ek an dâsukitoñ ma zet dâsuki zenze ke bipmañ ek. ⁴⁵In egat kandañan meti mamaip keyepmti nej Kawawangalen zet penañ kapi diindoma in ke nâmti zetn ke ku manâmkiñpeip. ⁴⁶Inmagen an ñenañ nâlen yomm ñen zemkawañ bemname nâsap? Nej an teñ penañ mamayawañ zet zapat dolakñañ kapi diindoma in kwilekiyet penañ zetn ku manâmkiñpeip? ⁴⁷Am Kawawangat zapat mamaip ekñenañ Kawawangat zetnañ manâip. Âpme in Kawawangat zapat ku mamaip keyepmti in zetnangat wisat mamip.”

Abalaamak Zisasiyet zet zenzeñañ

⁴⁸Zeme Zuda am ekñenañ zet dopmañ pigok gilik zemti sawien, “Nin kegogapmti manzenup Samalia an geñ kapi we bekanañañ keñdan tapme zet kileñ kileñ tazenik.”

⁴⁹Zeme Zisasiyañ pigok diindoye, “Nej we bekanañañ keñ ku mimiyuñguin. Nej Bipm Kawawangat kwitnañ mamwapeyañ. Âpme ingulak nej niktalati selañ nime belakñañ penañ mambeyap. ⁵⁰Wa nej nanangat kwizapatn temañ bembeyet nâmti mulupmañ ku mamiyap. Nâgât kwizet buñamm mwati zenze mulup ke An ñenañ mbe. An ke zemdelañ zenze anañ mbe. ⁵¹Nej zet penañ pigok diindoma nâit, An ñenañ nâlen zet gawepumti mim mambe beme ek gakikiyelen set ku aikbe.”

⁵²Kegok zeme Zuda am ekñenañ pigok zewien, “We bekanañañ keñanen tazin zet e penañ tazenup! Abalaam gakiye ma golañ zenze an ekñen sambe kegogak gakimâbien. Âpme geñ na zet pigok tazenik, ‘An ñenañ nâlen zet kapi gawepumti mambe beme egañ ku gakiwe.’ ⁵³Bipm Abalaam temañ bepiwan gakiye. Âpme geñ bukapiyañ ek sebempesâgât zenik? Golañ zenze an sambe bepi kegogak gakime delañ zemâge. Âpme geñ ziboñ penangapm kok zemti gitangat sekdi omba penañ mmodik?”

⁵⁴Zeme Zisasiyan pigok diindoye, “Neŋ nananŋat sekŋ mmopma ɲep penan ku benak. Bipm in egat, ‘Kawawaŋŋ,’ manzeip eganŋut nâgât kwizet buŋamm mamwazin. ⁵⁵In ek ke ku maweyan nâmâtâpeip âpme neŋgut ek manâmâtâpeyap. Neŋ zigok dâsuki ke ek ku nâmpeyap zesap e mtilak in nemboŋ an dâsukitoŋ besapgat. Neŋ egat yaŋan nâmâtâti keyepmti zetnaŋ maŋgawepuyap. ⁵⁶Biwin Abalaam ke neŋ kopma niknikgat keŋan seŋme muluk kaik matatan. Yaŋ nen koban kapiyet belak sesepmaŋ Kawawaŋan zikat same ekti keŋ oloŋen penan nânge.”

⁵⁷Zeme Zuda am ekŋenaŋ zewien, “Geŋ ewe anemba nup kandi 50 bembepiŋ bukapiyan Abalaam zigaset ekbanan?”

⁵⁸Zeme Zisasiyan pigok zeye, “Neŋ penan pigok zema nâit, neŋ Abalaam ewe sokbembepiŋ tapme mambanaŋ ewe mamamkwalap.”

⁵⁹Kegok zeme ekŋenaŋ ɲeŋin zime nanaŋ timti kusât mme egaŋ buzak am keŋan keŋanset sesewat mka temaŋ pemti zupman toweti mege.

Zisasiyan an ɲen zikatnaŋ beŋan mamkeŋ sokbembeŋan weyaŋpeye

9 ¹Zisasiyan kunzuŋ toti nembaŋane ndatime nsakwep selen tapmetneti selen ke an ɲen zikatnaŋ beŋan mamkeŋ keboŋ sokbembeŋan aikbenn. ²Aikti nin Zisas pigok yaŋkwesiwenn, “An zikat indanda, an kapi kwiyeleŋ yomgat zikatnaŋ beŋan kapi mamkeŋ sokbeye mamaŋ bipmaŋ egetgalen yomgat ma nemba kapi iŋŋanŋalen yomgapmti kapiŋok sokbeye?”

³Zemann Zisasiyan pigok dinndoye, “Wa ke mamaŋ bipmaŋgalen yomgat ma iŋŋanŋalen yomgapmti keŋok ku sokbeye. Kawawaŋalen winde ke ekmagen sokbemkawaŋ bembeyet ek keboŋ sokbeye. ⁴Nin an zemneme koban egalen mulup ewe kasup tapme kapiyet tapmmambanup. Yaŋ kan ɲeniyet msat tambuwe beme ilak mulup mimiyeŋ setnaŋ yek bewe. Zet kapiyet yaŋan pigok zemâtâpma nâit: Nin ewe alik mamti kan kapiyet An zemneme toban egalen mulup mbanup. Maneti gakiwanup beme egalen mulup ɲen ku mimiyeleŋ. ⁵Neŋ msatgalen busatnaŋgapmti neŋ msalen kapi mamamti am mambusatnaŋ bemindeyap keŋok mti am ɲoktikŋin mkawaŋ bema ekŋenaŋ Kawawaŋat yaŋan manâmâtâlîp.”

⁶Kegok zemti zawagaŋ msat wasekpeŋti lelimâpme bakŋan beme mkwati zikat sâkŋanen wiliwaŋ zulutpeŋti pigok zempaye, ⁷“Geŋ meti Siloam lemuŋan ke zimosedan witiŋip kapi zulupmane kwawesem.” (Siloam zet keyet yaŋan Zempeme mege). Âpme an piwan meti zimosetnaŋ tuyen zuluti zikatnaŋ dolakŋan beme mkaŋan gilik zemti kopme

⁸am notnane ma am notnaŋ mânep milawatgat mawekumindame ektemien ekŋenaŋ ekti ilinak dopmaŋ yaŋkwesim yaŋkwesim mti zewien, “An kapi selen totati nin mânep milawatgat mawekumndain wan an kapi?”

⁹Âpme am notnaŋ ekŋenaŋ zewien, “An ikŋaŋ kapimak,” zeme notnaŋaŋ, “Yegat,” zemti,

“An kapimak ŋenmak egat sepemit kwepgat.”

Kegok zeme an ikŋaŋ keyaŋ pigok zeye, “Nenen mânep milawatgat mawekumindayap kemak.”

¹⁰Zeme pigok yaŋkwesiwien, “Geŋ zigok mti zikadi ekdak?”

¹¹Yaŋkwesime pigok diindoye, “An ŋen kwitnaŋ Zisas an keyaŋ zawakŋaŋmak msatmak lumaŋti zikatn sâkŋan gwaen kaput nemti pigok dinop, ‘Geŋ Siloam tu lemuŋan meti witolip zulupmane melak’ zemnep. Âpme neŋ meti zikatn sâkŋanen witolip kaputnep ke zulupma mepme zikatn pembenaj beme ega.”

¹²Kegok zeme pigok yaŋkwesiwien, “An ke deset tazin ke geŋ nânik?”

Yaŋkwesime zeye, “An ke pe deset tazin ke neŋ ku nâyap.”

¹³Âpme am ekŋenaŋ an zikatnaŋ ege ke Palisimagen wati mebien.

¹⁴Zisasiyaŋ an zikatnaŋ zawakŋaŋmak msatmak lumaŋti zikatnaŋ weyaŋpeye ke Sabat tagoŋgo kanen mge keyepmti wati mebien. ¹⁵Mepme Palisi an ekŋenaŋ ewe pigok yaŋkwesiwien, “Geŋ zikadi pe zigok mti ekdak?”

Yaŋkwesime pigok diindoye, “Neŋ msalaŋ zikatnan zulutneme met tuyen zuluti zikatn ega.”

¹⁶Zeme Palisi ekŋenmagengatnaŋ an notnaŋaŋ pigok zewien, “An zikadi weyaŋpeye ek Kawawaŋgalen mulup an yek. Keyepmti nin Sabat tagoŋgo kanen ke tapmann egaŋ tagoŋgo sutnan penaŋ mulup mip.”

Zeme notnaŋaŋ pigok zewien, “Ek a yomtonŋ mamanak ze egaŋ mulup keboŋ ke zigok mnak?” Kegok zemti ilinak zet mmot mtot mbien.

¹⁷Mti an zikatnaŋ beŋaŋ weyaŋpeye ek sek tuk ewe pigok yaŋkwesiwien, “An zikadi weyaŋgep an keyet geŋ zigok nâmpenik?”

Yaŋkwesime egaŋ pigok zeye, “An ke neŋ nâmpema golaŋ zenze an ŋen bein.”

¹⁸Âpme Zuda amobotnaŋ ekŋenaŋ an kapi pe zikatnaŋ beŋaŋ kapuk sokbeye. Zemti keŋ zut mbienaj yek beme mamaŋ bipmaŋ idazemtetime kopmalu pigok idayaŋkwesiwien, ¹⁹“Nemuŋit kapi ilak penaŋ zikatnaŋ beŋaŋ sokbeye? Ek zigok mti zikatnaŋ egap ke it bugan nâlup?”

²⁰Idayaŋkwesime mambipmanelaŋ pigok zewun, “Ek nigat nemunit penaŋ okakŋanak zikatnaŋ beŋaŋ sokbeye e nit ŋep nâlup. ²¹Yangut naman zigok mti zikatnaŋ egap ma an kwiyaŋ zikatnaŋ weyaŋpep ke nit ku nâlup. Ek ilak an temaŋ kwitnaŋ kwitnaŋ ikŋaŋ nâmâtâtâtnaŋmak keyet ikŋaŋ weyaŋ yaŋkwesime diindome nâit!” ²²⁻²³Zuda amobotnaŋ ekŋenaŋ zet kapigok zemkatik bewien. An ŋenaŋ Zisasiyet Kilais zewe beme ek mâpman paset zupman belakŋan mebe zewien keyepmti mamaŋ bipmaŋ egelaŋ Zuda amobotnaŋ ekŋengat kiŋgati zet pigok zewun, “Ek ilak semem delaŋ zenzenangat ikŋaŋ yaŋkwesime yaŋaŋaŋ diindome nâit!”

²⁴Zemalu ekjenan an zikatnan bekanan weyanpeye ke ewe zeme kopme pigok dunduwien, “Geŋ Kawawaŋgat zikatnan zapadi penan penajak zemane nâne. Nin an weyanŋep keyet yaŋan nânup an ke an yomton.”

²⁵Zeme an keyan pigok diindoye, “An ke an yomton ma yek ke neŋ yaŋan ku nâmâtâlap. Yaŋgut neŋ eweŋan zikatn beŋan mamtemanan egaŋ mme zikatn ekman e penan nâmtalap.”

²⁶Zeme ewe pigok yaŋkwesiwien, “Pe sepem zigok penan mti zikadi mme ekmanan?”

²⁷Yaŋkwesime pigok diindoye, “Neŋ zet elak diindoma nâyo e ewe ku nâmâtâlo. Eneyet zet ewe ikjaŋ keyegak diindoma nânâyet tatnayaŋkwesip? In egat kandaŋan meti egat nempaŋane bembeyet nâmti tatnayaŋkwesip?”

²⁸Zeme kwelatnaŋ kumti zewien, “Egat nemuŋan elak geŋ kapimak ningut Mosesiyet nempaŋane. ²⁹Moses ek Kawawaŋan zet dunduye e nin nâmtatnup. Âpme an ke deeset sokbemti mulupmaŋ tapm kozin ke nin ku nâmpenup.”

³⁰Zeme an keyan zet pigok gilik zemindaye, “In an zikatn weyanŋep egat sokbembenaŋgat kanda zenze mulup mme neŋ nâmtemtem penaŋ mimindeyap. ³¹Kawawaŋan am yomton ekŋengalen dundundunin ku manâin ke nin nânup. Egaŋ am kwizet buŋamaŋ mamopeip ekjen etaŋ manâmindein. Egaŋ ikjaŋgalen nânâŋan ke amnaŋ mimiyet nâmbiliwege. ³²Nin msat kululuŋ sokbembenaŋgatnan alak pi tatnup pi an ŋenaŋ am zikatnaŋ beŋan ŋen weyanpepeŋan keyet zapatnaŋ ŋen ku manânup yek penaŋ. ³³Keyepmti an ke Kawawaŋmagengatnaŋ ku kodak ze mulup kegok ke igak zigoset mnak?”

³⁴Zeme pigok dunduwien, “An bekanan yomdimak mamkwabananaŋ ewe mamanik geŋ bukaboŋan nin kapi set zikat ndasât tazenik?” Kegok zemti sesewat mkaengatnan zempeme zupman toti mege.

³⁵Zempeme paset zupman mege zapat ke amnaŋ ilinak zenâ zenâ tapmepme Zisasiyaŋ wak kambu nânge. Keyepmti an ke selen aikti pigok yaŋkwesiye, “Geŋ Angat Nemuŋan egat nâmkinjaŋpenik ma yek?”

³⁶Âpme an keyan zeye, “Amobotnaŋ, geŋ zenik ke an kwi ze zikat namane ekti ŋep nâmkinjaŋpempewi!”

³⁷Zeme Zisasiyaŋ pigok dunduye, “Neŋ zet tadingoma tatniknik an elak neŋ kapimak.”

³⁸Zeme an keyan zeye, “Amobotnaŋ, neŋ penaŋ nâmkinjaŋpempgeyap.” Kegok zemti tot pedondom samti sesewatpeye.

³⁹Âpme Zisasiyaŋ pigok zeye, “Neŋ am yaŋanjin mimsokbembeyet msalen toban keyepmti am notnaŋ zikalin beŋan ekjenan zikalin dolakjaŋ ekbep. Âpme am zikalin ekti mamaip ekjenan zikalin naman beŋan bewe.”

⁴⁰Kegok zeme Palisi am ekmak ilinsakwep tabien ekjenan zet ke nâmti pigok zewien, “Zeme nin mee kogok zikatn bejan nâmndenik?”

⁴¹Zeme Zisasiyan pigok diindoye, “In an zikalin bejan mamambiek ze in yominpij mamambiek. In ilinangat, ‘Nin an zikatn bejan yek,’ manzeip keyepmti in yominmak mamaip.”

Zisas ek sipsip damuŋ dolakŋaŋ

10 ¹Zisasiyan zet ŋen pigok zeye, “Neŋ zet penaŋ sukwep pigok diindoma nâit, An ŋenaŋ sipsip ekŋengalen kimbaleŋ towesâgât egaŋ set penaŋ tapme kimbata dukŋaŋ belakŋaset aŋgosomti towebe beme an ke kambutoŋ ma an sage kuku toŋaŋ kegok zewanup. ²An ŋenaŋ set tokwakwaleset meti sipsip ekŋenmagen mebe beme an ke sipsip toŋaŋ penaŋaŋ mowezin nâmpewanup. ³Mopme setokwakwat damuŋ egaŋ ek sipsip toŋaŋ penaŋ e ekmâtâti kwalet peme moti sipsip kwilinan kwilinan indakumtetime toŋinangat bim ŋandaŋaŋ nâmti ekmagen kopme indatimti zupman baen matowezin. ⁴Ikŋaŋgat zapaŋ ke indatimti zupman toti mepme ekjenan bim ŋandaŋaŋ nâmti ekmâti mamâmelip. ⁵Ekjenan an bimŋandaŋin mamananan ekjen ku maindakmâti melip. Ekjenan bimŋandaŋin sepemaŋ igak ke nâmti makingakunzuŋip.”

⁶Zisasiyan am ningat nâmti bemzenze zet sipsip palen bemti zeme am ekjenan pe bemzenze zet kapi yaŋaŋ kwilekiyet zein ke ku nâmatâbien.

⁷Keyepmti Zisasiyan bemzenze zet kapiyet yaŋaŋ kapigok zeye, “Neŋ penaŋ sukwep penaŋ diindoma nâit, sipsip ekŋengalen setokwakwat e neŋ. ⁸Neŋ ewe sokbembepiŋ tapma am tetimaemae ŋeŋaŋ sokbemti inmagen kobien ekjen an kambu titinok mamti zet dâsuki, ‘Neŋ Kawawaŋaŋ an zempeme kosât zetik mge nen kapi,’ zemti mambien keyepmti nâlen am ekjenan zelin ku mâbien. ⁹Âpme neŋ amgalen sekekek keyepmti am ŋenaŋ neŋ nâmkipemneinen ek aŋgalaŋ pewap. Neŋ ekjen indikdamuŋ mimindema mamambep. ¹⁰Âpme an kambu titi ekjenan belak buzakset moti kwitnaŋ kwitnaŋ kumsagat mti sipsip mee kilen indomkumti notnaŋ buzak kambu indatimti mesâgât makolip. Yaŋgut neŋ sipsip ekjen indadamuŋ dolakŋaŋ mimindema ekjenan kakanemuŋ mamti mamobep.

¹¹Âpme neŋ sipsip toŋaŋ penaŋ keyepmti ekjenmagen kwileki ŋen sokbeme ekŋengapmti ŋep gakiwap. ¹²Mme sipsip damuŋ belak tosayelak etaŋ nâmti mamin ek toŋaŋ penaŋ yek keyepmti mulup wisat palen tapneti ekme tam zupmaŋ ŋenaŋ sipsip indim nsât kwindiŋ kwapme ekti sipsipgat yayaŋ mimipiŋ ketalat indemti yayaŋaŋgat kunzuŋme tam zupmaŋaŋ kwati indimâpme makalaŋ mekolip. ¹³Ek sipsip damuŋ penaŋ yek keyepmti egaŋ sipsip ekŋengat yayaŋ mimipiŋ kiŋgati makunzuŋzin. ¹⁴⁻¹⁵Neŋ sipsip ekŋengat toŋin penaŋ mamayap keyepmti Bienaŋ nâgât mama miminnaŋgat yaŋaŋ dolakŋaŋ nâmnein mme neŋ kegogak egat

nâmâtâpeyap. Sepem kegogak neŋmak sipsip maŋganne nin dopmaŋ nâm dopmaŋ nâm mti maŋga kwep mamanan. Keyepmti kwileki ŋen sipsipmagen sokbeme neŋ sipsip ekŋengapmti mamanan ŋep ketalasiwak. ¹⁶Âpme neŋ sipsip maŋganne notnaŋ ewe maip wa ekŋen kimbat kapiyet keŋangatnaŋ yek. Neŋ ekŋen ke eyo indakakalima kot neŋmak kapi mamti bimŋanden nâme delaŋ zeme sipsiwaŋ maŋga kwep tapme nenn kwep indadamuŋ mbap.

¹⁷Neŋ mamanan ketalasimti gakiwap ya naman gilik zem wati mamanan ke naman tiwap keyepmti Bien Kawawaŋaŋ nâgât nâmneme dolakŋaŋ penaŋ mambein. ¹⁸An ŋenaŋ nânâŋak neŋ kileŋ nome ku gakiwap neŋ nen nâmâtâtati mamann ketalasiwap. Ya naman gilik zemti wawagalen winde ke tatnain. Bipmnaŋ neŋ kegok mimiyet nâmnenge.”

¹⁹Zisasiyaŋ zet kegok zeme nâmti Zuda am ekŋenaŋ nâme ŋep ku beme ilinaŋgat bet wanok zet mmot mtot mbien. ²⁰Mti am sambe penaŋaŋ pigok zewien, “An kapi we bekanayaŋ keŋaŋ mme yuŋgume zet kileŋ kileŋ tapmme in eneyet momtati zetnaŋ taweyaŋ nâip?”

²¹Âpme naman am notnaŋaŋ pigok zewien, “An ŋen we bekanayaŋ keŋaŋ tapme zet dolak dolakŋaŋ kabon kapi ŋep ku zenak. Ma an zikatnaŋ beŋaŋ mee ŋep ku weyaŋpenak.”

Zuda am notnaŋaŋ Zisas ek Kilais ku nâmkinpewien

²²Zelusalem sesewat mka kambuk mme belakŋaŋ bembenaŋaŋ Omzuluti mme kambuk bembenaŋgalen Kendo ke nup kan kataŋ matakwatemien. Yaŋ nup kan kataŋ Kendo ke mawalam keŋaŋ masokbein. ²³⁻²⁴Âpme Zisasiyaŋ sesewat mka temaŋ keyet keŋaŋ ŋen Solomon zeme keyet setokwakwalen ke mebe kokot tapmme Zuda am ekŋenaŋ tokwat bembuluŋ tati pigok yaŋkwesiwiŋen, “Geŋ eneyet yaŋaŋdi sosok penaŋ zemkawaŋ bembepiŋ mmame nin gâgât weyaŋ ku manâmâtâtnup? Geŋ penaŋ Kilais, an Kawawaŋaŋ ombemgeŋgeŋaŋ beme yaŋaŋdi weyaŋ zemâtâtndamane nâne!”

²⁵Âpme Zisasiyaŋ pigok diindoye, “Neŋ nanangat yaŋŋ diindoma in ku manâmkinpempneip. Neŋ Bipmnaŋgalen windeyete mulup dolak dolakŋaŋ mamiyap keyaŋ nanangat yaŋŋ Kawawaŋaŋ iŋaŋ zemneme toban ke mammsokbemnain. ²⁶Âpme in nâlen sipsip maŋganne penaŋ bemti ku mamaip keyepmti zetn ku manâmkinpeip. ²⁷Âpme am nâlen sipsip maŋga bemti mamaip ekŋenaŋ bimŋanden nâmti neŋ manamâpmaip. ²⁸Keyepmti neŋ mama kanzizit indama walelepiŋ kwesiŋ kwesiŋ mameti mamambep. Ekŋen ke nâlen belangatnan am ŋenaŋ ku indamenzemtimti mebe yek penaŋ. ²⁹Am ekŋen ke Bipmnaŋ iŋaŋ nâlen belen mamayet naŋgeyepmti mame iŋaŋ maindadamuŋ min. Ek windeŋaŋ igagen penaŋ keyepmti am ekŋen ke an ŋenaŋ nâlen belangatnan ku indamenzem tiwe. ³⁰Bienmak nit keŋ kwep penaŋ bemti mulup mamilup.”

³¹ Kegok zeme Zuda am ekñenañ nâme ñep ku beme nanzañ ambepolet timti kusât mbien. ³² Mme Zisasiyañ pigok diindoye, “Neñ mulup dolak dolakñañ sambe penañ Biengalen windeen mamima egip. Âpme in mulup mamiyap ke mulup zibon ke ekme bekanañ beme nanzañ timti nosât tapmip?”

³³ Zeme Zuda am ekñenañ zewien, “Wa geñ mulup dolakñañ maminik keyet mti gosât ku tapminup. Giti zet mobotnañ mti geñ am nin nemboñak yañgut, ‘Neñ Kawawañ,’ tazenik keyepmti gosât pi tapmnup!”

³⁴⁻³⁶ Kegok zeme Zisasiyañ pigok diindoye, “Kawawañgalen Zet Itnañanen pigok zenzeñañ tazin, Kawawañ an zemdelañ zenze an mamkwabien ekñengat pigok zeye, ‘In mulup kegok mamip enenogat in Kawawañ nemboñ.’ Kawawañgalen zet sambe ke tapmezin ke anañ nin ku omenzañpepeyelen yek penañ. Âpme neñ Kawawañ ikñañ mulup dolakñañ mimiyet zemdelañ zemneme msalen kapi toban keyepmti neñ Kawawañgat Nemunañ zema in eneyet egañ set ku mimiñ mti Kawawañ mtopemti sek mmobot zet tazein manzeip. ³⁷ In mulup mamiyap kapi ekme Bipmnañgalen katañ ku mambein beme zetn kapi bamkumpeme ñep bewe. ³⁸ Âk ekme mulupm Kawawañ mñak keyet katañ mamiyap wa zet manzeyap etañ yek. Mulupm mamima egip keeset eyo ekti Bienmak nit keñ kwep bemti mulup mamilup e ndik mâtâbep.”

³⁹ Kegok diindome ekñenañ ñeñin penañ zime wati mka katikñañ pene zeminepeme yumbemindemti toti mege.

⁴⁰ Meti Zodañ tu nembet daen Zânañ am tu itnañ manzulutindemtanen ke meti mamtan. ⁴¹ Ke meti mame am sambeyañ ekmagen koti pigok zewien, “Zânañ menok ñen ku mme ekbenn. Âpme Zânañ an ikñañ kapiyet nâmti zet sambe zemâge ke an kapimagen penañmak etañ tasokbemâzin.” ⁴² Zemti am sambeyañ egat nâmkijpemâbien.

Lasalus gakime bewien

11 ¹ Betani mka msalen ke an ñen mamtan kwitnañ Lasalus ek zawat temañ penañ mti tapme ipmanet Maliamak Mata egelañ ke tati mamomtatemun. ² Lasalusiyet ipmañ Malia kapiyañ maneti bam Amobotnañ Zisas gakikiñañgalen kan bududuk beme wet kelakñañ sesikñañ dolakñañ penañ piyañ ek setnanen zulutpemti ñoksinañ kaput pewe. ³ Lasalusiyet ipmanet zut keyañ iwitdangat yayañ mti Zisasmagen zet pigok bemalu mege: “Amobotnañ, nodi penañ Lasalus piwan zawat temañ tapm weingat kot eksenik.”

⁴ Âpme Zisasiyañ zet ke nâmti pigok zeye, “Zawat keyet penañ wa gakiki sokbembeyet yek. Kawawañgat Nemunañ egalen kwizet buñamañ msalen pien palakñañ beme Kawawañgat kwizet buñamañ mwat onzempepeyet kegok sokbein.”

⁵Zisasiyan Lasalus ipmanet Matamak Malia ekŋen kemak notn notn dolakŋan mti mamtemien. ⁶Âpme Zisasiyan zapat ke nâmpemti mka keyegak kasup zut pi ewe tage. ⁷Yan msame wati Zisasiyan nembanjane ningat pigok zeye, “Kame naman Zudia mkaenak gilik zemti metne.”

⁸Zeme nin pigok dunduwenn, “An zikat indanda, geŋ alagati kanda manepemane nanzanŋ gosâgât mme kunzuŋti kotn yanaman keyegak gilik zemti mesâgât tazenik?”

⁹Yanŋwesimann pigok dinndoye, “Pi ewe tambujanak mulup mimiyelen kan ewe teepman tazin. An ŋen kasupgat zikatnanŋ ekmâtâti mepme kwileki ŋenanŋ sekŋan ŋen ku mawalezin. ¹⁰An ŋenanŋ tambuyet mamezin beme egaŋ busatnanŋ ku tazingapmti tambusosokgat pumpem pumpem olat metiŋgut tep palen ma nanzan palen mee sekŋan mawalezin.”

¹¹Kegok zemti zet ŋen ewe pigok tusumti ningat zeye, “Notn Lasalus ek zawat mti muluk tawein yanŋ neŋ meti butema wasem.”

¹²Zeme nembanjane nin pigok zewenn, “Amobotnanŋ, egaŋ zawat mti muluk tawen beme ikŋanŋ ŋep alik bemti wabe.”

¹³Zisasiyan Lasalus penaŋ gakiye ke met mme wawagat nâmti zeye. Âpme nempa nin nâmann zawat mti muluk tawenanŋ met buteme wasem kok nâmti zewenn. ¹⁴Âpme Zisasiyan naman pigok weyan zemkawan bemndaye, “Lasalus ek tambumbu tuk wenŋe yanŋ neŋ meti butema ewe wasem. ¹⁵Neŋ zawat zapatnanŋ nâmbanŋ yanŋgut kapiyegak mamann gakiyan. Âpme neŋ ekmagen mulup mma in ekti nâmkŋpepe kaliŋanŋ aikbep keyepmti nâma dolakŋanŋ penaŋ bein. Ele kame nin ilak ek eksât metne.”

¹⁶Âpme ninmagengatnanŋ nempa ŋen kwitnanŋ Tomas kwitnanŋ ŋen Glik zeleset Didimas makumtemien ke ningalen zeleset nempa pepet kok zewanek. Egaŋ nin pigok dinndoye, “Kame nin sambe bepi nsakwep ekmak mepmann ndome gakimâbanup.”

Zisas ek gakikiengatnan wawat ma mama keyet toŋan

¹⁷Zisasmak nin ewe kainde maman Lasalus met beme kasup zulak zulak pi sumen weme egaŋ bam mege. Keyepmti kwapatanŋ zemann am ekŋenanŋ zewien, “Lasalus ilak tugaŋ bewen.” ¹⁸Betani mka ke bejan penaŋ yek; Zelusalem mka temaŋ keyet sokŋanik. (Mail zut mee kegok mamekotemien.) ¹⁹Keyepmti Zuda am sambe ekŋenanŋ Matamak Malia iwit gakime ambembesi mimidesât mepmâbien.

²⁰Âpme Matayanŋ Zisasmak nin kotnup zeme nâmti wenenanŋ ke tapme egaŋ windembem toti selen meti ndaige. ²¹Kegok mti Zisasiyet pigok dunduye, “Amobotnanŋ, geŋ kapi mambek ze ipm ku gakinak. ²²Yanŋgut alak pigogat geŋ kwileki ŋeniyet nâmti bipdi dundum samane egaŋ keyet penaŋanŋ ŋep mamgain.”

²³ Zeme Zisasiyan pigok dunduye, “Geŋ yayan ku mi, ipdi Lasalus ek ɲep gilik zemti wasem.”

²⁴ Zeme nâmti Matayan pigok zeye, “Maneti bam kan temanen gilik zemti wabe e ɲep nâyap.”

²⁵ Zeme Zisasiyan pigok zeye, “Gakikiengatnan wawat ma mama keyet ɲotekŋan neŋ keyepmti am ɲenan neŋ nâmkɲipemnewe beme gakiwe yaŋgut neŋ ɲep mamaŋan ewe gilik zemsawap. ²⁶Ma am ɲen ewe sekŋan melesin mamti neŋ nâmkɲipemnewe beme egaŋ gakikipin mamambe. Geŋ neŋ zet zeyap kapi ɲep nâmkɲipenik?”

²⁷ Zeme Matayan zeye, “Amobotnaŋ, geŋ Kilais, Kawawaŋgat Nemunaŋ, msalen kapi togotat buŋam zapatnaŋ zenzeŋan elak geŋ kapi e penaŋ nâmkɲipemgeyap.”

²⁸ Zet kegok zemti met weneŋan Maliayet zeme kopme igak buzak pigok dunduye, “An zikat indanda ilak kotati gâgât tazein.” ²⁹ Zeme Maliayan nânâŋak wati sakwep Zisasmak nin tabenen mege. ³⁰ Nin mka set biman baen tati Mata zempeme kwapme ewe keyegak totapmambenn. ³¹ Zeme nâmti Maliayan mka keŋangatnan sakwep wawatnak toti mepme Zuda am ekmak ambembesien tapmambien ekŋenan wa sumen daen susât mezin mene zemti mâti kwatopmâbien.

³² Âpme Maliayan windembemti mka set biman baen toti ndikme tapmmann Zisas pedondom samti pigok zeye, “Amobotnaŋ, geŋ kapi tabek ze ipm ɲep ku gakinak.”

³³ Zemti sume Zuda am ek mâti mebien ekŋenan ek mukulem mti ambembesi temaŋ mbien. Tapmme Zisasiyan indikti keŋan bekanan penaŋ beme siyan bimaŋ soye. ³⁴ Some pigok indayaŋkwesiye, “In sekŋan pe denen bemien?”

Indayaŋkwesime ekŋenan zewien, “Amobotnaŋ, kopmane meti sumaŋ zikat gaman ekbak.”

³⁵ Met zikat same ekti Zisasiyan siap ulu alep timti suye.

³⁶ Sume Zuda am ekŋenan ekti zewien, “An pi an kapimak notn notn penaŋ mti mamalup keyepmti egat tasuin egip.”

³⁷ Âpme notnaŋ ekŋenan zewien, “An kapi an ɲen zikatnaŋ beŋan ɲen weyaŋpeye keyet zapatnaŋ mekopme nâmbenn. Kogogapm an kapi sakwep kodak ze Lasalus kapi ɲep weyaŋpeme alik tadak.”

³⁸ Âpme Zisasiyan keŋan ewe bekanan penaŋ beme sum sokŋan penaŋ mebenn. Lasalus gakime sekŋan mti met miŋa keŋan wepemti nanaŋ temaŋ ɲen wilili peme met einzunaŋ bekek tage. ³⁹ Keyet mti Zisasiyan sumpemti pigok zeye, “In nanaŋ temaŋ kapi kwanzepeme kaiŋan melak.”

Zeme an gakiye keyet mâŋanaŋ pigok zeye, “Amobotnaŋ, tambumbu zulak zulak ilak sumen tapme tozin yalak pi sek sesikŋan tapein pi zigogat nanaŋ kwanzempepeyet tazenik.”

⁴⁰Zeme Zisasiyan pigok dunduye, “Neŋ zet daen dingoya e nâmane betetnaŋ bein. Geŋ belak nâmkinpem nemane neŋ Kawawaŋgalen winde keyet penaŋaŋ mma sokbeme eksenik.” ⁴¹⁻⁴²Âpme am notnaŋ ekŋenaŋ nanzaŋ temaŋ bepiwan kwanzepeme mepme Zisasiyan zikatnaŋ kululuŋen gwaen ekme mopme pigok dunduye, “Bien, geŋ dundundun kan kataŋ nâmti manamukulem mnik keyepmti wisikŋ dingoyap. Neŋ am maŋge sambe talip ekŋen kapiyaŋ neŋ giti penaŋ zemneman koban keyet yaŋaŋ ekmâtâtâtgat mulup msât tati dingoyap.” ⁴³Kegok zemti kwizet temaŋ pigok kuye, “Lasalus, geŋ pien kwatot!” ⁴⁴Zeme am gakikiŋaŋ piwan banisiyaŋ setnaŋ betnaŋ kwasim pepeŋaŋ ma ŋokŋaŋ saŋgum meselem zempewien melesiŋ kwatopme Zisasiyan zeye, “In banisiyaŋ betetak temaŋ mpepeŋaŋ e kwalet pemti peme melak.” Zeme kwalet pewien.

Zuda an ŋeŋaŋ ekŋenaŋ Zisas kume gakikiyet zemdelan zempewien

⁴⁵Âpme Zuda am sambe Maliayet ipmaŋgat siyet kobien ekŋenmagengatnaŋ am sambe notnaŋaŋ Zisasiyan muluwaŋ mamanan aŋ mme ekti nâmkinpempewien. ⁴⁶Âpme notnaŋaŋ belak Palisi ekŋenmagen meti Zisasiyan Lasalus gakikiengatnan mme watage keyet zet zapatnaŋ mimindawien. ⁴⁷Minindame nâmti sâpe sâpe bumbu an ŋeŋaŋ temaŋ ma Palisi egat kandaŋan mambien ekŋenaŋ an ŋeŋaŋ bembe notnaŋ indazemtetime kot ondekme pigok diindowien, “An kapi muluwaŋ mamanan omba penaŋ am sutnan tapmmezina kapi zigok msawanup? ⁴⁸Nin nâmti belak nâmpemti mamann am sambe bepi ekmagen met tusemâpme delaŋ zeme Loma amobotnaŋ manndadamuŋ min egaŋ ekme ŋep ku beme ningalen sesewat mka temaŋ pi kumasek yaloŋti aminne eyo indom yalom bep!”

⁴⁹Ekŋengat tunguwinagatnaŋ an ŋen kwitnaŋ Kaipas ek kan keyet sâpe sâpe bumbu sambe ekŋengat ŋeŋaŋin mamtan. An keyaŋ pigok diindoye, “In sambe bekapi keŋinpiŋ penaŋ! ⁵⁰Nin am sambe bekapi waleletgat zapat etaŋ bemâpmann ŋep ku bewe keyepmti an kwewaŋ ningat dopm gakimti am sambe pi ma nin mee eyo ndamukulem mbe.” ⁵¹Zet ke belak ikaŋgat keŋaŋgalak ku zeye. Kawawaŋaŋ zet ke keŋanen beme zemkawaŋ beye. Nup kan keyet egaŋ sâpe sâpe bumbu sambe ekŋengat ŋeŋaŋin mamtan keyepmti kwitnaŋ kwitnaŋ bam sokbewe keyet zetnaŋ zemkawaŋ beye. Zisas ek penaŋ Zuda am nin yomengatnan gilik zemti ndatitiyet gakikiyet zenzeŋaŋ. ⁵²Wa ke Zuda am ekŋen etaŋ indamukulem mimiyeŋ etaŋ ku gakiwe. Egaŋ gakimti am Kawawaŋgalen maŋge msat kataŋ mamanan nin bepi ondekndeme maŋga kwep bemti mamambanup.

⁵³Âpme Zuda an ŋeŋaŋ ekŋenaŋ kan keyet yaŋbemti Zisas kume gakikiyet zetnaŋ mbien. ⁵⁴Âpme Zisas Zuda amobotnaŋ ekŋenaŋ mineti

gakikiŋaŋ temaŋ ewe tapme sutnateman kume gakinakmagengapmti Zuda msalen sosok penaŋ ku maŋge egaŋ nin msat tuŋgupman keyet ganzenan mka ŋen kwitnaŋ Epalaïm zeme ke met mamtemenn.

⁵⁵ Zuda am ekŋengalen Aŋgalalaŋ Kendonin ke sokŋan beme mka isisikŋaŋ am sambe ekŋenaŋ Zelusalem mka teman yominangat nâmti Kawawangat sâpe sâpe busâgât ewejanak ŋejaŋ mepmâbien. ⁵⁶ Meti Zuda am ekŋenaŋ sesewat mka temanen motati Zisas zimosetnaŋ timati ilinak met zenâm kot zenâm mti zewien, “An kapi pe Aŋgalalaŋ Kendoyet kapi kopme eksenup manze weyaŋ zeme nâne.” ⁵⁷ Zeme Palisi an ma sâpe sâpe bumbu ŋejaŋ ekŋenaŋ zet pigok am zemkabem indawien, “Zisas kopme ekti ningat kot sakwep zemsokbemndaseip. Mme nin an ke wati met mka katikŋaŋ pesenup.”

Lasalusiyet wenenaŋ Malia egaŋ Zisas wet sesik dolakŋaŋaŋ zulutpeye

12 ¹ Aŋgalalaŋ Kendo tatagalen kasup 6 ewe tapme Zisasmak nin Betani mkaen mebenn. Nin mka ke Lasalus gakikiengatnan mme wage keyet motabenn. ² Zisasmak nin mepmann ekti notnane ekŋenaŋ tu meu weyaŋ bume mopme ambepeleti met Matayelen mkaen tapme am zeme moti Zisasmak nin Lasalusmak totapmann Matayaŋ tu meu timti kalop bem ndame nimbenn. ³ Ke tati tatnimann Maliayaŋ wet sesikŋaŋ dolakŋaŋ penaŋ tosaŋaŋ mobotnaŋ penaŋ makwitimtemien ke nukŋaŋaŋ temaŋ pi mkoti keyaŋ Zisasiyet setnan mulapme topme zulutpemtî ŋoksinaŋaŋ kapupeye. Âpme mka kejaŋ tapmambenn bee wet sesik dolakŋaŋ bepiyaŋ pimpemtî tage. ⁴ Âpme nempaŋane ningat tuŋgupmnaŋgataŋ Zudas ek Iskaliot mkaengataŋ nempa keyaŋ maneti Zisas bam zemkuwe. ⁵ Egaŋ nâmti pigok zeye, “Wet kelakŋaŋ sesikŋaŋ dolakŋaŋ penaŋ kabon kapi belak mti met bemann amnaŋ 300 Kina ndame mti am bekopsat ekŋen indawenek ze ŋep benak!” ⁶ Egaŋ wa mânep ke timti am bekopsat penaŋ indasât nâmti ku zeye. Egaŋ ningalen mânep ele nemuŋŋ ke mmamti mânep ndame mwatpemtî mânep butnaŋ buzak kambu matim makumkwitim nimtan keyepmtî ndame wanok kok mbak nâmti zeye.

⁷ Âpme Zisasiyaŋ pigok zeye, “In imbi kapiyet zet sambe zenzepiŋ. Egaŋ wet sesikŋaŋ dolakŋaŋ ke neŋ sekŋ kapi zulutneinen maneti gakima nabembeyet nâmti kwitimti beme matazin yaŋ alak kapi zulutnein. ⁸ Am bekopsat sambe ekŋen bepi inmak msalen kapi kan teepmaŋ ewe mamambep mme neŋ inmak kan teepmaŋ ewe ku mambap.”

⁹ Âpme Zisasiyaŋ Betani mkaen ke met Lasalusmak mame Zuda am ekŋenaŋ zapatnaŋ nâmti Zisasmak Lasalus an Zisasiyaŋ gakikiengatnan mme wage an ke eyo ilisakwep idiksâgât kobien. ¹⁰⁻¹¹ Zuda am ekŋenaŋ Lasalusmageset sâpe sâpe bumbu an ekŋen bamkum indemti Zisas mâti mepmâbien. Keyepmtî sâpe sâpe bumbu an ŋejaŋ ekŋenaŋ Zisasmak Lasalus ilisakwep idome gakikiyet zetnaŋ zewien.

Zisas Zelusalem mka teman mowepme kwizet bujaman mwabien
(Matiyu 21:1-11; Mak 11:1-11; Luk 19:28-40)

¹²Msat msame am sambe penañ ekñenañ Anğalalañ Kendo tasâgât Zelusalem mka kopmâbien ekñenañ zet pigok nâmbien: Zisas ewe selen baen takozin zeme nâmti ¹³ekñenañ niwet sinañ mee pi mutum timti Zisasmak nin selen baen ndaiksâgât mepmâbien. Met ndaikti kwizet bujaman mwati kwizet pigok kumbien,

“An kapi Amobotnañ Kawawañañ ikñañ zempeme kozingat Kawawañgat kwizet bujaman mwati sesewatpene! Kawawañañ ikñañ Israel am ningalen Amobotnañ kapi keñ sewakñañ mpen.”

(Sam 118:25)

¹⁴Keyet Kawawañgalen Zet Itnañanen kapigok zenzeñañ keyet katañ Zisasiyañ doñki nembrañ ñen aikti keyet dukñan totati moge.

¹⁵“Am Zaion mka temañ talip in ku kingalit. Amobotnañin ilak kozin. Egañ doñki nembrañ ñeniyet dukñan mot totati ingalen kozin.”

(Zekaraia 9:9)

¹⁶Nembrañane nin kwitnañ kwitnañ sokbeye ke ekbennangut yañañ ku nâmâtâbenn. Yañ bam Zisasiyañ gakimti kululuñen mundumañ sanga songañañmak keyet keñan ewe mowepme nin Kawawañgalen Zet Itnañanen zet keyet yañañ eknâmâtâti pigok otnâmbenn, “O, an pi sesewatpewenn ke meluwañ pi mimiñañ keyet katañ penañ msawenn.”

¹⁷Zisasiyañ Lasalus gakikiengatnan mme wapme am sambe tati ekbien ekñenañ meti am notnañ zet zapat mimindame ¹⁸am sambe penañ ekñenañ zapat ke nâme delañ zeye keyepmti ekñenañ selen meti Zisas aikbien. ¹⁹Aiksâgât selen mepmâpme Palisi ekñenañ indikti ilinak zenâ zenâ mti zewien, “Nin belak zet mulup etañ tapmmann am sambe bepi ilak ekmagen met tusume delañ zemâzin!”

Glik am notnañ ekñenañ Zisas eksâgât mebien

²⁰Zuda am Anğalalañ Kendoyet Zelusalem mka teman Kawawañ sesewatsasât mopmâbien kan keyet Glik am notnañañ kegogak Kawawañ sesewatsasâgât koti tapmambien. ²¹Yañ an ekñen keyañ Pilip Galili msat keyet mka ñen Betsaida keyetnañ ekmagen meti zewien, “An notn, nin Zisas eksâgât nâmti kotnup.”

²²Zeme Piliwañ met Enduluyet zeme wati ilisakwep Zisasmagen meti “Glik am notnañ giksât kolip,”

²³zemalu Zisasiyañ nâmti zeye, “Kawawañañ Angat Nemunañ kwizet bujaman mwat peme amnañ eegalen temañ ilak dangoin. ²⁴Neñ zet penañ pigok zema nâit, nin sangom alik kwewetañ sumuñti kasiñen bemann e ikñañ kwep keyak matazin. Yañ msalen met ondemann moti penañ bilimak sambe mapein. ²⁵Âpme an ñenañ msalen kapi mamti nâgât kwizet bujamnangapmti

mamaŋaŋ ketalasiwe beme bam mama kanzizit tiwe. Âpme am ŋenaŋ nâgât kwizapatnnaŋgat mti mamaŋaŋ ketalat ku pewe beme bam an ke walelet aikbe. ²⁶Am ŋenaŋ nâlen sisiliŋ nemba besât nâmba beme neŋ mambawenak napmâpmeti mulupm mti mambe. Am ŋenaŋ nâlen mulup mti mambe beme Bienaŋ kwizet buŋamaŋ mwapewe.

Zisasiyaŋ gakikiŋaŋgat yaŋaŋ zemkawaŋ beye

²⁷Pi gakikiyelen kan sokŋan penanŋ kopme nâmti keŋŋ sindem penanŋ bein. We, ne pe zigok msap? ‘Bien, geŋ kan bewanan kapi seabem neneyelen zesap ma zigok?’ Wa kekok yek, sindem kekok ke titiyet msalen kapi toban. ²⁸Keyepmti Bien, geŋ ŋepgat nukŋaŋ beke pemane nâgât palen mopme keyaŋ gâgât kwizet buŋamdi mwabe!”

Zeme kululuŋengatnaŋ zet pigok sokbeye, “Geŋ mmane nâgât kwizet buŋamm msalen ke palakŋaŋ beyeyaŋ ewe mmane omba penanŋ palakŋaŋ bem mekobe.”

²⁹Âpme am sambe ninmak tapmambenn ekŋenaŋ kwisak ke nâmti zewien, “Kululuŋ kwisak kun.”

Zeme am notnaŋaŋ zewien, “Kawawaŋgalen ensel ŋenaŋ Zisas zet tadunduin.”

³⁰Zeme Zisasiyaŋ zet ke nâmti pigok zeye, “Wa zet ke nâgât mti ku zep. Ingaŋ mti kululuŋengatnaŋ zet ke sokbep. ³¹Pi ilak msalen am Kawawaŋaŋ zelin nâmti keyet dopmaŋ mutumindandayelen kan bein. Keyepmti msalengalen mama mimi mgasik keyelen toŋaŋ Sadaŋ ilak mkutupeme wembe. ³²Âpme neŋ tep palen palak palak wema nomnemti mwatonzemnewep kan keyet msat sambe am ekŋenaŋ zapatn ke nâmti neŋmagen kot tusumti mambep.” ³³Ke Zisasiyaŋ gakiki zigok gakiwe keyet zetnaŋ zemkawaŋ bemindaye.

³⁴Zeme nâmti am tabien ekŋenaŋ pigok dunduwien, “Nin Kawawaŋgalen Zet Itnaŋanen zet kapigok maeknup, Kilais ek msalen koti gakikiŋiŋ kwesiŋ kwesiŋ mamambe. Âpme naman geŋ eneyet pigok zenik, Angat Nemuŋaŋ ek tewen kumti mwatonzempewep. Geŋ Angat Nemuŋaŋ ke pe an kwiyet penanŋ nâmti tazenik?”

³⁵Yaŋkwesime Zisasiyaŋ zet dopmaŋ pigok gilik zem diindoye, “Nâlen taŋamm busatnaŋaŋ ingat tunguwinan kan isikŋaŋ bugan busatnaŋ bemti tabe. Tapme in taŋam sokŋaset ke ekti mebep. Mineti in tambusosok temaŋaŋ indasumuŋme keyet keŋan mebepmagengat ek titiwep. Geŋ tambusosok kiŋkiŋaŋ keŋan mebegen set ŋep ekmâtâti ku mebek. ³⁶Keyepmti taŋamm busatnaŋ toŋaŋ neŋ ewe kapi yagak tapma in nâgât nâmkinpemti nâgât nemunamban penanŋ bewep.” Zisasiyaŋ zet kekok dinndomti buzak pak zemti met enzilim mebenn.

Zuda am notnaŋaŋ Zisas ku nâmkinpewien

³⁷Zisasiyaŋ am zikalin palen penanŋ menok sepem igak igak mme ekbienangut am sambe penanŋaŋ ku nâmkinpewien. ³⁸Bee golaŋ zenze an Aizayaŋaŋ eweŋan baen zeye keyet kataŋ amnaŋ mbien. Egaŋ pigok zeye,

“Amobotnañ, am pe kwiyañ penañ ningalen zet nâmkînpewe? Ma Amobotnañ am pe kwi penañmagen menok mme windendi temañ ke ekbep?” *(Aizaya 53:1)*

³⁹Amnañ Zisas ku nâmkînpewien keyet zetnañ eweñañ golañ zenze an Aizayayañ ikañjak zet ñen ewe pigok zeye,

⁴⁰“Am ekñañ zet zapatn nâmti nâme belakñañ mambein keyepmti am ekñañ keyañ kwitnañ kwitnañ ñen ekti yañañ nâmâtâbiekmagengapmti Amobotnañ zikalín ma keñin mee pi mme bubep pemâge. Mineti ekñañ eknâmâtâti keñ gilík zenze aikme weyañindenakmagengapmti kegok mge.” *(Aizaya 6:10)*

⁴¹Golañ zenze an Aizayayañ zet zeye kapi egañ Zisasiyelen mulupmañgat windeñañ bam kwabe beke ektati egat zetnañ kapi zeye.

⁴²Âpme an ñeñañ bembe notnañ ekñañ Zisas nâmkînpewien. Yangut nâmkînpewenn sosok zemkawañ bemann Palisi ekñañ ndiksokbemti paset zupman ndamâpme towewanupmagen zemti buzak mamtemien.

⁴³Ma am ekñañ zapatn nâmti mme kwizapatn tototnañ bewemagen zemti nâme nukñañ beye. Mti ekñañ Kawawañ kwizet buñamañ mwatpepyet nâme tototnañ beye.

Zisasiyelen zetnañ bam zemndowe

⁴⁴⁻⁴⁵Zisasiyañ zet pigok bekap penañ zeye, “Am ñeñañ neñ níkmâtâti nâmkînpemnewe beme wa neñ etañ yek an zemneme toban ek eyo ekmâtâti nâmkînpempewe. ⁴⁶Neñ kululungatnan msalen kapi am mbusatnañ bemíndesâgât toban. Âpme am ñeñañ neñ nâmkînpemnewe beme egañ tambusosogengatnan nâlen busatnanen kwabe. ⁴⁷Am ñeñañ zetn nâmti wisat mti bamkumpewe yangut neñ keyet dopmañ ku sawap. Neñ wa am yominangat dopmañin indandayet msalen kapi ku toban am yomengatnan gilík zemti indatitíyet toban. ⁴⁸Âpme am ñeñañ neñ bam kumnemti zetnnañgat wisat mbe beme bam zet mulup temanen tabe. Zet zema wisat mamin zet kapiyañ ikañ kan delañ zenzeñangat zet muluwen peme tati ekbe. ⁴⁹Wa neñ zet kapi nanangat keñnañgalak ku manzeyap. Bien zemneme toban egañ ikañ zenzeyet zemâtâtñañge keyet katañ penañ manzemkawañ beyap. ⁵⁰Neñ zetnañ ikañ kapiyañak am mama kanzizit maaikindain e nâmkînpemti keyepmti egalen zet ke ikañ zemâtâtñañgenok esemteñ manzemkawañ beyap.”

Zisasiyañ ningat setn zulutndeye

13 ¹Angalalañ Kendo tatagalen kasup kwep ewe tapme Zisasiyañ pigok nâñge, “Olak, neñ msat kapi pemti Bipmmagen mobogalen kan ilak bududuk penañ bein,” nâmti ammak nin ek nâmkînpemti ekmak oloñkati oloñen palen mamamtemenn keyepmti ningat kembeñ temañ penañ nâmnndeye.

² Zisas ma nembajane nin tambume tu meu nsâti mot ondektati tatnneti pemann Saimongat nemuñaj Zudas Iskaliot mkaengatñaj ek Sadañaj Zisas zemkukuyet zet kelakñaj mpeye. ³ Âpme Zisasiñaj pigok nânge, “Bienaj kwitñaj kwitñaj sambe pi nâgât betnnan beye. Âpme neñ ikñajmagengatñan toban yanaman ewe gilik zemti naman ikñajmagennak mowebap.” ⁴ Ke nâmtati egañ meu nini mundumengatñan wati kâlâpmañ teepmañ sakñangatñaj bee gulupeme weme taot mti pemanen kwasimpemti ⁵ tu pelewen kasime topme mti yañbemti nembajane nin sambe setn palakñaj zulutndemti taot pemanen zampeye ke mti takaput ndemepmañge. ⁶ Tapmmetneti Saimon Pitamagen koti setñaj zulupesâpme egañ pigok zeye, “Amobotñañ, geñ eneyet neñ bukapiyet setn penañ pi zulutnesenik?”

⁷ Zeme Zisasiñaj pigok dunduye, “Neñ muluwañ tapmiyañ kapiyet yañaj penañ alak kapi ku nâmâtâdik bamgegut o nâgâek piwan yañaj pigogapmti tapmnemañge e nâmâtâbanik.”

⁸ Âpme Pitayañ pigok zeye, “Yek penañ, geñ nâgât setn zululupin!”
Zeme Zisasiñaj pigok zeye, “Neñ sedi ku zulutgesap beme geñ neñmak tususunit ewe ku tabe.”

⁹ Zeme Pitayañ pigok dunduye, “Amobotñañ, kegok beme setn etañ yek, betn ma ñokñ mee temakwep zulutne!”

¹⁰ Zeme Zisasiñaj pigok dunduye, “Amnañ tu zuluti bam belaknik meti kot witalip selinan etañ zuluti matalip. In sambe kapi yompiñ kwetetepmañ etañ bemâbien. Âpme tunguwinangatñaj an kwewañ kwetetepmañ penañ ku mamain.” ¹¹ Egañ an zemkuwe egat nâmti keyepmti pigok zeye, “In sambe kapi dolakñaj etañ yek; an kwep bekañaj.”

¹² Setn zulut mepme delañ zeme kot kâlâpmañ ewe mim munduñti met munduman tot tagom tati pigok dinndoye, “In neñ selin zulutindeya kapiyet yañaj ñep nâip? ¹³ In nâgât Amobotñañaj ma An zikat indandan manzeip e ñep nâmnemti manzeip. ¹⁴⁻¹⁵ Âpme neñ Amobotñañin ma An zikat indandañin manâmneip neñ alak selin zulutindema egip sepem kegogak in ilinak ñenañ ñengat setñaj zulutpem ñenañ ñengat setñaj zulutpem mammambep. ¹⁶ Neñ zet penañ pigok diindoma nâit, sisiliñ namba ñenañ Amobotñañaj sebempemti egañ mobotñañ ku mamain ma amobotñañ ñenañ namba ñen mulup zet manzempeme mezin beme namba mamezin keyañ an mulup zet masain ke ñep ku mamtopein. ¹⁷ In zet kapi dinndoma nâyo keyet katañ penañ mbep beme in set ke ekme dolakñaj beme oloñen mbep.

¹⁸ Neñ zet kapi zema in sambe ilinsakwep ku indati mâzin. Neñ in sambe kapi nenn nâmti indati mâban. Âpme kwep ñen bekañaj e nâmtiñgut waban keyepmti ekmagen Kawawañgalen Zet Itnañanen zet ñen pigok tazin ke katikñaj bewe,

‘An neŋmak meu pelep kwep nilut egaŋ neŋ zemnowe.’ (Sam 41:9)

¹⁹Kwitnaŋ kwitnaŋ kapi penaŋ ewe sokbembepiŋ tapme neŋ eweŋanak diindoyap keyepmti kwitnaŋ kwitnaŋ nâgât palen tasokbeme ekti pigok nâmbep. ‘O, Amobotnaŋaŋ iŋaŋ zeme nâmbenn wan penaŋaŋ ilak alak kapi sokbemsame eknupmak,’ nâmbep. ²⁰Neŋ zet penaŋ sukwep pigok zema nâit, am ŋenaŋ neŋ an ŋen zempema kopme egaŋ kwitnaŋ kwitnaŋ dolakŋaŋ mimindawe beme wa ekŋen mimindanup zemti neŋmak Bien zemneme koban nit eyo keŋ taolet minndawe.”

**Zisasiyaŋ nembraŋane ekŋenmagengatnaŋ ŋenaŋ zemkuwe keyet
zemkawaŋ bemindaye**

(Matiyu 26:20-25; Mak 14:17-21; Luk 22:21-23)

²¹Zisasiyaŋ zet kekok zeme delaŋ zeme Zudasiaŋ alak zemnosem e nâmti keŋaŋ bekaŋaŋ penaŋ beme nembraŋane nin pigok zem sokbemndaye, “Neŋ penaŋ sukwep penaŋ zema nâit, ingat tuŋguwinanŋatnaŋ ŋenaŋ neŋ zemnosem.”

²²Zeme nâmti nembraŋane nin weŋŋ mepme nnak meek koek mti pe kwiyet nâmti zein zemti nâpemann mekwapme tabenn. ²³Âpme nembra ninmagengatnaŋ Zisasiyaŋ nâmpeme dolakŋaŋ penaŋ mambemtan nembra keyaŋ Zisasiyet solonan penaŋ totapmaŋge. ²⁴Keyepmti Saimon Pitayaŋ nembra keyet zikat petaŋ mti zeye, “Kwiyet nâmti tazein ze belaknik yaŋkwesimane ningat zeme nâne.”

²⁵Âpme neŋ uluŋzemet Zisasiyet wakŋanen bemti pigok yaŋkwesiwan, “Amobotnaŋ, geŋ zet kapi ninmagengatnaŋ kwiyet nâmti tazenik? Ze zemane nâne.”

²⁶Yaŋkwesima Zisasiyaŋ pigok dinoye, “Neŋ meu tuŋanen nupmamaŋ pema topme olek sama nsem an keyet nâmti tazeyap.” Kegok zemti nupmamaŋ peme topme mkwati Saimongat nemuŋaŋ Zudas Iskaliot mkaengatnaŋ ke same mti niŋge. ²⁷Nime nime keyegak Sadaŋaŋ keŋanen toti keŋaŋ mme yuŋgume delaŋ zeye. Âpme Zisasiyaŋ pigok dunduye, “Geŋ keŋdan kwileki msâgât tatnânik elak sakwep meti miya!” ²⁸Zisasiyaŋ Zudas zet kekok tadundume nembra nin tabenn nin Zisasmak Zudas egelaŋ zet eneyet tazelup ke ku nâmbenn. ²⁹Keyepmti nembra notnaŋaŋ pigok otnâmbien Zudas ek ningalen mânep egaŋ mandamuŋ min keyepmti Zisasiyaŋ Kendoyet meu nim tabanupgat nâmti meu met kwititiyet mene ma am bekopsat ŋen mânep met sasayet tazempein mene nâmti tapmambenn.

³⁰Âpme nupmamaŋ Zisasiyaŋ Zudas olek same nim pemti keyegak tambu sutnan toti mege.

³¹Zudasiaŋ toti mepme mepme Zisasiyaŋ nembraŋane nin pigok dinndoye, “Angat Nemuŋaŋ neŋ alak nukŋaŋ palen mopma keyaŋ kwizet buŋamm temaŋ tisowap. Âpme nâgât paleseti Kawawaŋgalen

kwizet bujanan kegogak teman bemesâpm. ³²Âpme Kawawanjan Angat Nemunan neŋ kwizet bujamm ammagen mpalaknan beme neŋ egat kwitnan kegogak mwat onzempewap. Kelak belaknik penan kapi sokbeme eksâip. ³³Nembanne, neŋ inmak kan isiknan bugan kapi etan tasâpmnup. Âpme bamgat in neŋ tokwati natimapme bewe. Âpme neŋ zet Zuda an damuŋ diindowan keyegak naman ingat diindoma nâit, ‘Neŋ mebap ke in neŋ ku kobep.’ ³⁴Kegogapm neŋ zii zet alaknan pigok diindoma nâit: In ilinak nenan nengat gogot nenan nengat gogot mti gogot palenak mambep. Neŋ in gogot mimindemti indatimamkolap sepem kegok in ilinak mti mambep. ³⁵In kegok mti dolaknan mame am eknenan in nâgât nembanne mamaip e sosok nâmâtât indewep.”

Pitayan Zisas zemkandatpesem keyet zemkawan beye
(*Matiyu 26:31-35; Mak 14:27-31; Luk 22:31-34*)

³⁶Âpme Saimon Pitayan pigok yankwesiye, “Amobotnan, geŋ pe deset mebanik?”

Yankwesime Zisasiyan pigok zeye, “Neŋ mebawen geŋ keyegak neŋ ku kobanik bamgulak neŋ kobanik.”

³⁷Zeme Pitayan pigok zeye, “Amobotnan, geŋ pigogat neŋ ku gapmât kokogat zenik? Neŋ gâgât mti geŋmak meti maman neŋ ketalasiwap nânik!”

³⁸Âpme Zisasiyan pigok dunduye, “Geŋ nâgât mti neŋmak meti sekdi ketalasi sâgât zenik? Neŋ penan sukwep pigok zema nâmbak, tambu sutnan sakokolok kwitnan ewe kukupin tapme geŋ sek tuk zemkandat newanik.”

Zisasiyan Kawawanmagen mebegalen set damuŋ bein

14 ¹Zisasiyan nembajane nin pigok dinndoye, “In nâgât kember teman mti keninan yayan teman ku mit in belak Kawawanmak nit nsakwep nâmkinpemndemti windemak talit. ²Bienan mamainen gwaen mka sambe sambe penan wemezin e ku tatnak ze neŋ met mkanin weyanpepeyet zetnan kapi ku diindowak. ³Neŋ pi meti mundumin beke weyanne weyanne pema delaŋ zemeŋgut naman gilik zemkoti indatima nsakwep meti neŋmak ke mamambanup. ⁴Neŋ mebap in mka set ke nâip.”

⁵Zeme Tomasiyan pigok yankwesiye, “Amobotnan, geŋ pe deset mebanik? Nin zet tazenik kapi ku weyan nâmâtâtnup keyepmti nin pe set zigoset gâlen ke kwabanup?”

⁶Zeme Zisasiyan pigok zeye, “Set ma zet penan ma mama keyet toŋan neŋ. Neŋ kandat nemti nenan igak set belakaset Bienmagen neŋ ku mobogalen. ⁷In ewenanak baen mamkwabennen ke nâgât Kilais kegok nâmâtât nembiek ze Bipmnanŋat kegogak neŋ nâmâtâpewiek. Yan alak pi

kwitnaŋ kwitnaŋ sambe nâgât palen kwapmâsâpm ke ekti Biengat yaŋaŋ ɲep ekmâtâsâip.”

⁸Kegok zeme Piliwaŋ pigok zeye, “Geŋ Bipdi ke de ze zikat ndamane nin ekti nâmann delaŋ zeme oloŋen palen mambanup.”

⁹Zeme Zisasiyaŋ pigok dunduye, “Pilip, neŋ kan teepmaŋ bepi inmak mamkwaban pi geŋ ewe yaŋaŋ ku niknamâtâtnik? Am ɲenaŋ neŋ maniknâmâtâzin beme egaŋ Bien maekmâtâzin. Âpme geŋ zigogat pigok nayaŋkwesinik, ‘Geŋ Bipdi ke de tazin ze zikat ndamane ekne’?”

¹⁰Bienmak nit kwep mamamti napmukulem mme mulup mamiyaŋ pi Pilip, geŋ ewe ku manndikmâtâdik? Neŋ zet sambe mandiindoyap ke wa nanangat keŋnaŋgalak ku manzeyap. Bienaŋ neŋmak mamti zet keŋnaŋ bemneme manzeyap. ¹¹Bienmak nit kwep mamalup manzeyap. In zet ke penaŋ nâmkɲepewep. Neŋ zelaŋ etaŋ zema nâme zet dâsukinok besemagengat mulup sambe mamiyaŋ beke ekti penaŋ nâmkɲepemnembe. ¹²Neŋ zet penaŋ pigok diindoma nâit, am ɲenaŋ neŋ nâmkɲepemnewe beme egaŋ neŋ mulup mamiyaŋ kabonaŋ ɲep mbe. Ya wa ke etaŋ yek egaŋ neŋ mamiyaŋ ke sebempemti sambe mmebe. Neŋ Bienmagen mobap keyepmti am ekɲen ke winde indamti indamukulem mimindema ekɲenaŋ mulup kekok mbep. ^{13,14}In neŋ nâmkɲepemnemti nâgât kwitnnanen kwileki ɲeniyet nâmti dundum name neŋ keyet penaŋaŋ ɲep maaikindamambap. Kegok mma Bienaŋ nâgât paleset kwizet buŋamaŋaŋ temaŋ tiwe.

Zisasiyaŋ Emetak Teŋ peme totogat zetik mge

¹⁵In nâgât gogot mti mamambep beme in nâlen zetn manzeyap kapi maŋgawepup. ¹⁶Keyepmti neŋ moti Bipmnaŋgat zema egaŋ ingat mukulem mimiŋin ɲen peme toti inmak kwesiŋ kapi mamti maindamukulem mmambe. ¹⁷Zet penaŋgalen Emetak Teŋ kapi am msalen nâmkɲepepenpiŋ belak kileŋ mamaip ekɲenaŋ ku tiwep. Ekɲenaŋ ek ku ekbien ma keyet yaŋaŋ ku nâip. Âpme ingut egat yaŋaŋ nâip keyet mti ingat keŋinan mame in egat yaŋaŋ nâmpaip.

¹⁸Neŋ gakimti indemti mebet katikɲaŋ penaŋ ku mebap; Neŋ bam ewe gilik zemti inmagen kobap. ¹⁹Neŋ kan isikɲaŋ bugan kapi tapmoti gakimti naman wabap. Âpme am msalen belak kileŋ mamaip ekɲenaŋ ku nikbep. Âpme ingut ɲep nâmkɲepemnemti mamaip keyepmti nikbep. Neŋ mama kanzizit ke indama timti mambep. ²⁰Neŋ gakikiengatnan wabap kan keyet Bienmak nit kwep penaŋ bemti mambalup ma neŋ kegogak inmak kwep bemti mambanup. Keyet yaŋaŋ ɲep mamaŋinaŋ ekmâtâbep.

²¹Am ɲenaŋ nâlen zeomkalili sambe kapi nâmti gawepumti nâgât kandaŋnnan meti nâgât gogot mimnewe beme Bipmnaŋ an ke kegogak gogot mpewe. Âpme neŋ an ke gogot mpemti yaŋaŋ penaŋ zemkawaŋ bem sama nâmatâtnembe.”

²² Kegok zeme nâmti Zudas Iskaliot mkaengatnaŋ keyet opmaŋaŋ pigok yaŋkwesiye, “Amobotnaŋ, geŋ kwilekiyet yaŋaŋdi am sambe bepi aŋgalaŋ indemti nin etaŋ kapi zemkawaŋ bem ndasâgât etaŋ pi zenik?”

²³ Yaŋkwesime Zisasiyaŋ zet dopmaŋ pigok gilik saye, “An ŋenaŋ neŋ gogot mnewe beme egaŋ nâlen zet nâmti ŋep gawepuwe. Âpme Bipmnaŋ ek gogot penaŋ mpewe keyepmti Bienmak nit nsakwep ekmagen koti ekmak mamambalup. ²⁴ Âpme an ŋenaŋ nâgât wisat nâmnembe beme egaŋ zigoset zetn nâmti ŋep gawepuwe. Zet sambe mandiidomkwapma nâip ke wa nenaŋgalen ŋoktikŋnaŋgat etaŋ yek. Bien zemneme toban ekmagengatnaŋ ke timti mandiindoyap.

²⁵ Nenn ewe inmak kapiyak mamti zet kapi mandiindoma nâip. ²⁶ Âpme neŋ moti zema Bienaŋ mukulem mimiŋin Emetak Teŋ ke zempeme egaŋ toti nânâ dolakŋaŋ sambe sambe zikat indamâbe. Mti neŋ zet diindoma in notnaŋ kandapmâbien mee pi ewe mbutem indame nâmbep.

²⁷ Neŋ indemti mesât tati betziŋŋ keŋ sewakŋaŋ palen mama ke indayap wa ke am belakŋaŋ ŋenaŋ mamimindaip keboŋ yek nenaŋgalen keŋ sewakŋaŋ penaŋ ke keŋinan bemindeyap. Keyepmti neŋmagen kwitnaŋ kwitnaŋ nukŋaŋ sambe sokbeme ekti in keŋin yayaŋ temaŋ kwapme ku kiŋgabep.

²⁸ Neŋ ŋenaŋ pigok diindoma nâyo, ‘Neŋ indemebawaŋ met maneti bam ewe inmagen gilik zemti kobap.’ In keŋin neŋmagen penaŋ bempemti mamambiek ze neŋ Bien an windenaŋbeŋ ekmagen mobap zema nâmti oloŋen temaŋ mbiek. ²⁹ Pi ewe kwitnaŋ kwitnaŋ sokbembepiŋ tapme eweŋanak tadiindoyap keyepmti in tati ekme kwitnaŋ kwitnaŋ nâgât palen ke sokbeme ekti zet tazema nâip kapi nâmkinpewep. ³⁰ Neŋ zet sambe teepmaŋ ku diindosap msat kapiyelen damuŋ Sadaŋ ek ilak kokogalen bududuk penaŋ min. Egaŋ neŋ ŋep ku mtot neneyelen. ³¹ Neŋ Bienaŋ iŋŋaŋ zemâtâtneye keyet kataŋ Bien gogot msamti zetnaŋ gawepumti mulup sambe kapi mmepma msalen am sambe kapiyaŋ nikmâtâpmâbep. Keyet wapme ilak mka pi pemti metne.

Zisas ek wain tep yaŋaŋ nembon

15 ¹ Neŋ wain tep yaŋaŋ ŋotekŋaŋ penaŋ âpme wain mulup keyet toŋaŋ Bienaŋ iŋŋaŋ bein. ² Keyet mti mulupmaŋ mmeti ekme betnaŋ ŋen neŋmagen om mebetnaŋaŋgut penaŋaŋ pepepiŋ tapme ekti maantimpeme mezin. Âpme naman betnaŋ ŋen ekme penaŋaŋ dolakŋaŋ maelikzin beme egaŋ weyaŋ betnaŋ bekaŋaŋ notnaŋ elengem time topme tati penaŋaŋ sambe maelikzin. ³ In neŋ zet diindoma zetn nâmti nâmkinpemti ilak kwetetepmaŋ bemti neŋmagen tusumâbien. ⁴ Keyet mti in neŋmak tususuŋin dolakŋaŋ mme neŋ inmak tususu kegogak dolakŋaŋ mti mamambanup. Âpme wain tep betnaŋ ŋen pemanen daen tususuŋin belak igak tuŋgupman anzam tati penaŋaŋ igak ŋep ku maelikzin. Egaŋ tep penaŋmak daen tusum tatiŋgut penaŋaŋ maelikzin. Âpme in kegogak neŋmak tususuŋin mambep beme in penaŋin dolakŋaŋ zigoset elikbe?

⁵Wain tepmaj bee neŋ mme sinaj betnaŋ e in keyepmti am ŋen neŋmak tususunit kwep tabe beme am kemagen penajaŋ omba elikmâbe. In neŋ nemti ilinak etaŋ anzam tati kwileki ŋen pembenaj ku aikbep. ⁶An ŋen neŋmak tususunaŋ tapme keyet penajaŋ ku sokbein beme neŋ tususunit ke eleŋgem pewe. Âpme wain betnaŋ eleŋgem time towemti angasimti memuj bem weme timti tewen time moti manzin ek sepem kegogak msawep. ⁷In neŋmak tususunaŋ kwep tapme zetn gawepumti mambep beme in kwileki ŋeniyet nâmti dundum nawep beme neŋ keyet penajaŋ msokbewap. ⁸In ammagen mulup mme am nâmkijpepamak sambe sokbemâbep beme set keyeset am ekŋenaŋ in nâgât nemunnambanne penaj mamti mulup mamip e indikmâtâti Kawawaŋat kwizet bujanaŋ omba penaj mwabep. ⁹Âpme in neŋmak tususunaŋ matazin keyepmti in am sambe gogot mamimindeip keyepmti neŋ ingat gogot penaj mamimindeyap sepem kegogak Bien Kawawaŋaŋ neŋ gogot penaj mamnain. ¹⁰Âpme neŋ Biengalen zet sambe bee gawepumti mamiap keyepmti Bienaŋ nâgât gogot penaj mamnain. In sepem kegogak nâlen zetn sambe gawepumti mambep beme neŋ ingat gogot penaj mimindewap.

¹¹Âpme neŋ oloŋen palen mamayap keyepmti in neŋmak pepap bemamti kwitnaŋ kwitnaŋ zeya kapi kegogak mbep beme in neŋ mamayapnok keŋ oloŋen palen mamambep. ¹²Neŋ ingat zemâtâtât zet ŋen kapigok diindoma nâit, neŋ in gogot mamimindeyap sepem kegok in ilinak ŋenaŋ ŋengat gogot mti mamambep. ¹³An ŋenaŋ am notnaneyet mti mamaŋaŋ kileŋ ketalasiwe beme an keyet nâma amgat gogot omba penaj mamimindein kegok nâmpewap. ¹⁴In mulup zet diindoyap keyet kataŋ mâti mme neŋ indikma nâgât notnne penaj bewep. ¹⁵Neŋ ingat sisiliŋ nembanne ewe ku zeyap neŋ ingat notnne penaj zeyap. Sisiliŋ an egaŋ amobotnaŋaŋgalen keŋanen zet zigok tazin ke ku manzeme nâinaŋgut Bienmagengatnaŋ zet sambe timti toban bee in sambe diindoma nâmbien keyepmti neŋ ingat nâma notnne penaj mambemâzin. ¹⁶In neŋ ku nabien; neŋ in neŋmak mamayet indati zemindema meti muluwin dolakŋaŋ mme penajaŋ sambe sokbemti wemti kwesiŋ tatagalen keyet diindowan. Keyepmti in met mulup mimamambe kwileki ŋeniyet olati nâgât kwitnnanen Bien dundum same egaŋ indamukulem mimindewe. ¹⁷Neŋ zemâtâtât zet ŋen pigok diindoma nâyo keyegak ewe zema nâit, in ilinak ŋenaŋ ŋeniyet gogot mti mamambep.

Zisas nembaŋane ekŋen mulup mme sisipenŋen mimindewep

¹⁸In mulup tapmim mepme am ekŋenaŋ indik talati mtoidewep beme in nenn mamimname egip keyet otnâmbep. ¹⁹In am ekŋen kemak tusumti mambiek ze ekŋenaŋ kasa kasa ŋep ku mimindawiek. Neŋ in am

kapiyet tunguwinangatnan indatimti set ngen zikat indama ilinangalen set itnanaŋ ke bamkumpemti nâlen mama mimi mâti mamip. Keyet mti indiktalati mtoidewep. ²⁰In neŋ zet ngen pigok diindowan e nâip, ‘Sisiliŋ nembayaŋ amobotnanaŋ sebempemti mobotnaŋ ngep ku manak.’ Keyepmti am ekŋenaŋ neŋ sisipeŋpeŋ mimnawien sepem kegogak in mimindawep. Ma am notnanaŋ nâlen zet gawepuwien sepem kegogak am notnanaŋ ingalen zelin ngep gawepuwep. ²¹Am nâmkipepepiŋ ekŋen kapiyaŋ neŋ Kawawaŋaŋ iŋkaŋ zemneme toti mulup mamiap ke ekŋenaŋ ku nâmatâlip. Keyepmti ekŋenaŋ in neŋmak tusumti mamaip keyepmti in omba penanŋ mtoidewep. ²²Neŋ msalen kapi toti am ekŋen ke zet zapatn kapi ku diindowan ze zet kapiyaŋ yomin sosok ku mkawaŋ bem indenak. Pi zemkawaŋ bewan keyepmti yomin sosok mamimkawaŋbein. Kwileki nenaŋ yomin ke ngep ku angalaŋpepeyelen. ²³An nenaŋ neŋ niktalati mammtotnein beme egaŋ Bien kegogak mammtopein. ²⁴Neŋ am tunguwinan menok temaŋ temaŋ amnaŋ ku mimiyelen ke mamkolap ke ku mbak ze ekŋenaŋ nâgât ngenzinziŋ mti yom temaŋ ku aikbiek. Pi neŋ yomin mimsokbema yomin ke ekmâtâtinŋgut ekŋenaŋ naman nâgâek mtopenup zemti Bien kululuŋen main ek eyo mammtopeip. ²⁵Kegok mme golaŋ zenze an zet ngen kapigok zenzenaŋ ke penanaŋ masokbein, ‘Ekŋenaŋ yompiŋ belak tungupman penanŋ ngenzinziŋ msamti mammtopeip.’

(Sam 35:19; 69:4)

²⁶Neŋ mulupgat indamukulem mimiŋin Emetak Teŋ Bienmak mamain ke moti zempema toti egaŋ Bien Kawawaŋmak nigat yaŋŋ weyaŋ zemkawaŋ bem indame nâmatât ndewep. ²⁷Âpme neŋ in indatimti mulup yaŋbemti mkopma nikbien keyet zet zapatn am zemkawaŋ bemindame nâmatâbep.

16 ¹Mineti amnaŋ kwitnaŋ kwitnaŋ nuknaŋ ngen mimindame nâmkipepeen suknaŋ bewepmagat zet eweŋanak tipman baen pigok diindowan. ²Am ekŋenaŋ in Zuda am ekŋengalen sesewat mkaen mebegat zemkulumindemti pase zupman indewep ma kan ngen beme am ekŋenaŋ nin Kawawaŋgalen mulup penanŋ tapminup zemtati mamti in indome gakiwep. ³Ekŋenaŋ Bienmak nigat yaŋŋ ku weyaŋ manâmatâlip keyepmti sepem kegok mimindawep. ⁴Neŋ zet eweŋanak kapi tadiindomkwapma nâip keyepmti manepeme kwitnaŋ kwitnaŋ keboŋ sokbemindame ekti zewep. ‘O, Amobotnanaŋ zet dindoye walak penanaŋ piki sokbemndain,’ zewep. Zet kapi ilak kan teepman tipman baen mamkwabennen ke ku diindowan. Pilak Bienmagen mobogalen kann bududuk beme nâmti keyepm tadiindoyap.

Emetak Tengalen mulup kapigok mam

⁵Pi neŋ An zemneme toban ekmagen mobogalen kan bududuk penanŋ beme mosât tappma inmagen nenaŋ pigok ku nayaŋkwesin, ‘Gen

pe deset mebanik?’ ⁶Nej indemesât zet kapi zema keyepmti in belak kemberaŋ keŋin bemisikme belak zelinpiŋ talip. ⁷Nej zet penaŋ pigok zema nâit, nej mobap ke ingat mti mobap. Âk nej ku mobap beme mukulem mimiŋin ke ɲep ku todak keyepmti nej moti ek zempema tobe. ⁸Âpme egaŋ koti am msalen kapi yominangat yaŋaŋ zikat indawe ma egaŋ mama mimi teŋ ke yaŋaŋ zikat indawe ma yominangat dopmaŋ zemindondo keyet yaŋaŋ zikat indawe. ⁹Âpme ekɲenaŋ yominangat yaŋaŋ pigok ekbep ekɲenaŋ nej ku manâmkiŋpemneip keyaŋ yomin bein. ¹⁰Ekɲenaŋ mimyunguŋguŋinaŋat nâme ɲep mambein. Kulekiyet nej Biengalen melap yaŋgut in ewe nej ɲep ku nikbep. ¹¹Ekɲenaŋ Kawawaŋgalen yominangat dopmaŋ zemindondo keyet yaŋaŋ ku nâip. Kwilekiyet msalengalen damuŋ Sadaŋ ek eweŋaŋ zemkuye.

¹²Zet keboŋ keboŋ ke diindondoyelen sambe penaŋ timtalap yaŋgut alak kapigogat sambe diindoma zigok ambepeseip. ¹³Emetak Teŋaŋ tobe kan keyet egaŋ Kawawaŋ an zet penaŋat ɲotekɲaŋ keyet yaŋaŋ zemâtâtindamti mama mimi dolakɲaŋ keyelen set zikat indame nâmâtâbep. Egaŋ kwitnaŋ kwitnaŋ ikɲaŋat keŋanegak etaŋ ku zewe. Nen zemâtâtsama nâmti kwitnaŋ kwitnaŋ bam sokbemâbe keyet zapatnaŋ diindowe. ¹⁴Zet ke nâgât keŋɲanaŋatnaŋ timti zemkawaŋ beme nâgât kwizet buŋammnaŋ msalen palakɲaŋ penaŋ bemti mekobe. ¹⁵Bienmagen kwitnaŋ kwitnaŋ tazin keyet toŋaŋ nej keyepmti nej zet pigok eweŋaŋ diindoya, Emetak Teŋaŋ nâlen keŋnanengatnaŋ zet timti in diindowe.

Zisasiyaŋ met maneti naman gilik zemti ndatisât kobe

¹⁶Nej kan isikɲaŋ bugan tazin kapi delaŋ zeme mepma in nej natimati ilinak mame nej met belaknik bugan mamti naman gilik zemkopma nikbep.”

¹⁷Kegok zeme nin nnak sek putuŋ pitiŋ mti zewenn, “An kapi zet kapi pe yaŋaŋ zigogat nâmti pigok pi zein? ‘Kan isikɲaŋ bugan tazin ke delaŋ zeme mepma natimabep yaŋ met belaknik maneti naman ewe gilik zemti inmagen kopma nikbep.’ Naman zet ɲen pigok zep, ‘Nej Bienmagen mobap?’ ” ¹⁸Kegok zemti ewe sakwalamti zewenn, “An kapi, ‘Pe kan isikɲaŋ bugan tazin,’ tazein kapi kwilekiyet nâmti tazeinaŋ? Ke nin yaŋaŋ ku nâmâtâtnup!”

¹⁹Zem mbenay yek beme Zisas yaŋkwesisâgât tapmmann Zisasiyaŋ ndik mâtâti zeye, “ ‘Nej kan isikɲaŋ bugan tazin ke beme mepma natimabep. Ya naman met kan isikɲaŋ bugan tati naman gilik zem kopma nikbep,’ zeya keyet in zenâmti nayaŋkwesisât tapmip? ²⁰Nej zet penaŋ pigok zema nâit, nej nome gakima in nâgât si kemberɲ temaŋ tapmme am nâmkiŋpepeŋinpiŋ ekɲenaŋ keŋ oloŋen temaŋ penaŋ mbep. In kemberɲ palen ke manepeme nej bam gilik zemti indatisât kopma nikti oloŋen

temañ mbep. ²¹ Imbi ekñenañ nembra sokbesâpme sek sindem omba penañ timti keñin sindem mambein. Yañ bam nembra sokbeme nembrañ ke ekti sindem titiñ ke nâme betetnañ beme keñ oloñen temañ mamip. ²² Âpme in sepem kegogak kan isikñañ bugan kapi in si kemberñ mti mambe. Manepeme neñ mamaen gilik zem wapma nikti naman keñ oloñen penañ mbep. Keñ oloñen keboñ ke am ñenañ ku menzemmbe.

²³ Neñ Bienmagen mobap kan keyet in kwileki ñeniyet yañañ penañ nâsâgât ñen ku nayañkwesiwep. Neñ penañ sukwep pigok zema nâit, in kwileki ñeniyet olati Bien dundum same egañ nâgât pembedañnañgapmti kwilekiyet olati wekuwep ke indawe. ²⁴ Neñmak tusumti mamkwabien kan keyet in kwileki ñeniyet olati nâgât kwitnnanen Biengat ku yañkwesiwien. Yañ alak pi in nâgât kwitnnanen kwileki ñengat olati Biengat yañkwesime egañ kwitnañ kwitnañ ñep indame olalapiñ timamti oloñen palenak mambe.

Zisasiyañ Sadangalen winde sambe kume topmoge

²⁵ Neñ zet sambe diindomkwaban ke belak bemzenze zet etañ diindomkwaban. Maneti bangat neñ bemzenze zet ñen ewe ku diindowap neñ Biengat yañañ belak sosok zemkawañ bemti zemâtâtindama nâmâbep. ²⁶ Kan keyet in nâlen bemberañ keyepmti nâgât kwitnnanen Biengat gwaen dundum same neñ ingat munduminan tati Biengat manzemtemanok ewe ku zewap. ²⁷ Neñ Kawawañmagengatnan kwatoban e in nâmkinpennemti nâgât gogot penañ mamimneip keyepmti Bienañ ingat sepem kegogak gogot penañ mamimindein. ²⁸ Neñ Bien pemti msalen pien inmagen kwatoban yañ pi naman in indemti kululuñen Bienmagen gilik zem mowebap.”

²⁹ Kegok zeme nin nâmti pigok dunduwenn, “Geñ alak pi bemzenze zet ñen zenzepiñ sosok belak zemâtâtndamane nâmâtâtnup. ³⁰ Keyepmti nin gâgât pigok nângenup geñ an ñenañ gayañkwesisipiñ mme geñ gitiyegak kwitnañ kwitnañ sambe beeyet yañañ manâmâtâpmane delañ zein. Keyepmti geñ Kawawañmagengatnan tobanan e nâmkinpennemgenup.”

³¹ Zeme Zisasiyañ pigok dinndoye, “Kapi zema in alakñatingut nâmkinpennep? ³² Kan belaknik penañ kapi in neñ nemti kunzuñti mkañinan me enzilim kot enzilim msâip. Ke nem mekopme neñ nenak etañ ku tabap Bienañ namukulem mti neñmak tabe. ³³ In neñmak tusumti mamaip keyepmti in keñ sewakñañ palen mamayet nâmti zet sambe bee diindomkwala. In msalen kasa kasa mimindame keyet keñañ nâmisim mamaip. Âpme nenn msalengalen kwitnañ kwitnañ bekanañ sambe kapiyelen windenañ mtopemâban.”

Zisasiyañ nembrañane ekñengat nâmti dunduye

17 ¹ Zisasiyañ zet kegok zemdelañ zemti zikatnañ kululuñen gwaen ekme mopme pigok dunduye, “Bien, gakiki kann ilak

bududuk penaj bein. Kan keyet geŋ nâgât kwizet buŋamm mwapmane neŋ naman gâgât kwizet buŋamdi mwabap. ²Kawawaŋ, geŋ msalen am sambe bekapi ilindiŋ neŋ indadamuŋ mimiyet nâgât kandaŋnnan yaloŋ indemti indadamuŋ mimiyet winde nawanan. Mti am geŋ gitangat zapat penaj ombem indewanen ekŋen ke neŋ mama kanzizit indawap. ³Amnaŋ mama kanzizit ke yaŋaŋ kapigoset mti matip: geŋ Kawawaŋ penaj mamanik ma Zisas Kilais neŋ nemane toban am ekŋenaŋ yaŋnit kegok penaj nâmâtâtndemtingut mama kanzizit ŋep tiwep. ⁴Geŋ mulup mimiyet zemnemanen tobanaj mulup bepi mmetne metne pema msalen kwizet buŋamdaŋ palakŋaŋ bemti tazin. ⁵Bien, msat kululuŋ ewe ku sokbeme neŋ eweŋaŋ geŋmak mamti kwizet buŋamm temaŋmak mamamteman. Sepem kegogak pi ewe gilik zemti geŋmagen kwapma kwizet buŋam ke ewe namane timti gâgât monzalamdanen mamambap.

⁶Msalen am sambe penaj kapiyet keŋan am gitangat zapat ombemindewanen ekŋen ke nâlen belen beindewanen ekŋenmagen kwizapadi ilak zemkawaŋ bemindama nâmti mkatikbemaŋpme delaŋ zeye. ⁷Mti ekŋenaŋ neŋ mulup kwitnaŋ kwitnaŋ sambe mamiyap ekŋen kapi winde geŋmagengatnaŋetaŋ matimiyap elak ekŋen sambeyaŋ eknâme delaŋ penaj zemâzin. ⁸Zet sambe nawanan e diindoma delaŋ zeye. Ekŋenaŋ penaj nâmkinaŋpeip neŋ geŋmagengatnan koban. Ma geŋ nemane koban.

⁹Keyepmti neŋ geŋ am gitangat zapat ekŋen ke nâgât belen bewanan ekŋen keyet etaŋ nâmti pigok dundum gayap. ¹⁰Am sambe geŋ nâlen belen bemane maindadamuŋ miap pi toŋaŋ nilizuzut belup ya am ekŋen kapiyaŋ nâgât kwizet buŋamm ŋep mwatnewep. ¹¹Âpme neŋ msalen pien kwesiŋ penaj ku mambap ilak geŋmagen kwakwagalen kan bududuk bein. Âpme amdine ekŋen bekakan nâlen belen bemane maindadamuŋ mkwalap pi ewe msalen kapi kwesiŋ mamambep. Keyepmti Bien, An teŋ mamanik, geŋ kwileki ŋenaŋ mto indeweyet indadamuŋ dolakŋaŋ mimindemane mambep. Âpme ekŋenaŋ gâlen winde ke sosok ekmâtâti keŋ kwep bemti kume kwaopme mambep. Nit keŋ kwep bemti mamalup sepem kegogak ¹²neŋ ekŋenmak mamayap. Kan kapiyet neŋ gâlen windeen zet zapadi dolakŋaŋ kapi zemti mkatikŋaŋ bemindewan keyepmti ekŋen sambe penaj ku walebien. Kawawaŋgalen Zet Itnaŋanen zet tazin ke katikŋaŋ bembeyet an kwewetaŋaŋ set tetakŋaŋ palakŋaŋ beme mmetneti mme pilik zeme teziŋ ŋandaŋgat zapat beye. ¹³Neŋ ilak geŋmagen kokogat kann bududuk beme keyepmti neŋ ekŋengat yayaŋ mimindemti dundum gayap. Geŋ indamukulem mimindemane oloŋen palen mambep nen mamayap sepem kegogak. ¹⁴Âpme neŋ zedi zemâtâtndama ekŋenaŋ ke nâmti neŋmak tusume mamanup keyepmti am ninmak tusumti ku mamaip ekŋenaŋ nsakwep ŋenzinziŋ minndamti mamtot ndeip. ¹⁵Wa neŋ geŋ msalen kapiyetnan indatimti mobogat nâmti

ku dundum gayap. Mneti Sadangalen windeyan mtoindewemagengapmti geŋ indapmukulem mimindemane mamayet nâmti dundum gayap. ¹⁶Neŋ msat kapiyet zapat ku mamayap sepem kegogak ekŋen kapiyan msat kapiyet zapat ku mamaip. ¹⁷Geŋ gitangat zedi penan sukwep penan keyan keŋin mmane kwetetepman penan beme ekŋenan yomgalen mama mimi bekanan ke bamkumpemti gâgât zapaletan mamambep. ¹⁸Geŋ neŋ msalen pien zedi penan sukwep penan ke zempalakŋan bembeyet zemnemane toti mamiyap kegogak ekŋen bekakan kapi neŋ zemindema msalen kapi ammagen zedi ke tim mebep. ¹⁹Neŋ ekŋenan gâlen zedi teŋ penan kapi nâmti gâgât kandan dan penan kokogat nâmti indamukulem mimiyet keŋ teman penan matazin.

²⁰Ya wan neŋ ekŋengat etan nâmti ku dundum gayap ekŋenan kapi mamti zedi timepme am notnanan zelin nâmti nâgât nâmkinpemnemti mambep ekŋengat eyo nâmti dundum gayap. ²¹Bien, neŋmak geŋmak keŋ kwep bemti gogot palen mamalup sepem kegogak ekŋenan nitmak tusumti ilinak keŋ kwep bemti gogot palen mame am notnan gâlen zet zapat dolakŋan bamkumpemti mamaip ekŋenan geŋ giti neŋ zemnemane toban ke penan nâmkinpemnewep zemti dundum gayap. ²²Geŋmak nit keŋ kwep bemti mamalup sepem kegogak ekŋenan ilinak keŋ kwep bemti mamambep. Geŋ neŋ nigomti kwizet buŋamm teman nambanan sepem kegogak neŋ ekŋen kegogak indikgomti kwizet buŋamin mamwalap. ²³Geŋmak nit keŋ kwep bemti mamalup sepem kegogak neŋ ekŋenmak keŋ kwep bemti mamanup. Kegogak ekŋenan ilinak keŋ kwep penan bemti mambep. Sepem kegok mti mame am gâlen zet bamkumpemti mamaip ekŋenan mama mimiŋin dolakŋan ke ekti penan geŋ giti zemnemane toban ma geŋ gogot mnemti ekŋen eyo gogot mamimindanik e nâmâtâbep.

²⁴Bien, geŋ am indamakumti nâgât betnnan bewanan. Keyepmti ekŋenan neŋ kwabap keyegak kwabep. Mti ekŋenan geŋ msat kululun ewe sokbembepiŋ tapme geŋ nâgât gogot penan mnemti kwizet buŋamm teman nawanan kwizet buŋamm teman ke ekmâtâbep. ²⁵Bien, An teŋ penan mamanik, am sambe msalen pi wemelip ekŋen bepiyan gâgât yaŋdi eweŋan ku nâmbien neŋ kwep gâgât yaŋdi nâmgeyap. Keyepmti geŋ am ekŋen ke nânânjin mkawaŋ bemane ekŋenan neŋ geŋmagengatnan toban e nâmâtâtnewep. ²⁶Neŋ am ekŋen kemagen zet zapadi zemâtâtindawan yaŋ pi ewe manzemâtâtindamelap. Keyet geŋ nâgât gogot mamimnenik sepem kegogak ekŋengat gogot mimindewanik.”

Kasayan Zisas met atawien

18 ¹Zisasiyan dundundu kegok dundumepme delaŋ zeme wati nin ndatime mka pem toti met Kidolon tu somti tu nembet daen

olip mulup teman matatanen ke mobenn. ²Mulup keyet keran Zisasiyan ninmak kan katan ke meti maondaktemenn keyepmti Zudasian mulup set ke nâme delan zein. ³Keyepmti eknenan ke mepme Zudasian meti zeme sâpe sâpe bumbu an nenan ma Palisi eknenan an kasa kuku ma sesewat mkayelen an tipdakutum mee pi zemindeme Zudas Zisasiyan iknan nembanan wati mamtan egan iknan nenan bemti indatime nelip sage timti tambuyet nanam konji konji piyan Zisas wasâgât kopmâbien. ⁴Âpme Zisasiyan am kasayan koti kwitnan kwitnan sambe mnamâseip e nâme delan zeye keyepmti eknenan takopme kopme egan keeselak eknenmagen soknan meti pigok zeye,” In an pe kwiyet tatimalip?”

⁵Zeme eknenan zewien,” Nin Zisas Nasalet mkaengatan ek tatimatnup.”

Zeme Zisasiyan pigok zeye, “Ne toka kapi talap.” ⁶Zeme eknenan wenin mepme tikande kande meti toindomâge. ⁷Mme Zisasiyan ewe indayan kwesie, “In an pe kwiyet tatimalip?”

Indayan kwesime zewien, “Nin Zisas Nasalet mkaengatan egat tatimatnup.”

⁸Zeme Zisasiyan pigok diindoye, “Nen pi talap,” tazeyap pe tatnâip ma yek? In nen tatnatimalip beme nembanne indondopin; nen kwep natamti napmelit. ⁹Sepem kegok sokbeme Zisasiyan ekngat dunduyeen keyet penanan sokbem katik beye, “Nemba akum namane maindadamu mkwalap eknenmagengatan nenan ku walege.”

¹⁰Âpme Saimon Pitayan Zisasiyepmti gombo pitaknanen yunmamange pi sakwep senkwati sâpe sâpe bumbu an nenan egalen sisilin nempa nen kwitnan Malakas zeme ke ek waknan penaset sâmpeme mege. ¹¹Kegok mme Zisasiyan Pita pigok dunduye,” Gen gembondi sakwep mti mkanan wepe. Bienan nen sindem teman kapi titiyet zemnenge pi alak gen naman bekek nesât tapmnik?”

Zisas wati Anas egalen mkaen mebien

¹²Zemti tapme am ek wati kosât mebien eknenan Zisas atamti betnan tegan zampemti wati mebien. ¹³Eknenan nenan Kaipasiyet tatnan Anas ekmagen wati mebien. Kaipas egan nup kan keyet sâpe sâpe bumbu an sambe ekngat nenanin teman mamayet ombempeme mamtan. ¹⁴Kaipas an keyan Zuda am ekngalen ondedagen tati zet kapigok zeye, “Zisasiyan tapme nin nuknan teman aikbanupgat nin ek kwep kumann gakime dolaknan mambanup.”

Pitayan Zisas zemkandat peye

¹⁵Saimon Pitamak notnan kwep nenmak Zisas zet muluwen wati mepme mâti eksât mekun. Nemba nen ke sâpe sâpe bumbu an sambe ekngalen nenanin teman keyan egat nâmpen keyepmti Zisas wati

egalen mka kejan mopme mâti keyegak mowege. ¹⁶⁻¹⁷Âpme Pitayanğut igak paset zupman baen tati notnağ mebun ke sâpe sâpe bumbu an sambe ekğengalen ñeñağin temağ egağ nâmpain keyepmti egağ nâmtalati met imbi sekekek damuğ keyet zeme nâmti Pita set kwalet peme kejan kwapme imbi keyağ Pita sepemağ ekti yağkwesiye, “Geğ kapi an kandayet nembrağağ ñen tagigağ.”

Yağkwesime Pitayağ yağti zeye, “Geğ pe kwiyet tazenik ne pi ka yegağ.”

¹⁸ Kegok zempemti mulup an ma kasa kuku an ekğenağ tâğâyet mti tep bume zime bembuluğti kât tapmambien ke mot wanzağum tati tep kât tapmağe.

**Sâpe sâpe bumbu an sambe ekğengalen ñeñağin temağağ
Zisas yağkwesisi sambe tayağkwesimağe**

¹⁹ Âpme sâpe sâpe bumbu an sambe ekğengalen ñeñağin temağ keyağ Zisasiyet nembrağane nin zigoset indatiye ma egağ zet ziboğ zikat indammge pe zigok penağ manzein keboğ keboğ keyet yağağ nâsâğât tayağkwesimağe. ²⁰ Âpme Zisasiyağ pigok dunduye, “Neğ am sambe ekğengat tuğguwinan ma Zuda am nnağalen sesewat mka temanen ma am ondedağñin tema temanen sosok belak zetn zemzikat mti mkawağ bemeban. ²¹ Âpme geğ nâğât pi eneyet tatnayağkwesinik? Am sambe zet mandiindoma nâip ekğen ke indayağkwesimane zet pe zigok mandiindoyap e ekğenağ zeme nâmbak.”

²² Kegok zeme an tipdakutum damuğ mti tapmambien ekğenmagengatnağ ñenağ bepalaksat nağumağ somti zeye, “Geğ sâpe sâpe bumbu an sambe ekğengalen ñeñağin temağ kapi zet keboğ ke eneyet dundunik?”

²³ Zeme Zisasiyağ an ke ekti pigok zeye, “Neğ zet bekanagağ ma pembrağ zeya ze yağağ weyağ zeman nâmti tapmağut nowek. Geğ belak kileğ etağ eneyet nonik?”

²⁴ Zeme Anasiyağ sâpe sâpe bumbu an sambe ekğengalen ñeñağin mulupmağ temağ delağ zeme belak pemti mamtan keyepmti Zisas betnağ ewe zapeğ ke tapme zempeme sâpe sâpe bumbu an sambe ekğengalen ñeñağin alaknağ tatnağ Kaipas ekmagen wati mebegat zemindeye.

Pitayağ Zisasiyet sek ñen ewe ku nâmpayağ zeye

²⁵ Âpme Pitayağ ewe tep ke kâpmambe tapme am notnağağ ekti yağkwesiwi, “Geğ kapi pe an kandayet nembrağane ekğengat tuğguwinagağtağ ñen geğ kapi ma zem tatnânup?”

Âpme egağ zeye, “Neğ yek penağ.”

²⁶ Zeme Pitayağ sâpe sâpe bumbu ñeñağat mulup anağ ñen waknağ sâmpaye keyet notnağağ ekti zeye, “Geğ sağenen ekmak ilinsakwep muluwen daen mamane gikman pi.”

²⁷Zeme Pitayan yan̄ti zeye, “Nēn penan̄ egat ku n̄ayap.” Zeme zeme keyegak pepup apman̄an yan̄bemti kâkâkâââk kuye.

Zisas wati naman amobotnan̄ Pailletmagen mebien

²⁸Tambuyet pi Kaipasiyelen mkaen ke zet mulup mti tapmetnepeme msame watoti naman Loma amobotnan̄ Paillet Zelusalem mkaen matatan ekmagen wati meti ilin penan̄ amobotnan̄ Paillet egalen mkaen ku mobien. Ek̄nenan̄ puk n̄amti mbien, “Nin Anggalalan̄ Kendoyen tu meu niniyelen kan sok̄janik bein kapi egalen mkaen mopmann̄ n̄ep ku besem.” Kegok n̄amti zupman baenak kot tabien. ²⁹Ek̄nenan̄ wakoti belak tamban̄gumen baen tapme indikti Pailelan̄ mka kejangatnan̄ toti pigok indayan̄kwesiye, “In an ke pe yom zigok mme wati kotalip?”

³⁰Indayan̄kwesime ek̄nenan̄ zewien, “An kapi bekanan̄ ku mnak ze nin wati gēnmagen kapi ku kobenek.”

³¹Zeme amobotnan̄ Pailelan̄ pigok diindoye, “In ilinan̄galen zii zelin tazin keyet katan̄ n̄amti zetan̄ zemdelan̄ zempeit.”

Zeme Zuda am ek̄nenan̄ zewien, “Nin am n̄en zetan̄ zemdelan̄ zemti kumann̄ gakikiyet ku n̄amndenden̄an̄.” ³²Zuda am ek̄nenan̄ kegok zemti Zisas Loma amobotnan̄gat betnan̄ beme Zisasiyan̄ maneti bam tep palen nomti masasoknewep zeye zet ke penan̄ sokbeye.

³³Âpme Pailelan̄ mkan̄an̄ kejan̄ motati Zisas zemandame mopme pigok yan̄kwesiye,” Gēn penan̄ Zuda am ek̄nengalen Amobotnan̄ manze zeman̄e n̄ambi?”

³⁴Yan̄kwesime Zisasiyan̄ zeye, “Zet ke am notnan̄an̄ zeme n̄amti zenik ma gitanḡat kēndan̄galak n̄amti tazenik?”

³⁵Zeme Pailelan̄ zeye, “Nēn Zuda an keyepmti n̄âgât tatnayan̄kwesinik? Zet ke gitanḡat amdine ma sâpe sâpe bumbu an n̄ejan̄dine ek̄nenan̄ gēn zigok mmane gikti gati n̄âlen pi kolo?”

³⁶Zeme Zisasiyan̄ zeye, “Wa nēn Amobotnan̄ msat kapiyetnan̄ yek. Nēn Amobotnan̄ kululūn gwaengatan̄. Nēn msat kapiyelen Amobotnan̄ mambak ze nēn aminne zemindema ek̄nenan̄ nadamūn katiknan̄ mtapme Zuda am ek̄nenan̄ n̄ep ku natamti kobiek.”

³⁷Zeme n̄amti Pailelan̄ zeye, “Âpme gēn Amobotnan̄ teman̄ n̄en gēn bekapi?”

Yan̄kwesime Zisasiyan̄ pigok zeye, “Giti zenik kemak! Nēn zet penan̄ n̄oteknan̄ kapi zemkawan̄ bembeyet n̄amti msalen kapi toti am mamaen sokbewan. Am zet penan̄ n̄oteknan̄ kapiyet yan̄an̄ manâmâtâlîp ek̄nenan̄ n̄âlen zetn manâip.”

³⁸Zeme Pailelan̄ n̄amti pigok zeye, “Zet penan̄ n̄oteknan̄ ke pe kwilekiyet n̄amti tazenik?”

Kegok zemti ewe tamban̄gumen toti Zuda am pigok diindoye, “Nēn ankan̄gwayelen yoman̄ n̄en ku aigap. ³⁹Keyepmti nēn ilinan̄galen set

tazin keyet katan Anggalalan Kendo katan am mka katiknanen tatatnan an nen ilin zeme nâmpema zupman makwawezin keyet katan zeme nen Zuda ilinangalen Amobotnanjin kapi belak zempema totogalen nâip?”

⁴⁰Âpme eknenan kwizet nak nak teman mti zewien, “Wa ek yek. Balabasigut belak zempemane tolak!” Balabas egan Loma gapman mtoindeme keyepmti eknenan wati mka katiknan mepewien.

Amobotnan Pailelan Zisas gakikiyet zemdelan zempeye

19 ¹Amgat zemiŋgeyan yek beme gilik zem mka kenan wapmoti Zisas kume gakikiyet zetnan zemdelan zemti kasa kuku an zemindeme sindiwan witikti ²sepmen munŋunŋi noknanen peme topme kâlâp teepman naman piyan mundunpeme tapme ³zimosetnan met ondektati kwizet kalian teman msamti mbien ke pep mtiyepm zewien, “Geŋ Zuda am ekngengalen Amobotnan kan teepman telepgat penan mamambanik.” Zemti bepalaksat nenŋuman taiwien.

⁴Âpme Pailen egan Zuda am eknenmagen ewe toweti zeye, “Neŋ an kanŋwa yoman penan timapma bemeyepmti watotindesât totdiindoyap. Keyepmti in ilin nâmti talip keyet katan msaseip.” ⁵Zemti mot Zisas ek sepmen teknan noknan kwasim pewien ma kâlâp naman teepman mundun pewien mee bee melesin watoti Pailelan zikat indamti zeye, “In an bukapi ekti kember bugan mip ma yek?”

⁶Zeme sâpe sâpe bumbu an nenan eknen ma aminine sambe eknenan kwizet naknak mti zewien, “Tewen kume gakik! Tewen kume gakik!”

Kume Pailelan zet dopman pigok gilik zemti indaye, “Neŋ yoman nen ku aiga keyet in ilin nâipnok wati met tewen kume gakik!”

⁷Âpme Zuda am eknenan pigok zewien, “An keyan iknangat, ‘Neŋ Kawawangat Nemunan,’ zemti mobotnan mamm. Ma zii zetnnan an mobotnan keboŋ ke indome gakikiyet zenzenan. Keyepmti an Kawawangat zet mobotnan mamin kapi kume gakisem.”

⁸Zeme Pailelan zet mobotnan mamm zewien ke nâmti kinŋage. ⁹Mti Zisas ewe mka kenan gilik zem wapmoti pigok yanŋwesieye, “Geŋ pe mkandi noteknan pe deset?” Yanŋwesime Zisasiyan zetnan dopman gilik zemsasapin; ¹⁰belak etan tapme Pailelan pigok dunduye, “Geŋ zetn dopman nen eneyet ku gilik zemti nanik? Nenmagen winde zemdelan zema tewengonŋoyelen ma belak zemgema mebegalen tatnain ke ku nâmnunik?”

¹¹Zeme Zisasiyan pigok dunduye, “Geŋ nâgât zetn zemdelan zenze keyet winde Kawawan kululunŋ gwaen mamain egan gaye keyepmti geŋ nâgât zetn zemdelan zesâpmnik. Belak ze geŋ nâgât zetn nep ku zemdelan zewek. Mme am nati kot gâlen belen neyo ekngengalen yominan gâlen sebempein.”

¹²Pailelan zet ke nâmti set nen aikti Zisas belak zempeme kwaweweget zeme Zuda am eknenan kwizet kalian kumti zewien, “Geŋ an ke belak

zempemane mesem beme damuŋdi temaŋ Sisa ekmak Loma mka ɲotakŋan tazin ekmak tususundi ku tabe. An ɲenaŋ amobotnaŋ nen kwep zemti amobotnaŋ Sisa mimtopewe beme Sisayaŋ ekmak kasa kasa mbe.”

¹³ Paillelaŋ zet ke nâmti egaŋ Zisas wati zupman baen toti egaŋ zemdelan zenze munduman mototage. Mundum ke nanzaŋaŋ weyaŋti kwetetepmaŋ mpepeŋaŋ keyepmti Ibulu zeleset Gabata makumtemien. ¹⁴ Kan ke ilak Angalalaŋ Kendo saŋen ɲokŋan tatagalen beye keyepmti zet mulup ke tapmimetnepeme tinsutnan penaŋ beme Paillelaŋ Zuda am pigok diindoye, “In Amobotnaŋin wa piyet egit!”

¹⁵ Zeme ekŋenaŋ kwizet kaliaŋ temaŋ kumti zewien, “An ke kumenŋ gakik, kumenŋ gakik, tewen kumasasokpeit!”

Âpme Paillelaŋ zet dopmaŋ pigok diindoye, “Ilinangalen Amobotnaŋin kapi neŋ tewen kumasasokpepyet nâmti tazeip?”

Zeme sâpe sâpe bumbu an ɲenaŋ ekŋenaŋ Pailletgat pigok zewien, “Wa nin amobotnaŋ zutmak yek. Nin amobotnaŋ Sisa kwewetaŋ.”

¹⁶ Am sambeyaŋ zet sambe ke mme ekti Paillelaŋ nâme ɲep kumbeme Zisas nâmisimti tewen kumasasokpepyet zemdelan zempeye.

Zisas tewen kumasasokpewien

¹⁷ Zemdelan zempeme kasa kuku an ekŋenaŋ Zisas tep palen bemkukuyelen tepmaŋ bee ikŋaŋ mesame pumti Golgata kalaŋan mowebien. “Golgata” ke Ibulu ekŋengalen zeleset makuip âpme ningalen zeleset ɲokaset Kalaŋ kuwanek. ¹⁸ Ke wapmoti tewen kumasasok pewien. Zisas tungupman kumpemti an zut nembet nembet gakikiyet kogogak kumindewien. ¹⁹ Âpme Paillelaŋ zeme Zisas kuwien tep keyet dukŋanen gwaen meluwaŋ kapigok kumpewien,

“ZISAS NASALET MKAENGATNAŋ ZUDA AM EKŋENGALAN AMOBOTNAŋ.”

²⁰ Zisas kumpewien msat keyet sokŋan bee Zelusalem mka ɲande temaŋ ke matatan. Âpme Amobotnaŋ Paillelaŋ zeme meluwaŋ ke Ibulu ekŋengalen zeleset ma Glik ma Latin zeleset kumpeme tage. Âpme amnaŋ setemamen mekoti zet ke mainnâmbien. ²¹ Keyepmti sâpe sâpe bumbu an ɲenaŋ ekŋenaŋ ekme ɲep ku beme Pailletgat pigok dunduwien, “Geŋ, ‘Zuda am ekŋengalen Amobotnaŋ kegek eneyet kumpenak.’ Yegat, asekti naman pigok kumpe, ‘An kapiyaŋ ikŋaŋgat pigok manzein, “Neŋ Zuda ekŋengalen Amobotnaŋ.” ’ ”

²² Zeme Paillelaŋ pigok zeye, “Neŋ zet ilak kumpeya ewe asekti naman sepem ɲen ewe ku kusap.”

²³⁻²⁴ Âpme an kasa kuku ekŋenaŋ Zisas tewen kumpeme tapme sekŋanen kwitnaŋ kwitnaŋ gulum m timti maŋge zulak zulak beme tapme ikŋaŋgat ikŋaŋgat toŋaŋ toŋaŋ tiwien. Âpme kâlâpmaŋ

kenjangatnaŋ teepmaŋ kengut ku seliliŋaŋ keyepmti pigok zewien, “Pi mineti mendelepmann kileŋ besemagengat kopme nin nanzaŋ guluk gilik mti an kwiyaŋ ɲeŋaŋ kwasem beme egaŋ kâlâp ke mti mesem zemti kegok mbien.” Sepem kegok mme Kawawaŋgalen Zet Itnaŋanen meluwaŋ pigok mimiŋaŋ tazin keyet kataŋak beye,

“Ekɲenaŋ sekɲanen kwitnaŋ kwitnaŋ gulum m timti toŋaŋ toŋaŋ tiwien. Âpme kâlâp teepmaŋ kenjangatnaŋ ke nanzaŋ guluk gilik mti an ɲeŋaŋ kwage egaŋ mge.” *(Sam 22:18)*

²⁵ Zisas tewen kumpeme tapme Zisas iŋnaŋgat mamaŋ ma maweneraŋ Malia Kolopasiyet imbiŋaŋ ma Malia Makdala mkaengatnaŋ imbi ekɲen keyaŋ Zisasiyet kembeŋ nâmti met tep mwatonzempewien kandaŋan tati ekpeme mopme tapmambien. ²⁶ Tapmann Zisasiyaŋ nâgât gogot penaŋ mamtan kegogapm mamaŋmak nit tapmalu ndikti mamaŋgat zeye, “Maŋge, nemundi kemak mamambalup.”

²⁷ Zemti neŋ nikti zeye, “Geŋ mamdi talup kapimak mamambanik.” Âpme ke tatneti kwawesâti neŋ Zisasiyet mamaŋ wati mkannanen meti ekdamuŋ mpema mamamtan.

Zisas tewen anzamtapmetneti gakiye

²⁸ Zisasiyaŋ tewen ke anzam tati gakikiyaŋ keŋaŋ minzilim kopme nâmti pigok nâŋge. Mulup msalen mkoban ewan ilak alak delaŋ zein. Zemti Kawawaŋgalen Zet Itnaŋanen zet ɲen kapigok tazin ke penaŋaŋ bembeyet zet pigok zeye, “Neŋ tuyet penaŋ miyapgat tu ɲen omti name nimbi.”

²⁹ Âpme ekɲenaŋ menzim ɲen wain tu akɲaŋ penaŋ pi kasim pepeŋaŋ ke ekti yembem notnaŋ timti takaset dukɲan gwaen tegaŋ ɲeliwen zampemti peme menzim keŋaŋ ke towepme mkwati peme mane mane dembusekɲan mot olaŋme ke ululuk ɲiŋge. ³⁰ Wain tu akɲaŋ penaŋ ke nimti zeye, “Ilak msalen mulup mimin delaŋ zein.” Kegok zemti gakimti ɲokɲaŋaŋ gwak zemtoge.

³¹ Kan ke Aŋgalalaŋ Kendo tatagat kan sokɲanik penaŋ beye keyepmti Zuda am ekɲenaŋ Pailletgat pigok zewien, “Saŋenen tagoŋgo kanen am sekɲaŋ ekɲenaŋ tep dukɲanak ku tabep.” Zeme Pailelaŋ an kasa kuku ekɲenaŋ am ekɲen ke met selin kasetnaŋ kume etume anzam tati gakime sekɲin timti met indabembeyet nâmindeye. ³²⁻³³ Âpme kasa kuku an ekɲenaŋ meti an zut bekaŋaŋ mimi Zisasmak idowien. Eget ke met ɲen setnaŋ kasetnaŋ kume etume met ɲen setnaŋ kasetnaŋ kume etume Zisasmagen koti ekbienalak ek ilak gakim wengeyepmti setnaŋ kasetnaŋ ku kume etuye. ³⁴ Belak kasa kuku an ɲenaŋ ɲeliwaŋ gatnaneset omti ɲelip seŋkwapme sipmak tumak lumaŋ tobun. ³⁵ Neŋ sokɲan ke tati ekma kwitnaŋ kwitnaŋ ke nanaŋgat zikatn palen sokbeme ekban keyepmti zet kapi kumti indayap. In zet kapi nâme penaŋ sukwep penaŋ bewe.

³⁶Kwitnaŋ kwitnaŋ kapi Kawawaŋgalen Zet Itnaŋanen zet ŋen kapigok tazin ke penañanmak bembeyet nâmti sokbemmâge,

“Ekŋenaŋ kanziŋaŋ ŋen ku kume etuwe.” (Sam 34:20)

³⁷Naman zet itnaŋanen keyegak zet ŋen pigok tazin,

“Ekŋenaŋ ŋeliwaŋ omti serjme amnaŋ zikalin gwalalaŋ ek ekbep.” (Zekaraia 12:10)

Zisas sekŋaŋ mâtâpmtoti met sumen bewien

³⁸Âpme Zosep Alimatia mkaengatnaŋ an ke Zisasiyelen maŋge yaŋgut sosok sokbemti mama Zuda amobotnaŋ ekŋenaŋ nikmâtâti mka katikŋan met newepmagen zem meti buzak enzilim mamtan. An keyaŋ Zisas sekŋaŋ mti met bembeyet Paillet yaŋkwesime ŋep bembeyet nâmpeme met Zisas sekŋaŋ mâtâtosât mege. ³⁹Met mâtâtoti tobeme tapme Nikodimas an tambuyet buzak moti Zisasmak zet zenâmbun an keyaŋ bam mâti mege. Egaŋ mesâti wet am sekŋin mme sesikŋaŋ dolakŋaŋ mapein ma keyaŋ am sekŋin mme sambumbupin kwesiŋ matazin ke mti mege keyet nukŋaŋaŋ 50 kilo mee kegok. ⁴⁰Meti Zosep mukulem mme egelaŋ Zisas sekŋaŋ Zuda ilin am gakime sekŋin miak indemti maindabemtemien keyet kataŋ wet sesikŋaŋ dolakŋaŋ zulutpemtî sâk satnaŋaŋ weyaŋ sumuŋpemalu tapme besât luanzamti mebun. ⁴¹Zisas kuwien msat keyet nembet daeset tep belak mulup ŋen matatan ke nanaŋ temaŋ ŋen eweŋan am bembeyet nâmti kakalimpepeŋaŋ ke am ŋen ku indabembeŋaŋ belak etaŋ matatan. ⁴²Âpme Zuda am ekŋen ilak tagoŋgo kan tatagat kan bududuk penaŋ beye keyepmti egelaŋ Zisasiyet sekŋaŋ sakwep mâtâpmti sokŋan ke met bempemti kobun.

Zisasiyaŋ gakikiengatnan gilik zemti wage

20 ¹Sonda tambuŋan penaŋ msat ewe sasat takume Malia Makdala mkaengatnaŋ keyaŋ Zisas sekŋaŋ eksâgât meti ekme an zulaŋ nanaŋ temaŋ ŋen wilili pemalu met enzuŋ bekek tage e naman wililipeme kaŋan met tage. ²Kegok ekti egaŋ weŋaŋ mepme windembem mane mane Saimon Pitamak neŋ Zisasiyaŋ nâgât gogot mamtan ninmagen meti zeye, “An zut, Amobotnaŋ sekŋaŋ piwan ewande ŋen mmelo mme neŋ sumen daen meti ekma yek bep!”

³Kegok zeme Pitamak neŋmak nâmti am sumen daen eksât mebelin. ⁴Windembem mane mane Pita ewe sewak sewak tapmepme neŋ sakwep windembem met sumen patañ zewan. ⁵Meti keŋan baen ku towewan. Belak zupman baen tati bim kekesimti saŋgum satnaŋ etaŋ baen tapme ekban. ⁶Âpme Pitayaŋ bam met patañ zemti keŋan keim toweti saŋgum satnaŋ kwasimpewien kwep weme ege. ⁷Ma ŋokŋanen sâk kwasim pepeŋaŋ e kegogak weyaŋ mutumti igak bempepeŋaŋ tapme ege. ⁸Âpme neŋ kegogak keŋan toweti nilisakwep kwitnaŋ kwitnaŋ sambe ke ekmâti

pigok nâmpinnewan. Zisasiyan iknaj wasât zeme nâmban walek penaj kapi wati melep. ⁹Mme nempa notnaj ekjenaj Kawawangalen Zet Itnananen Zisasiyan gakikiengatan wawagat zetnaj meluwan miminaj ke ekjenaj ku nâmbien. ¹⁰Ke ekti egelaj belak wenjit mepme am zaimengatan kwakwadak mkaen mekun.

Zisasiyan Malia Makdala mkaengatanj sokbemsaye

¹¹⁻¹²Âpme Malia Makdala mkaengatanj keyaj naman met sum ganzenan ganzenan ke tokwat sumti mgeyan yek beme met bimkekesimti zikatnaj sum kenan baen ekpeme mepme Kawawangalen ensel zut kâlâwit satnaj satnajan miakpewun piyan Zisas peme wengeen ke nenaj setnajan wengeeset nenaj noknajan wengeeset totapmambun. ¹³Egelaj imbi ke ekti zewun, “Imbi, gej pe kwilekiyet nâmti tasunik?”

Âpme egaj zeye, “Amobotnaj nnangalen seknoj pi ewande nen mmepme munduman timapma beme tasuyap.”

¹⁴Kegok zemti gilik zemti wa belakjan zem Zisas iknaj ege yangut kapi Zisas ke ku ekmâtâge. ¹⁵Âpme Zisasiyan pigok yanjkwesiye, “Imbi, gej pe kwilekiyet tasunik?”

Zeme imbi keyaj wa mulup kapiyet damujan nenaj mene tazin zemti pigok dunduye, “An sum damuj, gej mene an seknoj kapi mti ewande nen met benak beme zeman nâmti met mkobi.”

¹⁶Zeme Zisasiyan Malia pigok dunduye, “Malia!”

Zeme nâmti Maliayan elej zem kwat Zisas ekti Zuda zeleset pigok zeye, “Laboni!” (Zet keyet yanaj An Zikat Indanda.)

¹⁷Zemti endilipemti atasât mme Zisasiyan pigok dunduye, “Gej kot sekj timakmakpij! Nej Bienmagen ewe mobopij talapgat! Gej notnne ekjenmagen meti pigok diindo, ‘Nej nin sambeyet Bipmmagen ma nin sambeyet Kawawangmagen mowebap.’ ”

¹⁸Zeme nâmti Malia Makdala mkaengatanj keyaj sakwep windembemti Zisas iknangat nembajane ninmagen meti pigok dinndoye, “Nej Amobotnaj ekti kolap!” Zemti zet dunduye ke dinndomâge.

Nempa ekjenaj mka kenan ondek tatnepeme

Amobotnajan sokbemindaye

¹⁹⁻²⁰Âpme Sonda tambuyet nin mka kwep jeniye mot ondek tati Zuda amobotnaj ekjengat kingati setn kili kili penaj kekti tapmann Zisasiyan belak tungupmnan ke petak zem kwatati pigok dinndoye, “Inmagen kej sewaknajan wembe.” Kegok zemti betnaj zemberaj nembet nembet ma gatnanen zemberaj ke zikat ndaye. Âpme nin Zisas ekti kenj dolaknajan penaj beme tabenn. ²¹Âpme ewe pigok dinndoye, “Inmagen kej sewaknajan wembe. Bienaj nej zemneme toti inmagen mulup mban kegogak nej in muluwen mebegat zemindeyap.” ²²Kegok zemti

indakumbumti zeye, “In Emetak Terj tit. ²³In am yomin zemzulutindewep beme yomin penañ yek bewe. Âk am notnangat yomañ tatagat nâmpewep beme yomañ ke kaliñañ tabe.”

Tomasiyañ Zisas ege

²⁴Âpme Zisas nembañane 12 ninmagengatnañ nemba ñen kwitnañ Tomas ek keyet kwitnañ ñen Didimas manzemtemenn, ningalen zeleset, nemba pepet kegok zewanek. Egañ ewande ñen mame Zisasiyañ nemba notnañ etañ sokbemindaye. ²⁵Keyepmti nemba notnañ nin Zisas sokbemndame ekbenn nin zewenn, “Nin Amobotnañ sokbemndame ekñ.”

Zemann Tomasiyañ pigok dinndoye, “Neñ nen penañ betnañ palakñan gwilim zemberañ ke ma gatnanen ñelip zemberañ ke betnañ atam ektingut zelin kapi nâma penañ bewe.”

²⁶Zemti mamotnepeme Sonda ñen beme naman Tomasmak nsakwep mka keñañ ñengat ondekti mka wanok setnañ keñaset kili kili kekpemti tapmambenn. Tatnepemann Zisasiyañ ewe tunjupmnan patañ zem kwatati pigok zeye, “Keñ sewakñañ inmagen wembe.” ²⁷Zemti Tomas pigok dunduye, “Geñ zewanangat betn zemberañ pi timak ekbak ma betdañ daen pemane mepme ñelip zemberañ timak nâmbak. Mti keñ zut ewe mimipin; penañ nâmkinpemne.”

²⁸Zeme Tomasiyañ atam ekti zeye, “Geñ penañ Amobotnañ ma Kawawañ!”

²⁹Zeme Zisasiyañ pigok dunduye, “Geñ natimak ekti keyepmti nâmkinpemnenigat. Âpme am neñ sepem eekpiñ belak manâmkinpemneip am ekñen ke Kawawañañ indamukulem mimindeme oloñen palen penañ mamambep!”

³⁰Zisasiyañ ewe msalen pien mamti menok sepemañ igak igak sambe penañ nembañane ningat zikatnnañ mamimkwapme ektemenn. Sambe bee papiaen pi ku kuma delañ zemâge. ³¹Bugan pi kumpepeñañ pi ilak kapigogapmti kukuñañ. In sambeyañ maiñnâmti Zisas ek Kilais ek Kawawañgat Nemuñañ penañ ke nâmkinpapeyet bugan kapi kumpewan. Keyepmti an ñenañ zet kapi maiñnâmti egat nâmkinpewe beme egañ mama kanzizit aikbe.

Zisasiyañ nembañane 7 sokbemindaye

21 ¹⁻³Mamoti Zisas nembañane 7 ke nin kapigok: Saimon Pita, Tomas kwitnañ ñen Nemba pepet, Natanael Galili mkaengatnañ ma Zebedyet nemulatnenet ma nembañane zut nit ewe Taibilias tundua ganzenan met ondek tapmmann Saimon Pitayañ nin pigok dinndoye, “Neñ aňgalayet timasât tapmiap.” Zeme nin nsakwep meti waňgaen moti meti tambu tetak pi mulup temañ mti aňgala ñen ku atawenn.

⁴Ke tapmimetnepemann ilak msaye. Âpme Zisasiyañ gambibik palen daen tapmame ekbenn. Yanggut nin an ke Zisas ke ku nâmatâpewenn.

⁵Mme Zisasiyan ndikti kwizet pigok kuye, “An eknen da, in angala nen mandayo ma yek?”

Ndayankwesime nin zewenn, “Yek, nen ku mandann.”

⁶Zeme pigok dinndoye, “In elengolamin mti naman wanga ganzenan bet penaset peme topme angala omba mandait.” Zeme nin elengolam mti wanga nembeleset pemann towepme angalayan totne totne elengolam bepi gak zem tapme elengolam mandamann kwasâgât tenjen penaj siwenn.

⁷Âpme nen Zisasiyan nâmneme dolaknan mambemtan keyan Pitayet pigok zewan, “Pita, an kanda ilak Amobotnanan iknan tazin nânik.” Zeme Saimon Pitayan nânânak kâlâpman mti biman kaikti tuyen palam toti tukutumti tu paleset zelean mege. ⁸⁻⁹Âpme wanga bugan nembu sutnanik daen 100 mita mee kegok tage keyepmti namba notnan nin wanga mme kainan mopmann elengolam angala melesin mandapemann kainanik motapme gambibik palen gwaen moti ekmann tep kwetnanen angala ma meu mee piyan tazimanje.

¹⁰Âpme Zisasiyan dinndoye, “In angala tiyo e notnan pienen mti kolit.”

¹¹Zeme Saimon Pitayan wangaen moti elengolam teknan pi kwaleti elengolam angala melesin mandamti katiknan mot peme wenje. Kenanen bee angala teman teman penaj 153 bekapiyan tabien yangut elengolam teknan ku etiyen. ¹²Mme Zisasiyan pigok dinndoye, “In angala ke tapme pien kot meu timti nit.”

Zeme nin ilak Amobotnan elak nâmpewenn keyepmti nin, “Gej pe an kwi?” kegok ke ku yankwesiwenn. ¹³Âpme Zisasiyan kot totati angalamak meu tewen tapmanje ke timti kalan ndame nimbenn.

¹⁴Zisasiyan gakikiengatnan wati nin sek zut ilak sokbemndaye yalak kan piyet sokbemndame sek tuk bein.

Zisasiyan Saimon Pita sek tuk kapi yankwesiye

¹⁵Nin meu ke ndame nimann delan zeme Zisasiyan Saimon Pita pigok yankwesiye, “Saimon, Zângat nemunan, nodine eknenan nâgât kenin teman penaj bemti gogot mamimneip. Âpme gej nâgât zigok penaj manâmnunik?”

Zeme Pitayan zeye, “Amobotnan, nen gâgât gogot omba penaj mamiyap elak nep nâmnunik.”

Zeme Zisasiyan zeye, “Gej nâlen sipsip manje maindadamun mmambanik.” ¹⁶Kegok zemti ewe keyegak sakwalamti zeye, “Saimon, Zângat nemunan, gej penaj nâgât gogot penaj maminik?”

Zeme Pitayan zeye, “Amobotnan, nen gâgât gogot penaj mamimgeyap e nâmnunik.”

Zeme Zisasiyan zeye, “Gej sipsip manjanne maindikdamun mmambanik.”

¹⁷Zeme Zisasiyan ewe sakwalamti pigok yaŋkwesiye, “Saimon, Zângat nemuŋaŋ, geŋ penaŋ nâgât gogot mamimnenik?”

Egaŋ zet sepemaŋ kwep ke yaŋkwesime sek tuk beme Pitayaŋ nâmti keŋaŋ bekaŋaŋ penaŋ beme zeye, “Amobotnaŋ, geŋ kwitnaŋ kwitnaŋ sambeyet yaŋaŋ nâmane delaŋ manzein. Neŋ gâgât gogot mamimgeyap e kegoŋak nâmnenik.”

Zeme Zisasiyan zeye, “Geŋ sipsip maŋganne kapi maindikdamuŋ mmambanik. ¹⁸Neŋ penaŋ sukwep penaŋ pigok diŋgoma nâmbak, geŋ nembraŋgatnan mamkwabanan yaŋ ewe mamobanik pi bitimdi giti zamti set deset ma deset mesâti giti nâmtati mamepmambanik. Yaŋ maneti an penaŋ bewanik kan keyet geŋ bedi etaŋ mwapmane am notnaŋ ekŋenaŋ bitimdi zamgemti geŋ mesât ku nâmbanigen ke gaik mebep.” ¹⁹Zisasiyan keŋok zemti Pitayaŋ zigok gakiwe keyet zet bimbim zet zeye gakikiŋaŋ sepemaŋ igak keyaŋ Kawawaŋgat kwizet buŋamaŋ mim wawagat zeye. Zet keŋok dundumâti pigok dunduye, “Geŋ nâlen nembra penaŋ kwati mamambanik.”

²⁰Âpme Pitayaŋ gilik zemti ekme Zisasiyan neŋ nembra ektikŋaŋ mampemtan keyaŋ egeŋat bamidan penaŋ mepma nikbun. Neŋ Aŋgalalaŋ Kendoen meu tatnimambenn kan keyet neŋ Zisasiyet wakŋaŋ bemti pigok yaŋkwesiwan, “Amobotnaŋ, pe kwiyaŋ geŋ zengowe?”

²¹Neŋ bamidan taidamâtmepma Pitayaŋ nikti Zisas pigok yaŋkwesiye, “Amobotnaŋ, nembra kapi bam amnaŋ zigok msame gakiwe?”

²²Yaŋkwesime Zisasiyan pigok dunduye, “Egaŋ ewe alik mame neŋ gilik zemti kobap ma gakime kobap e nen nâyap. Âpme geŋ zet keyet eneyet tatnayaŋkwesinik? Geŋ nâlen nembra penaŋ kwati mamambanik.”

²³Âpme am Zisas nâmkinpemti mamtemien notnaŋ ekŋenaŋ zet ke nâmti Zângat pigok zemyuŋguwien, “Nembra kapi ku gakiwe.” Wa Zisasiyan ek gakikipiŋ telepŋat mamambe keyet nâmti ku zeye.

Pitayaŋ yaŋkwesime keyepmti Zisasiyan pigok zeye, “Egaŋ ewe alik mame neŋ gilik zemti kobap ma gakime kobap e nen nâyap. Âpme geŋ zet keyet eneyet tatnayaŋkwesinik?”

²⁴Neŋ kwitnaŋ kwitnaŋ sambe ke eknâm mima delaŋ zemâge keyepmti zet sambe beke papiaen kapi weyaŋ zemâtâti kumâti peyap. Keyepmti nin zet meluwaŋ kumpeye kapiyet nâmann penaŋ penaŋak bein.

Zânaŋ zet kapigok zemdelaŋ zeye

²⁵Âpme Zisasiyan kwitnaŋ kwitnaŋ mkwage sambe bee ilindiŋ papiaen kuma topmâdak ze papia ŋotekŋaŋ sambe penaŋ sokbemâdak.